

Հարգելի՛ ընթերցող,

Արցախի Երիտասարդ Գիտնականների և Մասնագետների Միավորման (ԱԵԳՄՄ) նախագիծ հանդիսացող **Արցախի Էլեկտրոնային Գրադարանի** կայքում տեղադրվում են Արցախի վերաբերյալ գիտավերլուծական, ճանաչողական և գեղարվեստական նյութեր՝ հայերեն, ռուսերեն և անգլերեն լեզուներով: Նյութերը կարող եք ներբեռնել ԱՆՎՃԱՐ:

Էլեկտրոնային գրադարանի նյութերն այլ կայքերում տեղադրելու համար պետք է ստանալ ԱԵԳՄՄ-ի թույլտվությունը և նշել անհրաժեշտ տվյալները:

Շնորհակալություն ենք հայտնում բոլոր հեղինակներին և հրատարակիչներին՝ աշխատանքների էլեկտրոնային տարբերակները կայքում տեղադրելու թույլտվության համար:



Уважаемый читатель!

На сайте **Электронной библиотеки Арцаха**, являющейся проектом **Объединения Молодых Учёных и Специалистов Арцаха (ОМУСА)**, размещаются научно-аналитические, познавательные и художественные материалы об Арцахе на армянском, русском и английском языках. Материалы можете скачать БЕСПЛАТНО.

Для того, чтобы размещать любой материал Электронной библиотеки на другом сайте, вы должны сначала получить разрешение ОМУСА и указать необходимые данные.

Мы благодарим всех авторов и издателей за разрешение размещать электронные версии своих работ на этом сайте.

Dear reader,

The Union of Young Scientists and Specialists of Artsakh (UYSSA) presents its project - **Artsakh E-Library** website, where you can find and download for FREE scientific and research, cognitive and literary materials on Artsakh in Armenian, Russian and English languages.

If re-using any material from our site you have first to get the UYSSA approval and specify the required data.

We thank all the authors and publishers for giving permission to place the electronic versions of their works on this website.

Մեր տվյալները – Наши контакты - Our contacts

Site: <http://artsakhib.am/>

E-mail: info@artsakhib.am

Facebook: <https://www.facebook.com/www.artsakhib.am/>

ВКонтакте: <https://vk.com/artsakhiblibrary>

Twitter: <https://twitter.com/ArtsakhELibrary>

ՎԵՐԱ ԳՐԻԳՈՐՅԱՆ

ՔՈՂԸ ԵՏ ՔԱՇԱԾ ԳՐԱՌՈՒՄՆԵՐ



Մտնիքանակերտ- 2014

ՎԵՐԱ ԳՐԻԳՈՐՅԱՆ

**ՔՈՂԸ ԵՏ ՔԱՇԱԾ
ԳՐԱՌՈՒՄՆԵՐ**

«Դիզակ պլուս» հրատարակչություն
Ստեփանակերտ 2014

ՀՏԴ 325
ԳՄԴ 66.5(2Հ)
Գ 888

Գ 888 Գրիգորյան Վ.
Քողը ետ քաշած գրառումներ/ Վ. Գրիգորյան.-
Ստեփանակերտ: Դիզակ Պլյուս, 2014.- 200 էջ:

Սույն գրքում զետեղված են հեղինակի վերջին 20 տարվա օրագրային գրառումները, որոնցում արտացոլված են այն բոլոր առանցքային իրադարձությունները, ժամանակի դեմքերն ու դեպքերը, որոնց այս կամ այն կերպ առնչված են եղել իր՝ Վ.Գրիգորյանի ապրած ուրախ կամ տխուր օրերը:

Պատերազմում անհայտ կորած ազատամարտիկների թեման հեղինակի այս գրքում ևս դոմինանտի դերում է:

ՀՏԴ 325
ԳՄԴ 66.5(2Հ)

ISBN 978-99941-2-849-5

© Գրիգորյան Վ., 2013

ԽՄԲԱԳՐԻ ԿՈՂՄԻՑ

Օրագիրը մարդու անչափ անձնական հենքի, այսպես ասած՝ ինտիմ, գրառումներն է պարունակում սովորաբար, որ հրատարակման է տրվում... սովորաբար հեղինակի մահից հետո:

Վերա Գրիգորյանը «խախտել» է այդ չգրված օրենքը, եւ, կարծում եմ, ճիշտ է վարվել: Այդ կնոջ, կուտակված ևս առավել՝ ավելին՝ մոր, տառապյալ մոր, լոկ ի՛ր համար թղթին հանձնածն անգամ, որքան էլ պարադոքսալ թվա, այնքան է ներհյուսված ուրիշների՝ ընկերների, հարեւանների, գործընկերների, ավելի լայն վերցված՝ արցախցիների, հայ ժողովրդի ճակատագրով, ուրախությամբ ու տխրությամբ, որ կարդացողը մի պահ նույնիսկ մոռանում է շարադրանքի հույժ անձնական շերտերը ու տեսնում ավելի շատ ընդհանրականը...

Հավանաբար, հեղինակն ինքն էլ է զգացել դա, որի համար էլ որոշել է տարիների ընթացքում իր մտքերին եւ գլխով անցածին հաղորդակից դարձնել ուրիշներին: Օրագիրն ընթերցվում է հաճելիորեն: Չնայած փաստացի նյութում առկա ողբերգականությանը՝ այն ավելի շատ շաղախված է հույս ու լույսով վաղվա օրվա հավատով:

Ինտիմ էջերում ևս Վերա Գրիգորյանը հանդես է գալիս որպես հայրենասեր, որպես երկրի իսկական քաղաքացի, ու եթե մեկ-մեկ խիստ է արտա-

հայտվում այս կամ այն երեւոյթի, անձի մասին, ապա դա անում է կոռեկտորեն՝ հիշելով, որ յուրաքանչյուր անհատի մեջ էլ սեւի կողքին ապրում է եւ սպիտակը... Թվում է մարդ ավելի անկեղծ լինել չի կարող, քան տրված է այս օրագրում: Օրագիրն այս, որ հեղինակի 16-րդ գիրքն է, թվում է ոչ միայն տիկին Վերայի, այլեւ, կարելի է ասել, Արցախի բոլոր մայրերի անցած դժվարին ճանապարհն է՝ 1992-ից մինչեւ այսօր: Ցանկանք, որ գոնե հետայսու միայն ուրախ մտքեր գրառվեն հեղինակի եւ հետագա մյուս բոլոր հայ օրագրավարների տողերում:

Թող Աստված դա անի՝ նրանց համար...

Միքայել ԲԱԼՅԱՆ



Սկսվել է 1994 թվականը: Նոր տարի է... Սպարտակը նորից գնաց դիրքերը, ու չգիտեմ ինչու՝ սկսեցի մեր սարքած տոնածառից իջեցնել խաղալիքներն ու տեղավորել արկղի մեջ՝ չսպասելով հունվարի 13-ին... Տղաս գնաց, եւ ասես ինչ-որ մի թել կտրվեց սրտումս: Չեմ հասկանում, թե ինձ հետ ինչ է կատարվում: Արդեն գիշեր է, Շուրան, որ մի քիչ խմած էր, նրան ճանապարհելուց հետո պառկեց բազմոցին ու հագուստով էլ մնաց քնով անցած: Իսկ իմ քունը չի տանում: Նստել եմ սեղանի մոտ, գրիչը ձեռքս առել՝ ինքս էլ չգիտեմ ինչու: Ախր արդեն քանի՛-քանի տարի է՝ օրագիր չեմ պահում: Հարսանեկան ճամպրուկից հանեցի-ստուգեցի այն՝ վերջին գրառումը կատարել եմ... ամուսնությունիցս երկու շաբաթ առաջ: Ուրեմն՝ ուղիղ քսաներկու տարի չեմ գրել:

Ընտանիքը մեծ պարտավորություն է: Այն խլում է անձնական կյանքիդ գերակշիռ մասը եւ ամբողջությամբ՝ ազատ ժամանակդ: Իմ պարագայում, համենայնդեպս այդպես է եղել եւ է': Երկուսի համաձայնությունն է ընտանիքը կամ անհամաձայնությունը: Եթե նրա մյուս անդամները քեզ աջակիցներ են, ապա հնարավոր է ապրել եթե ոչ բացարձակ երջանիկ՝ զոնե համերաշխ: Գակատագիրը կյանքի մեծ փորձություններով անցած, նրա

մարտահրավերներին դիմակայած-հաղթած, բազմանդամ-բազմագույն-բազմաշերտ, բայց շատ համերաշխ ընտանիք է հարս տարել ինձ: Կյանքումս հանդիպած ամենախմաստուն կինը եղել է կեսուրս՝ Չայկուշ Գրիգորյանը, լույս ոսկորներին...

Ես ու Շուրան շատ ջախել էինք, բնավորությամբ էլ անկեղծ, բայց բռնկուն...Նա մեկ-մեկ «խմում» էլ էր եւ անսթափ միջոցին ցավ պատճառում ինձ: Չլիներ կեսուրս՝ բաժանվել էինք...Այդ կնոջ խորախորհուրդ մտքերը հիմա էլ են զարմանք ու հիացմունք պատճառում ինձ: Չեմ զղջում, որ մնացի, որ երկուսով մեր բույնը հյուսեցինք ու երկու մանկան ծնողները դարձանք: Վաղուց ենք կես խոսքից միմյանց հասկանում: Տարիներ շարունակ կիսել ենք մեր ուրախությունները, հիմա էլ ահա տագնապն ենք կիսում: Սպարտակը գնաց ու քանի օր է՝ չի երեւում, լուր չի տալիս իր մասին:

Վերջ, այսօրվանից վերսկսելու եմ գրառումներս: Դա հիմա ինձ շատ է պետք, թեւ չգիտեմ՝ կհերիքե՞ն ուժերս, բառերս՝ արտահայտելու այն ամենն, ինչ իմ հոգում է կատարվում: Վերատադրել այնպես, ինչպես զգում եմ: Չգրառել չեմ կարող, որովհետեւ սրտումս կուտակվածը կխեղդի, նեղվելուց համբերությունս ճաք կտա, կարոտից էլ, թվում է, կմեռնեմ: Բայց ունե՞մ ես, արդյոք, մեռնելու իրավունք: Այսօր արցախցի ամեն կնոջ մեջ է ապրում այս տագնապն ու ցավը, եթե բոլորն ու-

զենան մեռնել, հողը ո՞վ կպահի, հողը պահող զավակներ ո՞վ կծնի: Բա էլ ինչի՞ համար էր այս Շարժումը, այս պատերազմը, որի մասնակիցներից մեկը իմ Սպարտակն է, քո Դավիթը, նրա Արսենը, մյուսների Վահեն, Վահանը, Վահագնը... Մեծացած, առնականացած մեր բալիկները, որ հիմա հայրենյաց զինվոր են դարձել՝ փորձության մեջ հայտնված հայրենիքի զինվոր:

Չէ, պիտի՛ դիմանամ: Եվ վարեմ օրագիրս: Այս վիճակը, այս ճանապարհը, զգում եմ, երկար է ձգվելու: Պնդաճակատ թուրքը չի ուզում հանձնվել: Մեր «կապիտուլացվող Բեռլինը» դեռ հեռուների մշուշում է... Օրագիրն ինձ կօգնի գոնե քիչ-ինչ լիցքաթափվել, կօգնի դիմանալ: Վճռված է՝ գրելու եմ:

6.01.1994



Երբ հիշում եմ, թե նրանք ինչպես նայեցին ինձ, մարմինս նորից է սկսում սառչել...

Ասացին՝ Ֆիզուլու ուղղությամբ մղվող մարտերին մասնակցող միլիցիայի ջոկատների կազմում զոհվածներ ու անհայտ կորածներ կան: Մեկ օր առաջ էլ իմացել էինք, որ Սպարտակենց ջոկը ոչ թե Սարսանգ է մեկնել, ինչպես մեր տղան՝ ասաց տնից դուրս գալու պահին, այլ հենց Ֆիզուլու

ռազմաճակատ: Շուրան լսեց թե չէ՝ Վերա, ասաց, ես գնում եմ շտաբ, կամավոր եմ գրվելու: Ասացի՝ սպասիր, ես էլ եմ գալիս, գուցե երեխայից որեւէ լուր լինի:

...Ստանք Ազատ Աբրահամյանի մոտ: Չէ, դեռ լուր չկա, բացատրեց Ազատը, հանգիստ եղեք, հենց որ նոր բան իմացանք, իսկույն զանգելու եմ: Շուրայի կամավոր ռազմաճակատ գնալու միտքը նրան դուր չեկավ: Ասաց՝ տարիքով մարդ ես, մինուճար որդիդ՝ այնտեղ, ինչո՞ւ դու էլ գնաս: Շուրան թե՛ հենց դրա համար էլ գնում եմ... Ազատը ձեռքը դրեց նրա ուսին, հորդորեց.

- Նորից եմ ասում, գնա ու սպասիր: Մի բան որ պարզվի՝ իսկույն իմաց կտամ: Ասում եմ գնա, ուրեմն՝ գնա:

Այդ պահին էլ աչքս որսաց բաժնուն գտնվողների, հատկապես կանանց, իմ կողմը նետած՝ մեկը մյուսին այնքա՛ն նման հայացքները: Դրանցում խղճահարություն կար: Չգիտեմ ինչու՝ ճչացի: Ինձ բռնեցին, որ չընկնեմ: Ազատը թե՛ սրա՞ն էիր սպասում, Շուրա, դե գնա էլի, տուն տար Վերային: Չեմ հասկանում, թե ժամանակից շուտ ինչու եք իրար խառնվել: Չե՞ք հասկանում, որ հիմա ուժեղ լինել է պետք...

Չեմ շարունակում, ձեռքս դողում է: Գնամ պառկեմ: Տեսնես վաղվա օրը ինչ կբերի:

18.01.1994



Այսօր էլ չհաջողվեց ոչինչ պարզել: Կես գիշերին քնից արթնացել, դուրս էի եկել պատշգամբ՝ օդ շնչելու, նայեցի վեր՝ երկինքն աստղազարդ էր: Հիշեցի, որ տղաս հատկապես ամռան ամիսներին սիրում է նայել երկնքին ու «փնտրել իր աստղը», սիրտս փուլ եկավ: Տեսնես որտեղ է եւ ինչ վիճակում: Տե՛ր Աստված, թող մեկը գա եւ ասի Սպարտակին բերել են հոսպիտալ՝ ձեռքի կամ ոտքի մեկը կտրված, բայց կենդանի, ձեռքիս մատանին հանեմ տամ իրեն՝ որպես բարի լուր բերողի:

Այդ պահին դեմքիս թեթեւ ապտակի ցավ զգացի: Շուրան էր: Արթնացել՝ անկողինս դատարկ էր գտել եւ անհանգստացել:

- Չես ամաչո՞ւմ,- ասաց,- ինչե՛ր ես դուրս տալիս... Գուցե երեխան ողջ-առողջ է, գալու է, ի՛նչ ես սուգ ու շիվանը դրել...

Հարցրի՝ բայց դու ինչպե՞ս իմացար, թե ես ինչ էի մտածում: Ասաց՝ որովհետեւ բարձրաձայն էիր մտածում...

Ինձ ներս տարավ ու ցերեկվա վազվզուքից հոգնած՝ նորից քնով անցավ, իսկ ես դեռ սեղանի մոտ նստած՝ մտածում եմ նրա խոսքի վրա. գուցե իսկապես վատ բան չմտածեմ, որպեսզի լավն առաջներս գա:

20.01.1994



Այսօր ներքին գործերի նախարարությունում էինք: Երեւանի սպեցնազից եւս անհայտ կորածներ կան: Նրանցից մեկի՝ Ենգիբարյան Մամիկոնի հայր Ստյոպան եկել՝ ուզում էր որդուն որոնելու գնալ: Նախարար Իսագուլովն ու տեղակալ Ալեքսանդր Աղասարյանը, որը միաժամանակ ռազմագերիների ու պատանդների գծով հանձնաժողովի նախագահն է, խոստացան մեզ մեքենա տալ՝ Կարախանբեյլի հասնելու համար: Ականազերծող էլ են տալու... Մամիկոնի եւ Սպարտակի հետ «անհայտ կորած» Ավթանդիլյան Գառնիկի եղբայր Գագիկն էլ էր մեր կողքին: Բայց Երեւանից զանգեց գեներալ Պապոյանը եւ Ստյոպային ասաց, որ Մամիկոնին գտել են, ողջ է: Ստյոպան, մեկեն երջանկացած, գնաց: Երանի՜ քեզ՝ մտածեցի՝ տեսնելով, թե «ոտքին ոտք բուսած»՝ ինչպիսի փութկոտ քայլերով է հեռանում, համարյա վազում:

Կարախանբեյլի գնալ չհաջողվեց, բայց մի տեսակ հույսով ենք լցվել. որ Մամիկոնին գտել են, գուցե մերոնք էլ գտնվեն:

24.01.1994



Արժանից մեր տուն զանգեց Ստյոպան: Ձայնը
խզված էր, կերկերուն.

- Վերա՛ք քույրիկ, աստծուն աղոթիր-աղաչիր, մի
մատաղ էլ արա, որ էն վիճակուն, որուն Մամիկո-
նիս են գտել, Սպարտակին չգտնեն...

Ահն ընկել է սիրտս, հիմա չգիտեմ ինչ անել: Չէ,
հենց վաղը տոմս կվերցնեմ՝ Արժան գնամ: Իմ
աչքով կտեսնեմ ինչ է եղել տղայի հետ: Ո՛վ գիտի,
գուցե Սպարտակիս էլ տեսած լինի...

27.01.1994



Երանի՛ չգայի...Տասնիննամյա տղայի երեսն
ամբողջովին այրված է, մի ականջի վերին՝ մյուսի
ստորին կեսը, մի ձեռքի արմունկից ներքելը չկան,
մյուսի դաստակից բութ մատն է մնացել, մի ոտ-
քից՝ ծնկից վերելը, երկրորդի էլ կրնկից ցածը չկա:
Ոչ նորմալ լսում է՝ ոչ տեսնում:

Խեղճ Ստյոպա, հիմա է տեղ հասնում ասածդ...
Այս ի՛նչ ահավոր բան է պատերազմը: Ուղեղունս
Ռաֆֆու «Սամվելից» մի տող արթնացավ. «Մեծ
գործերը մեծ էլ զոհ են պահանջում»: Տեր Աստ-
ված, պահիր որդուս, եղունգիդ տակ էլ լինի՝ պա-
հիր-պահպանիր մինուճարիս:

28.01.1994



Շուրան կողքիս քնած է: Ծանր է շնչում: Անկապ ինչ-որ բան է ասում բարկացած... Ո՞ւմ հետ է վիճում: Տեսածիս մասին լիովին չեմ պատմել նրան: Ինչո՞ւ ասեմ, որ ինձ նման եղած քունն էլ փախչի՞ աչքերից, եղած խելքն էլ կորցնի՞: Այս ի՞նչ պատիժ է: Ոչ մոռանալ է լինում, ոչ աչք կպցնել: վաղը մի բան է հարկավոր մտածել: Այսպես ո՞նց կլինի, օրերը սահում գնում են, իսկ մեզ ոչինչ դեռ չի հաջողվել պարզել:

29.01.1994



Այսօր Ալիկ Աղասարյանի առանձնասենյակում էի, երբ Երեւանից զանգեց Կարինե անունով մի կապիտան եւ հայտնեց, որ ինքնաթափ մեքենայով տասնվեց դիակ են բերել, տասնչորսին հարազատները ճանաչել տարել են, երկուսին ճանաչող տիրություն անող չկա: Ասաց բոլորն էլ միլիցիայի ջոկատներից են: Անհայտ կորածների հարազատներին իմաց տվեք, գուցե տեսնել ցանկացող լինի...

Չենց այդ պահին էլ ներս մտան Գառնիկ Ավթանդիլյանի մայր Անգիմն ու Գագիկ եղբայրը եւ Աղասարյանին հայտնեցին, որ ադրբեջանցի Քյարամը, որը մինչեւ Արցախյան շարժումն ապրում էր Բալ-

լուջայում, Բարդայից ռացիայով կապվել է դիրքի մեր տղաների հետ, ասել «հաքիմին» իմաց տվեք (խոսքն Անգիմի անասնաբույժ ամուսնու մասին էր), որ Գաբալը (սա էլ Գառնիկի մականունն է) իրենց մոտ է, թող կապի մեջ մտնի՝ ասեմ ինչ պետք է անի: Անգիմն ու տղան, չկարողանալով թաքցնել իրենց ուրախությունը, իրար փաթաթված լաց էին լինում: Երբ նրանք գնացին, ես Ալիկին ասացի, որ մեկնում եմ Երեւան՝ այն երկուսին տեսնելու...

8.02.1994



Կապիտան Կարինեին գտա: Իրենց մեքենայով ինձ տարան Եռաբլուր. այնտեղ էին մի անկյունում թեթեւ-ինչ (ժամանակավոր) հողին պահ տվել տղաներին... Ձեռքերս-ոտքերս դողում էին, երբ ետ էին տանում հողե վերմակը: Կռացա, նայեցի՝ չէ, Սպարտակս չէ, ոչ էլ ինձ ծանոթ անհայտ կորածներից որեւէ մեկը:

Իսկ հարազատները գտնվեցին: Պարզվեց՝ մեկը ոսկեպարզի է, մյուսը՝ մեծայրումցի:

Թող Աստված ների ինձ, եթե ասեմ, որ անհույս գնացել էի՝ հույսի նշույլով վերադարձա...

10.02.1994



Չարսիս՝ Նինելի հետ այսօր գնում էինք ավտոկայանի դիմացի շենքը (ասել էին հիմա այնտեղ է Բայիլի բանտում 3 տարի 11 ամիս նստած ու նոր փոխանակված ծովատեղցի Աբրիկ Աբրահամյանը), շենքին չհասած փոս կա, մտքով անցած՝ չնկատեցի ոտքս ինչպես ներս դրի... Եկավ «շտապ օգնության» մեքենան, տարավ հիվանդանոց, ու հիմա գիպսի մեջ է ոտքս՝ ջարդվել է: Երբ կլավանա, չգիտեմ: Ճակատագիրն ինչո՞ւ է այսպես հալածում ինձ: Տե՛ր, համբերություն տուր...

18.02.1994



Մինչեւ ե՛րբ կարող եմ, թեկուզ գիպսի մեջ, այսպես, «ձեռքերս ծալած», նստել տանը: Սպարտակ, բալա՛ս, մեռնի քո մայրը, որ անգոր է, որ ձեռքովը բան չի գալիս: Որտե՞ղ ես, ի՞նչ վիճակում...

26.02.1994



Թեեւ բժիշկը համաձայն չէր՝ հանել եմ տվել գիպսը: Չերն անիծած, ինչ ուզում է, թող լինի: Մի տղա կա՝ Վահագն Մելքունյան, ասում է դուք միայն բենզոլինի հարցը լուծեք, ես անվճար կտանեմ-բերեմ: Երեւան, որովհետեւ Աբրիկը հիմա այնտեղ է, բուժվում է, ասում են՝ նյարդային վիճակն ահավոր է...

28.02.1994



Երեւանի 15-րդ թաղամասում գտա նրան: Չարցրի՝ էլի՞ հայեր կան այնտեղ, թե՛ շա՛տ: Եվ տվեց անունները. Նապոլեոն Չայրիյան, Կառլեն Չայրունյան, Ղարիբ Առստամյան... Ոչ մեկին չճանաչեցի:

- Մի տղա էլ կա՝ Սպարտակ: Ստեփանակերտից է: Ե՛ս նրա մոր...

Թունդ հայիոյեց, իսկ ես սկսեցի դողալ...

- Չարագատնե՞ր չունի էդ տղան, ինչ է...-բարկացած շարունակեց Աբրիկը,- ինչո՞ւ չեն հետաքրքրվում: Խեղճի վրա սաղ տեղ չկա, վերքեր են: Բայց ջիլը պինդ է հա՛... մաշված- մի մասն դառած էլ՝ դիմանում է... Իմ գալուց առաջ ասաց՝ երեւի մերոնք մահացել են, թե չէ կփնտրեին-գտնեին ինձ, հատկապես մայրս որ կենդանի լինեի...

Աբրիկը հանկարծ այնպես գունատվեց, ասես կաշվի տակ արյուն չկար: Հարազատներն ինձ աչքով-ուներով արին՝ հերիք է: Երբ մի կողմ քաշվեցի, ասացին՝ էլ ծպուտ չանես, երբ այդպես գունատվում է, գիտակցությունը կորցնում է...

Փշրված սրտով դուրս եկա փողոց, մի թաքնված անկյուն գտա, նստեցի, մի կուշտ լաց եղա: Ես քո տառապող ջանին մեռնեմ, այ իմ բալա, վիրավոր բալա, հիմա, երբ գտել եմ հետքդ, սարեր շուռ կտամ, որ ճարեմ քեզ:

2.03.1994



Չէ, որ կողմի վրա էլ վազում եմ, ոչինչ չի ստացվում: Իմ առջեւ միայն փակ դռներ են հայտնվում... Այս ի՛նչ պատիժ է, կախարդական շրջան: Ախր հասկանում եմ, որ քանի դեռ հետքերը թարմ են, տղաներին գտնելը համեմատաբար հեշտ կլինի: Ինչքան հեռանա, երկարի ժամանակը, այնքան կբարդանա-դժվարանա որոնման գործը: Բայց միայն իմ հասկանալուց ի՛նչ օգուտ...

Խեղդվում եմ, ուրիշ ոչինչ ...

4.03.1994



Չերթական «բանակցությունից» եկել են տուն: Ջգեստապահարանը բացեցի՝ դարակից թարմ սրբիչ հանելու, աչքս ընկավ այն շրջագգեստին, որ ժամանակին Մոսկվայից իմ խնդրանքով գնել էր Ամալյա Գրիգորյանը, որի հետ միասին աշխատում ենք ինստիտուտում: Սպարտակս ինձ արգելել է հագնել այն: Ասաց՝ հագիդ լրիվ սեւ շոր չտեսնեմ: Ձեռքս առա շրջագգեստը եւ կամաց բացվող դռան ձայն լսեցի: Չետո դեմս հայտնվեց Սպարտակը՝ հոնքերն իրար բերած:

- Չե՞մ ասել էդ դեյրան չհագնես, ինչո՞ւ ես հանել տեղից:

Մեխանիկորեն ասացի՝ հագնելու համար չեմ վերցրել եւ ուրախությունից գժված ուզում էի գրկել իրեն, երբ մեր միջեւ մի ստվեր կանգնեց՝ որդուս ծածկելով ինձնից: Ջղայնացած ձեռքս տարա, հրեցի խանգարողին ու... լսեցի հարսիս՝ Նինելի ձայնը:

- Մա՞մ, ինչո՞ւ ես հրում ինձ, եկել են ասելու արի ճաշենք, սեղանը պատրաստ՝ քեզ ենք սպասում:

Ներսս ասես միանգամից դատարկվեց, մնացի առանց օրգանների: Առանց սրտի: Այն իսկապես կանգ էր առել: Չասկացել էի, որ եղածն ընդամենը տեսիլք էր:

- Մա՞մ, քեզ ի՞նչ է պատահել... Պա՛պա, մաման
լավ չէ...

Հարսիս ճչոցի վրա սիրտս նորից սկսեց զարկել:
Աստված, ինձ ուժ տուր՝ խելքս չկորցնեմ:

5.03.1994



Նախիջեւանիկի կողմերից ոմն Աբդուլլա ռացի-
այով մտել է կապի գիծ, մերոնց ասել՝ եթե կարո-
ղանաք գտնել Մամեդով Ահմադին, մենք կկազմա-
կերպենք Սպարտակ Գրիգորյանի փոխանակումը
նրա հետ, մենք հաստատ գիտենք, որ այդ տղան
պահվում է Նամիկ Աբասովի մոտ:

Ադրբեջանի... ՊԱԿ-ի պետի՛ մոտ... Դժվար կլի-
նի: Բայց ճարներս ինչ, պետք է փորձենք: Աղաչում
եմ քեզ, Աստված, թող էդ Ահմադ կոչվածը կենդա-
նի լինի:

18.03.1994



Սիրտս ոնց էլ զգում էր: Մամեդովի դիակը գտնվեց: Էլ ի՞նչ փոխանակություն... Հարությունյան Վալենտինի հետ պատահածի մասին իմացողը էլ բան կձեռնարկի՞: Թուրքերը նրա ծնողներին էլ էին խոստացել փոխանակություն, ասել էին՝ անգամ եթե մերի դիակը գտնեք, փոխանակումը տեղի կունենա: Բայց հենց սահմանի վրա, փոխանակման պահին, հետելից կրակեցին հայ տղայի մեջքին, ու ստացվեց դիակը՝ դիակով...

20.03.1994



Մարտունու շրջնիլպետ Բորիս Եսայանը զանգեց, ասաց՝ Ադրբեջանի հեռուստատեսությամբ, «Գյունուն էկրանով», հերթական տեղեկատվության մեջ այսպիսի նախադասություն է հնչել. «Լեռնային Ղարաբաղը նեյնիմ-նեյնիմն է ընկել... արդեն միլիցիոներներին է առաջին գիծ քշել»: Ուրեմն՝ մեր տղաներից նրանց ձեռքն ընկնողներ են եղել...

Գետում խեղդվողը ծղոտից էլ է բռնում: Այդ զանգով էլ հույս առանք: Տեսնենք ինչ կլինի:

24.03.1994



Ադրբեջանցիներ «Ֆանտոմասն» ու Մամեդը ռացիայով կապվել են միլիցիոներ Տողա էդիկի հետ, ասել՝ Գառնիկն ու Սպարտակն իրենց մոտ են, Սպարտակը՝ ծանր վիրավոր, փոխանակություն դասավորեցեք... Հուլյսը մեծ էր՝ ինչպես երբեք, բայց արդյունքում նորից ջուր մաղվեց գլխներիս. պարզվեց, որ Գորխման անունով ադրբեջանցի հրամանատարը, որ պիտի փոխանակվեր, մարտի ընթացքում նույնպես սպանվել է: Բախտներս չի բերում ու վերջ:

27.03.1994



Մի քանի օր առաջ լսեցինք, որ թուրքերը հինգ ազատամարտիկի մարտադաշտում մորթել են: Երեքի դիակները գտնվեցին, երկուսինը՝ Աշոտ Հովհաննիսյանինն ու Գենադի Բազիյանինը՝ ոչ: Գենան մեր շենքից է, մեր մուտքից: Անցավ ժամանակ՝ երկուսն էլ վերադարձան գերությունից: Այնպիսի բաներ պատմեց Գենան, որ փշաքաղվեցինք: Թիկունքը մերկացրեց՝ շիկացած երկաթով դաջված խաչ տեսանք: Նա բավականին նման է Օգանովսկուն (հերոս հրամանատար Սամվել Կարապետյանին) եւ թուրքերը կարծել էին, թե նա է որ կա ու հատուկ դաժանությամբ կտտանքի ենթարկել:

Վա՛յ իմ բալա, դո՞ւ ինչ վիճակում ես:

6.04.1994



Կարճատեւ գերութիւնից ազատվեց Ակնաղբյուրի եւ շրջակա գյուղերի տղաներից բաղկացած գունարտակի հրամանատար Արշո Ղարամյանը: Ասաց՝ այնտեղ տեսել է Լյովա Ղաղայանին, գլխից ծանր վիրավոր վիճակում: Որպեսզի ծնողները համոզված լինեն, որ իրենց տղան իրոք կենդանի է, ռազմագերին ասել էր՝ իրենց կասես, որ մենք Չիչի անունով հավ ունենք, որի հետ մայրս «գրուցում» է՝ ինչպես մարդու հետ, քույրս էլ աղջիկ երեխա է ունեցել, նրա Շարմաղ սկեսուրն էլ անբարիշտի մեկն է...

Երանի՜ թե մեկն էլ մե՛զ փոխանցի նման մանրամասներ:

9.04.1994



Ի՛նչ լավ է. նույն Լյովային (Շահեն Սկրտչյանի քրոջ տղան է) շուտ ազատեցին:

Պատմեց, որ թուրք բժիշկը վիրահատել է գլուխը, բայց հետո ամբոխը, լսելով, որ հայի են բերել, թափվել է հիվանդանոց ու ձեռքն ընկած ամեն ինչով փորձել սպանել իրեն: Միլիցիոներները մի կերպ փախցրել՝ տարել են բանտ...

Իսկ թե բանտում ինչ տանջանքների են ենթարկել, ասելու բան չէ: Ծնկներս թուլացել էին, թոքերս՝ ասես կուչ եկած մնացել:

12.04.1994



Գերությունում գտնվել է հետախույզների քաջահամբավ հրամանատար Սանյան: Այդպես էլ է լինում՝ խիզախների հետ էլ են պատահում նման դեպքեր:

Սանյայի անհայտ կորած օրվանից հայրը՝ Աշոտ Մարտիրոսյանը չի սափրվել, ու հիմա պատկառելի մորուք ունի: (Ասենք՝ Շուրայինն էլ պակասը չէ: Ռոբերտինն էլ՝ Վարուժանի եղբորը: Շատերինը: Ասում են՝ երբ տղաներին գտնենք, այն ժամանակ էլ կսափրվենք):

Տղան ահավոր ծանր վիճակում է գերի ընկել: Թուրքերը չէին էլ ուզում նրան ուղղաթիռ ընդունել, ասացին՝ ինչի՞ է պետք էս ջարդուխուրդ եղածը, մեկ է, շունչը փչելու է: Բայց գտնվեց ավելի հեռատես մեկն, ով ասաց՝ վերցրեք, հայերը դրա համար էլ «բնամթերք» կամ փափուկ փող կտան...

Սանյային թուրք էլդարի հետ փոխանակեցին: Փոխանակելուց առաջ թուրքերն ասել էին՝ հայը ոտքեր չունի, ու երբ տղային տեսանք քայլելիս, մտածեցինք՝ պրոթեզով է: Բայց ահա զրույցի մի պահի նկատեցի, որ նա... քորում է ոտքը: Հարցրի՝ այդ ի՞նչ ես անում, թե՛ ինչ է եղել, ոտքս եմ քորում: Հայրն ուրախությունից քիչ էր մնում խենթանար. ուրեմն՝ որդու ոտքերը տեղում են:

13.04.1994



Չէի կարծում, թե այսօր երկրորդ անգամ կբացեն օրագիրս...

Նինելի քեռորդի Արկադին, որը «Փոքրիկ» մականունն է կրում, մի քանի օր մեր տանն էր, ասաց՝ ժղանովի կողմով թուրքերի հետ բանակցել ենք Սպարտակի հաշվով, շահագրգիռ թուրք կա, պիտի հետը խոսենք: Ասաց՝ ինքս ինձ խոսք եմ տվել, տյոտ Վերա, փեսայիս առաջինը ե՛ս եմ գտնելու:

Երեկ գնաց, իսկ այսօր ստացանք նրա զոհվելու լուրը:

Սրան դիմանա՞լ կլինի:

13.04.1994



Առավոտյան կողմ երազ տեսա: Աչքս բաց արի թե չէ՝ ժամացույցի սլաքին նայեցի. ժամը 5-ն էր, եւ ամբողջ քաղաքով մեկ հնչում էր օդային տագնապի ազդանշանը:

Երազս. երեւաց Սպարտակն ու թե՛ շուտ, շուտ, բոլորդ դուրս եկեք տնից: Տեսնելով, որ տեղից չենք շարժվում, բարկացավ. ձե՞զ հետ չեմ, շուտ արեք... Երեք անգամ կրկնեց այդպես ու անտես եղավ:

Մերոնց արթնացրի: Մենք դեռ միջանցքում՝ շենքը դղրդաց... Նինելի ճչոցի վրա շրջվեցի ետ, տե-

սա կողքից ու ոտքից արյուն է ծորում: Նրան գրկած հասցրի փողոց, եւ այդ պահին մեկը թե՛ ժողովուրդ, Շուրայի մորուքով գլուխն ընկավ զարվարդենց շիրենու վրա: Ոտքերս թուլացան, աչքերս մթնեցին: Մոտ կանգնածներն ուշքի բերեցին ինձ էլ, Նինելին էլ, որին հետո վիրակապեց Փրկարար ծառայության բուժքույրը:

Պարզվեց ի՞նչ. սարիլանջցի Վագիֆը հեծանվով անցնելիս է եղել գարածների մոտով, եւ ինքնաթիռի նետած ռումբի բեկորից թե պայթյունի ալիքից՝ գլուխը մարմնից անջատվել՝ թռել է ծառի վրա:

Տե՛ր, փրկեա մեզ ի չարեն:

14.04.1994



Տանս եղած-չեղածը ջարդուփշուր է: Ջհանդամը, երեխա՛ս կենդանի լինի, մի բարի լուր ստանամ նրանից:

Հրա՛շք. երեք իր լիովին անվնաս են մնացել. Սպարտակի նկարը (էն որ վերջին անգամ դիրքերը գնալուց առաջ հրամանատարի՝ Արկադի Բուդաղյանի հետ է նկարվել), միլիցիոնների համազգեստը եւ հարսանեկան օժիտում Նինելի բերած կոնյակի շիշը. սերվանտի գլխից ընկել է հատակին, բայց չի փշրվել: Երեք առարկա՝ երեքն էլ որդուս հետ

կապված... Գուցե Աստված դրանով ինչ-որ բան է հուշում ինձ, հույս է տալիս, որ երեխաս կենդանի է: Իմ վիճակում հայտնվածը ոչ միայն հավատացյալ կդառնա, այլև՝ սնահավատ:

15.04.1994



Մեր տանն ապրել հնարավոր չէ, առաստաղին նայում ես՝ երկինքը երեւում է: Թուրքի երեսն էլ կտվի, ռումբի էլ: Դուռ ու պատուհան չի մնացել, սռնիներից թռել փշրվել են:

Ապրի Սպարտակի քենակալը, իրենց բնակարանը ժամանակավոր տվեց մեզ, ինքն ընտանիքով տեղափոխվեց Քոլատակ:

18.04.1994



Ուրիշի օջախում ծվարած, նստել մտածում եմ՝ միտքս դեպի ետ շրջած:

...Յերթական անգամ դիրքերից տուն էր եկել տղաս, լողացել-մաքրվել, քնով անցել: Լույս չկար, բայց վառարանում թեժ ճթճթում էր կրակը: Յրետակոծությանն ուշադրություն չդարձնելով (վարժվել ենք), ես էլ կողքի ընկա՝ «աչքիս որդը կոտրելու»: Մեկ էլ արթնացա ուժեղ մզլահոտից: Աչքերս

բաց արի թե չէ, վառարանի գլխի «խարույկը» տեսա...Սպարտակի վերմակը տեղից սահել, ծայրը կպել էր վառարանին: Ո՛նց էր այրվում: Ճշոցիս վրա Շուրան էլ արթնացավ: Արագ հանգցրինք հրդեհի վերածվող կրակը: Վերմակի այրվող մասն իսկույն կոխեցի ջրի մեջ:

Վերմակը կարկատել եմ: Նոր երես-աստառ կառնեմ այն ժամանակ, երբ Սպարտակս եկած լինի...

22.04.1994



Սպիտակեղենը տեղում դասավորելիս, չգիտեմ ինչու, ստորին արկղադարակն էլ բացեցի եւ ձեռքս կպավ «Սալամանդեր» մակնիշի նոր (դեռ չհագած) կոշիկներին:

...Սպարտակին էին տվել: ՆԳՆ-ից: Շտապ վերցրել եկել էր, տանը փորձեց՝ ոտքը սեղմում էր: Ասաց՝ մամ, կտանես Արտաշին տաս՝ փոխի:

Շոշեցի Արտաշը ՆԳՆ-ի տնտեսական բաժնի վարիչն էր:

Հետո մեր գլուխն այնպես խառնվեց՝ կոշկի մասին մտածողն ո՛վ էր: Այնպես որ, բավականին ուշ տարա: Արտաշը փոխեց, դեռ 10 կտոր էլ օճառ ու 10 տուփ «Աստրա» տվեց: Ասաց գիտի, որ Շուրան էլ է ծխում...Հետո ավելացրեց.

- Երկու օր առաջ երազումս տեսել եմ Սպարտակին: Իբր եկել էր, ու տղերքն ուրախությունից նրան ձեռքների վրա վեր-վեր էին թռցնում... Իմ երազները կատարվող են, գիտե՞ս, ինքս կենդանի կլինեմ, կտեսնեմ թե ոչ՝ բայց նա մի օր անպայման երեւալու է, կտեսնես... Որքան էլ ուշանա՝ հույսդ չկորցնես:

Աստված քեզ շա՛տ պահի, Արտաշ տղա: Դու ոտից գլուխ բարություն ես:

25.04.1995



Վերջին մի քանի օրում մեր ու դիմացի շենքից 17 ազատամարտիկ զոհվեց: Նրանցից միայն 4-ն էին հասցրել ամուսնանալ: Աստված ինչպե՞ս է հանդուրժում նման ողբերգությունը: Ու թե մե՛նք ինչպե՞ս ենք դիմանում սրան: Խելագարվել կարելի է: Թեեւ իմ որդին էլ անհայտ կորած է եւ ո՛վ գիտի՝ ինչ վիճակում, մեկ է, դժվար է նայել զավակի անշունչ մարմնի վրա մազերը փետող մորը:

27.04.1994



Այսօր, ժամը 3-ին մոտ, մեր բակում հայտնվեցին պետավտոտեսչության 9 ծառայողներ՝ տեսչության պետ Վլադիմիր Թարխանյանի գլխավորությամբ: Իսկույն հասկացա, որ մեր տուն են գալիս: Սիրտս թփրտաց տեղում... Ուրեմն՝ Սպարտակից ինչ-որ լուր են ստացել...

Եկել էին խնջույքի համար անհրաժեշտ ամեն ինչով, ու դա էլ պատճառ եղավ, որ աչքներս չկտրենք Վոլոդյայից...

Իսկ նա շփոթված ասաց.

- Գիտեմ, ինչ անցավ մտքներովդ, բայց... կներք, պարզապես եկել ենք նախօրոք շնորհավորելու ձեր Չաղթանակի տոնը: Մայիսի 9-ին տեղի է ունենալու առաջին շքահանդեսը, դե, մենք էլ մտածեցինք՝ բոլորս այնտեղ ենք լինելու, Սպարտակը՝ ոչ, գնանք ծնողներին տեսնենք, կրծքանշանն էլ փոխենք, ահա, տեսեք, սա նորն է՝ հայկականը...

Շուրան էլ թե՛ եկեք պայմանավորվենք, որ դա կանենք, երբ Սպարտակը վերադարձած կլինի, թող ինքն իր ձեռքով դա անի...

Նստեցինք, կենացներ խմեցինք: Նրանք մեզ հուսադրում էին: Շատ հուզվեցինք տղաների շնորքից եւ ուշադիր վերաբերմունքից:

3.05.1995



Այս հարցը չպիտի լիներ, բայց դե տալիս եմ. ինչո՞ւ ես մեր ուզածի հակառակն անում, Տեր աստված: Չորս ժամ առաջ կոտրված սրտով (իբր մինչ էդ կոտրված չէ՞ր) տուն եկա ու հիմա, երբ այս տողերն եմ գրում, ձեռքս իսկականից դողում է: Ակնադրյուրցի Ժորիկ Ղարամյանի և Սպարտակի քենակալ Վլադիմիր Ավանեսյանի հետ, որոնք նույնպես պետավտոտեսչությունում էին ծառայում, ես ու Շուրան գնացել էինք հերթական բանակցության ու հերթական անգամ ձեռնունայն վերդառնում էինք, երբ հենց ճանապարհին լսեցինք, որ ՆԳՆ-ի Արտաշը... մահացու վթարի է ենթարկվել: Մեքենայի գլուխն իսկույն շրջեցինք Շոշի կողմը:

Հասանք այն պահին, երբ Արմեն Իսագուլովը, գերեզմանափոսի պոնկին դրված դագաղի վրա կռացած, արտասուքն աչքերին՝ հրաժեշտ էր տալիս Արտաշին:

Բա չասե՞մ՝ ինչո՞ւ ես լավ մարդկանց շուտ տանում քեզ մոտ:

5.05.1995



Չէ՛, սա արդեն ոչ թե ողբերգություն՝ այլ գե՛րողբերգություն է: Եվ ինչպե՞ս դրան դիմանա ծնողի սիրտը:

...Բերդաձորցի մտավորական՝ դպրոցի տնօրեն Սերգեյ Դավթյանի Սասուն որդին էլ է մարտուն անհայտ կորել: Եվ ահա Ալիբալիի կողմերից Մամեդ անունով բանակցող մի թուրք հեռակապով մերոնց ապսպրեց հայտնել, որ տղան կենդանի է, եւ հայրը կարող է պայմանավորված ժամին ռացիայով խոսել որդու հետ: Նրանք իրոք խոսեցին միմյանց հետ, հայրը ճանաչեց որդու ձայնը: Սասունն ասաց, որ ոտքի մեկը ծնկից ցած վիրավորված է: Հայրը որդուն խոստացավ գերությունից ազատել: Խոստացավ, բայց չկարողացավ: Գորխման անունով գերի թուրք սպային հնարավոր չեղավ փոխանակել Սասունի հետ...

Ժամանակ անց հայտնի դարձավ, որ մարզային հիվանդանոցի դիարան է բերվել ութ ազատամարտիկի դիակ, եւ ոնց որ թե նրանցից մեկը Սասունը լինի... Հայրը գնաց «ճանաչման»: Տղաների մարմիններն ահավոր կերպով այրված էին, դեմքերն՝ անճանաչելի: Սերգեյի սիրտը չդիմացավ, նա ուշագնաց եղավ: Աճյունով դագաղը հասցրեց Բերդաձոր, բայց անորոշությանը չդիմանալով՝ գիշերը բացեց այն, ստուգեց դիակի... ատամնաշարը:

Բանն այն էր, որ ժամանակին Սասունի վերին ատամնաշարից չորս ատամ հանել էին: Իսկ այ դիակի ատամները լրիվ տեղում էին... Ցնցված հայրն այդ մասին հայտնեց ուր եւ ուն պետք է, եւ այնտեղից խոստացան շարունակել անհայտ կորածի որոնումները:

Այս պատերազմը սանձազերծած Ադրբեջանը ե՞րբ ու ինչպե՞ս է պատասխան տալու արցախյան գողգոթայի համար:

12.05.1994



Վերջապե՛ս... Թուրքը հանձն առավ իր պարտությունը: Ափսոս միայն, որ կնքվողը հրադադար է, ոչ թե հաշտության պայմանագիր: Փխրուն մի խաղաղության տեր ենք դառնում, բայց ոչինչ, ագրեսորն արդեն ճաշակեց հայի բազկի ուժն ու ծանոթացավ նրա մտքի եւ ոգու ներուժին: Հասկացավ, որ հայը կարող է այսպես կոչված՝ ադրբեջանական ֆակտորի դեմ դնել իր՝ «հայկական գործոնը» եւ ստիպել. որ նա հրադադար խնդրի...

Ի՛նչ երջանկություն. այլեւս զոհ չենք ունենա: Մնում է, որ մեր տղաներին էլ ազատենք ադրբեջանական բանտերից... Այդ ժամանակ միայն կարելի է հանգիստ շունչ քաշել:

15.05.1994



Տղաների հարցով ՆԳՆ հաճախելով՝ ինձ նման շատերի (բախտակիցների) հետ եմ ծանոթացել: Տառապում ենք նույն ցավով, անհանգստանում նույն խնդրով, եւ դա արագ մտերմացրել է մեզ: Հիշում եմ, թե օրերից մի օր ուշադրությունս ինչով գրավեց կանանցից մեկը, որի անունը, պարզվեց, Անտիկ է: Նա մյուսներից մի կողմ քաշված՝ հա՛ տ ու առաջ էր քայլում՝ մրմնջալով. «Մադար գյուղարս...մադար գյուղարս»: Անվերջ-անդադար: Հասկանալ նրան դժվար չէր. իմ մանչ զավակն էլ է մեկը...

Չէ, այսպես ո՞նց կլինի: Մի բան մտածել է պետք: Պատերազմը նոր է ավարտվել, գուցե ադրբեջանական կողմը խելքի կգա եւ ազատ արձակի ռազմագերիներին: Ի վերջո, ամեն պատերազմից հետո էլ այդպես են վարվում կողմերը: Տեր Աստված, իրոք խելքի բեր նրանց, մեղք ենք:

4.08.1994



Վաղ առավոտյան մեր տուն զանգեց մի տղա ու ներկայանալով մականվամբ՝ ՅՈՐ-ի Ավագակ, հայտնեց, որ գնացած է եղել բանակցությունների, ու երեք սադախվեցիներ՝ Ջամալ, Քյամալ, Սաֆար, տվել են ստեփանակերտցի Սպարտակ Գրիգորյանի անունը... Նրանք Ավագակին հայտնել են նույն տեղեկությունները, ինչ ժամանակին ինձ՝ Աբրիկը:

- Ջամալն ասաց՝ Սպարտակին Բայիլից տարել են Շուվեյան ու նորից ետ բերել, Ադրբեջանի ՆԳ նախարար Ռամիլ Ուսուբովի «ձեռքի տակ» է,- հեռախոսով պատմում էր Ավագակը (իսկական անունը՝ Բորիկ), որն անհայտ կորած ստեփանակերտցի Բենիկ Այվազյանի եղբայրն է:

Ուրեմն՝ դեպի Մեծ Այրում, որպեսզի այնտեղից էլ՝ Սադախլո...

Իմ ու Շուրայի ուսերին ասես թելեր բուսած լինեն: Ինչ հրաշալի բան է հույսը:

6.06.1995



Մեծ Այրուճում եմ: Մի անճնճան կին է ինձ «տիրութիւն անում»՝ Պայծառը: Մեծ Այրուճի գլուղապետն է: Նրա նճնճների մասին է ասվաճ «տղամարդ-կին»:

Սպարտակի հաշվով առանճնապես շոշափելի արդիւնքի չենք հասնում, բայց դարաբաղցի մի ուրիշ տղայի մասին եմ հստակ տեղեկութիւն ստանում՝ Նելսոն Մնացականյանի: Բանակցութիւնների հետ կապ չունեցող մի թուրք է մոտենում ինձ Սադախլոյում եւ ասում՝ եթե խնդրեմ, չանախչեցի «դոխտուր ժամիկին» կհայտնե՞ք, որ իր Նելսոն տղան ինձ մոտ է: Եթե ուզում է ստանալ նրան, կտամ, բայց ոչ փոխանակութեամբ՝ փողով...

Վերադարճել եմ, լուրը տեղ հասցրել, բայց ինճ թվաց, թե նրանք չհավատացին:

12.06.1995



Պրիմակովը եկավ Ստեփանակերտ: Եկավ ու 78 թուրք ռազմագերու տարավ իր հետ՝ հարազատներին հանճնելու: Եկել էր բարի եւ աննախադեպ նախաճեռնութեամբ՝ «Բոլորը՝ բոլորի հետ» կարգախոսով փոխանակութեան համար, կասկաճում եմ, սակայն, թե հակառակորդ կողմը նույնքան ազնիվ կգտնվի եւ իրոք հանճնի բոլոր հայ գերյալներին՝ ինչպես դա արեցին մենք:

21.03.1996



Տեղին էլ կասկածում էի: Մերոնց վերադարձին նախ բավականին ուշ, հետո էլ՝ մաս-մաս. ապրիլի 16-ին՝ 16 հոգու, 17-ին՝ 14 հոգու, այսօր՝ ապրիլի 18-ին էլ՝ 13 հոգու: Ընդամենը՝ 43: Ու վե՞րջ: 78-ն ու՛ր՝ 43-ն ուր: Մեր 239 ռազմագերիներից միայն այդքանի՞ն: Էլ ի՞նչ «բոլորը՝ բոլորով»: Թուրքն այդպիսին եղել է, այդպիսին էլ կմնա՝ խարդախ ու խորամանկ: Բայց ռուսնե՞րը: Մինչեւ ե՞րբ են նրանք ականջ կախելու թուրքական կեղծիքի առջեւ:

18.04.1996



Էլի՞: Այս ի՞նչ է կատարվում... Հիմա էլ Արզու Աբդուլլաեւան եկավ Ստեփանակերտ ու հասավ հայկական կողմից թուրք գերյալի միակողմանի հանձնման: Սա ի՞նչ բազար է... Ինչո՞ւ մեր տղաներին ազատող չկա: Երանի՛ այն տղայի մորը, որին տարավ այդ Արզուն: Պայթում են, ուղղակի պայթում: Ինչքան ասում են լաց չլինեն, չի ստացվում: Ես չե՛մ ասում՝ թուրքին ետ չտան, բայց թող մեր կո՛ղմն էլ հասնի նրան, որ գլխի դիմաց գլուխ վերադարձնեն: Թեկուզ դիակը տան՝ բայց տան: Այսպես ո՛նց կլինի՝ մենք հա մարդասիրություն անենք, իրենք մնան նույն չկամը:

4.11.1996



Ինգան մի քանի օրից պիտի ամուսնանա: Օժիտային պայուսակի համար ես ու Նինելը այսօր պտտվեցինք խանութներով՝ հարմարը չգտանք, գնացինք շուկա: Այնտեղ մեկը մատնացույց արեց մի կնոջ, ասաց՝ Սադախլոյից ապրանք է բերում, հարցրեք, անունը Ռիտա է: Ռիտան անբարեհամբույր տոնով կարճ կտրեց՝ չունեմ: Ասացի՝ ցավդ տանեմ, անհայտ կորած տղայի քրոջ հարսանիք է, օժիտի համար եմ ուզում, գուցե կարողանաս ճարել... Միանգամից փոխվեց, «խեղճացավ», ասաց՝ ես էլ եմ անհայտ կորած ունեցել ու լավ եմ հասկանում ձեզ, աստված տա՝ դուք էլ գտնեք ձերին, թեեւ... Թեեւ ինչ՝ չբացատրեց, բայց երբ գնացինք իրենց տուն ու տեսանք գտնված աղջկան՝ Ալբինային, հասկացանք ամեն ինչ:

Աղջիկը, որ այն ժամանակ՝ 1990 թվականին, ավելի շուտ աղջնակ էր, կորել էր Բաքվի հայկական ջարդերից մոր հետ փախչելու (Ղարաբաղ գալու) ճանապարհին. պահ որսալով՝ թուրքերը նրան առեւանգեցին: Ռիտան 7 տարի շարունակ աղի արցունք էր թափում դստրիկի համար, Ռուսաստանում ապրող եղբայրներին աղաչում գտնել նրան. «Գոնե դիակը... Վրան լաց լինեմ՝ թաղեմ»: Բարեբախտաբար, դիակի փոխարեն գտնվեց կենդանի Ալբինան:

Աղջիկը դժվարանում էր խոսել հայերեն: Ոչ գոյականներն էր հոլովում, ոչ բայերը՝ խոնարհում... Բայց մեկ է, մայրը, բնականաբար, երջանիկ էր, որ գտել է նրան:

Թող այդպես, թող ավելի՛ վատ վիճակում՝ բայց ես էլ իմ զավակի՜ն գտնեմ: Համաձայն եմ: Երագում եմ: Տառապում եմ: Կարոտում եմ:

2.03.1997



Երեք օր առաջ աղջիկս անուսնացավ: Առանց հարսանիքի: Ինչպե՛ս էի երագում նրան մեծ շուքով հանել տնից: Սրտինս սրտունս մնաց:

10.03.1997



Հենց նոր զանգեց Ինգաս: Ասաց՝ երագում եղբորն է տեսել, թուֆ էր մեկնում իրեն՝ ինքն էլ ուտում էր:

Հարեւանիս պատմեցի (երագներից հասկանում է), ասաց՝ եթե նորահարսն է երագում թուֆ ուտում, ուրեմն՝ հղիացել է:

Մի՞թե իրոք թոռնիկ եմ ունենալու: Մեր հակինկաց, Տեր Աստված, Սպարտակիս էլ որ տուն բերես, քո հավիտենական ծառան եմ:

8.04.1997



Պատրաստվում եմ Մոսկվա գնալ, այնտեղից էլ՝ Նովոսիբիրսկ: Թուրքի հետ բանակցության: Միջնորդի անունը Դոխլան է, իսկ նրանն, ով պետք է կոնկրետ զբաղվի Սպարտակին փոխանակելու գործով՝ Ֆազիլ:

Գիշերը երազ տեսա՝ ընկել էի հողե խոր ու հսկայական ձագարի մեջ՝ ելնել չէր լինում: Հանկարծ հայտնվեց մի մտոցիկլիստ եւ ինչպես կրկեսում է լինում՝ ինձ վերցրեց ու մեքենան պատերով շուրջանակի վարելով՝ հանեց փոսից: Գուցե դա նշան է, որ այս անգամ հասնելու եմ նպատակիս...

24.04.1997



Այս մի գրառումը շատ ընդարձակ է լինելու, բայց ուրիշ ճար չկա: Այնքան շատ բան կա կուտակված հոգուս մեջ՝ կապված այս վերջին ուղեորության հետ, որ եթե թղթին չհանձնեմ, կտրաքվեմ ներսից: Բաներ կան՝ անգամ Շուրային չեմ ուզում պատմել՝ հոգին ավելորդ տեղը չբրքրելու համար: Այդպիսի դեպքերում փրկիչս դառնում եմ թուղթն ու գրիչը:

...Ապրիլի 25-ին արդեն Երեւանում էի եւ պետք է նստեի օդանավ, բայց ձեռքիս եղած որոշ իրերի

պատճառով քարուկապի դեմ առավ թռչելու: Թույլ տալու համար ստվերային 100 դոլար պահանջեցին ինձնից: Եվ դա այն բանից հետո, երբ բացատրել էի, թե ուր եմ գնալու եւ ինչու... Մի կերպ, սրան-նրան խնդրելով հանգանակած գումար կարմոտս, որին ձեռք տալ չէի կարող. դա թուրքական կողմի պահանջած փրկագինն էր... Կարճ ասած, մեկ ուրիշ՝ աղջիկ ուղեւորի հետ Թբիլիսի տանող տաքսի նստեցի: Հայ-վրացական սահմանի մոտ տաքսիստները, երկուստեք ճաանապարհը կրճատած լինելու համար, փոխանակում են ուղեւորներին: Տեղափոխվեցինք մի մեքենա, որի «վրացի» տաքսավարը ադրբեջանցի դուրս եկավ: Ուրքերս դողում էին նստած տեղումս: Հարցրեց՝ ինչո՞ւ եմ Մոսկվա գնում, ասացի՝ ճակատագրական հիվանդ եմ, ոչ-ոք չունեմ, վիրահատվելու եմ գնում: Հավատաց թե ոչ՝ չգիտեմ: Օդանավակայանում չկարողացա անցնել ստուգման կետով. հետս ահագին ոսկի էլ կար: Ստիպված էի տաքսիստին խոստովանել իրողությունը: 15 գրամանոց ոսկե մի մատանի մեկնեցի նրան ու խնդրեցի օգնել: Ձեռքս ետ հրեց՝ ասելով՝ էդ կարգի դարդի հետեւից ես գնում, այ բաջի, բա ալլահը ինձ չի՞ պատժի, մա՞րդ չե՞մ, հիմա էլ հո կռիվ չէ... Կօզնեմ, արխային կաց: Եվ իրոք օգնեց:

Չիմացա էլ ինչպես Մոսկվայից Նովոսիբիրսկ հասա: Մինչեւ լուսանալը դեռ մի քանի ժամ կար:

Օգնեցի հավաքարար պառավին, ինձ խղճաց, իր տուն տարավ: Ձեռքիս եղած համարով զանգեցի Դոխլանին՝ իմանա, որ արդեն տեղում եմ, ասաց՝ ուշացել ես, Ֆազիլը 2 օր սպասելուց հետո մեկնել է Նովոսիբիրսկից, գնացեք Պերեսլավլ, այնտեղ կհանդիպեք:

Նորից Մոսկվա: Որտե՞ղ է այդ Պերեսլավլը: Մոսկվան մե՞ծ, ես՝ Թումանյանի Գիքորը... Գիշերն անցկացրի կիսակառույց շենքի մոտ ընկած, հսկա տրամագծով մի խողովակի մեջ: «Ապահովության համար» երկտող էի գրել, որ ստեփանակերտցի այսինչ-այնինչն եմ եւ այստեղ եմ հայտնվել անհայտ կորած ռազմագերի որդու՝ Սպարտակ Գրիգորյանին որոնելու համար: Որպեսզի եթե տեղում, ով գիտի, ինձ հետ հանկարծ որեւէ բան պատահի (չորս կողմը բռնժերով լիքն էր), ոստիկանությունն իմանա ուր հայտնել:

Քայլում եմ: Կանանց խումբ: Ծիծաղ, բացականչություն. «Վա՛յ մամա ջան, իսկական խոխմա»: Հայերեն: Մոտենում եմ. «Ես Ղարաբաղից եմ...»: Չեն զարմանում, նույնիսկ կարծես թե առանց բացատրության հասկանում են ինձ: «Այստեղից ոչ հեռու, Կետչեւսկայա փողոցի բարձրահարկ շենքում, ղարաբաղցի մի ընտանիք կա՝ Ստեփանյան Մարտին եւ Իննա: Լավ մարդիկ են, կօգնեն ձեզ»: Ջանգեցին այդ Իննային: Երբ շենքի մոտ հասա, նա արդեն ցածում սպասում էր ինձ:

Ոչ թե լավ, այլ ուղղակի հրաշալի մարդիկ են: Այնպես ջերմ դիմավորեցին ինձ եւ այնպե՛ս են հոգ տանում իմ մասին: Համարյա նորածին երեխա ունեն: Մեկ սենյականոց բնակարան է, մի ընդարձակ, մահճակալ: Մարտինն իջել՝ հատակին է քնում, ես՝ Իննայի հետ: Որքան դիմադրեցի՝ բան չստացվեց: Ուզում էի որպես երախտագիտության նշան ոսկե շղթա նվիրել Իննային, վիրավորվեցին: Չէ՛, իրոք աննման մարդիկ են: Աստված նրանց սերն ու համերաշխությունը բազմապատկի, ունեցածի մեկն էլ հազար անի:

Բա ասում են՝ հրաշք չի լինում... Մարտինի մայրը զանգեց Ղարաբաղից, թե՛ «մեր գառնաքարցի՝ քո էլ ընկեր Ռաֆիկի զոքանչ Վերան կորել է: Իր անհայտ կորած զինվոր տղայի հաշվով Մոսկվա պիտի եկած լինի, բայց արդեն քանի՛ օր է՝ լուր չկա նրանից: Նեղված հարազատները չգիտեն ինչ անել, չե՞ս կարող էդտեղ որեւէ բան պարզել»: Հրաշք չէ, բա ի՞նչ է: Ախր ո՛վ կարող է պատկերացնել նման զուգադիպություն: Երեւի այս աշխարհում պատահական ոչինչ չի լինում: Մարտինն ինձ ճանապարհում է Յարոսլավլ, որտեղից էլ ավտոբուսով պիտի գնամ Պերեսլավլ:

...Դոխլանն ասել է Ֆազիլի հասցեն, մտապահելն էլ հեշտ է. Մենդելեևի 7, բնակարան 7: Ինձ ընդունում են նորմալ: Ի վերջո՝ փրկագնի հարց էլ կա...Երեք եղբորով տեղի օդու գործարանում են.

Յուրան՝ տնօրեն, Նազիմը՝ փոխտնօրեն, Ֆազիլն էլ արտադրամասի պետ: Կին ու երեք երեխա ունի Ֆազիլը: Երեք անգամ միջքաղաքային հեռախոսակապով կապվում է Բաքվում «խնդրով» զբաղվող անձանց հետ: Այնտեղից ասում են՝ Ղարաբաղից Սպարտակ անունով երկու գերի զինվոր կա բանտում, մեկը Մարտակերտի շրջանից է, մյուսը՝ Ասկերանի: Ասկերանցու ազգանունը Գրիգորյան է: Նրանք պայմանավորվում են, որ Ֆազիլը վաղը կմեկնի Բաքու՝ Սպարտակին տեսնելու եւ փրկագնի ու վերադարձի պահով վերջնականորեն պայմանավորվելու: Ես գնալ-գալու համար նրան 600 դոլար եմ տալիս, ինչպես նաեւ ստուգիչ երեք հարց, որպեսզի Բաքվում տա Սպարտակին ու պատասխանը բերի...

Հաջորդ օրը գնացի նրանց տուն՝ իմանալու՝ արդեն հասե՞լ է Բաքու, զանգե՞լ է այնտեղից, բա՞ն է հայտնել թե՞ ոչ... ու հանդիպեցի տիկնոջ մռայլ հայացքին: «Արի ներս գնանք, կասեն», - կարճ ասաց նա՝ վախ ներարկելով ինձ: Ներս մտա՝ ի՞նչ տեսնեմ. Ֆազիլի դեմքին սաղ տեղ չկա՝ այտուցներ են ու կապտուկներ... Ինչ-որ անձինք նրան ծեծջարդ են արել, սպառնացել՝ թե ուզում ես գլուխդ ուսերիդ մնա, ձեռք քաշիր այդ գործից: Նա ինձ ետ տվեց փողս... Վա՛յ իմ սեւ բախտ:

Ո՛ւր գնամ, գլուխս ո՛ր քարին տամ: Ֆաստով քաղաքը մոտիկ է, Կիելի մարզում, տալս՝ Նորան,

այնտեղ, զնամ ֆաստով:

Տալոջս անուսինը՝ Պյոտր Իսաելիչ Կարապետյանը բժիշկ է, հարգված մարդ: Սոտ մի ամիս մնում եմ նրանց տանը, մտածում եմք էլ ինչ անել, ո՞ւմ դիմել՝ ինձ օգնելու: Մի օր էլ նա ասում է՝ Սերժ Ջիլավյանի մասին լսած կա՞ս, նա հիմա այստեղ է, գո՞ւցե զնանք մոտը: Ջիլավյանի առաջարկից քիչ է մնում խելքս կորցնեմ, ասում է՝ կարող է օդանավ վարձել եւ ինձնով հնդկացորեն ու շաքարավազ ուղարկել Ղարաբաղ... Ես ինչի՞ համար եմ հազարավոր կիլոմետրեր կտրել, սար ու ձոր ընկել, ինքն ինչի մասին է խոսում: Պյոտր Իսաելիչը փորձում է հանգստացնել ինձ. “Успокойся, Вера джан, он же не хотел обидеть тебя! Просто предложил то, что в силах делать”. Ինձ մի կերպ հավաքում, հնարավորինս հանգիստ ասում եմ՝ ես ի վիճակի չեմ անել դա, իմ խնդիրն ուրիշ է, պիտի փորձեմ Բաքվի հետ կապվելու նոր ուղի, նոր կապեր փնտրել:

Հիմա, երբ տանն եմ եւ գրում եմ այս տողերը, ինքս էլ եմ դժվարանում հավատալ, որ կարողացա նման ռիսկի դիմել: Թեեւ...եթե պետք լինի ավելի եւս մեծ ռիսկի դիմելու, գիտեմ՝ կդիմեմ, մինչեւ աշխարհի ծայրն էլ կզնամ՝ միայն թե գտնեմ, տուն բերեմ որդու:

20.07.1997



Բախտակիցներիս մեր տուն գալն են հիշել ու նորից ձեռքս առել գրիչը: Եկել էին «ինձ տեսնելու»: Նրանց հայացքներում հույս կա ծվարած: Գիտեմ՝ ինչ են մտածում. եթե Վերային հաջողվել է անգամ կես քայլ առաջ գնալ որդուն գտնելու հարցում, ուրեմն՝ իրենց էլ կժպտա բախտը... Տառապյալներս, սիրելիներս, ես ձեզ ի՞նչ ասեմ, ինչպե՞ս ասեմ, որ չհիասթափեցնեմ ձեզ, ախր չի կայացել այդ քայլը, չար մարդիկ խանգարել են: Ինչպե՞ս խոսեմ, որ չկորցնեք ձեր հավատը, ախր դա է մեզ պահում ոտքի վրա: Հավատն առ այն, թե մի օր, այնուամենայնիվ, կտեսնենք մեր զավակներին: Ժենյա Մայիլյանը, Արփեն Մեիրաբյանը, Կարո Սարգսյանը, Լարիսա Սաֆարյանը, Գերասիմ Բաղդասարյանը... աչք ու ականջ լարած՝ ինձ են սպասում, իսկ ես չեմ կարողանում բացել բերանս: Արցունքները խեղդում են ինձ, սիրիրա-ուկրահնական հեռուներում անցկացրածս ահավոր օրերն են հիշում, եւ ետին թվով այնպե՞ս խղճում ինձ: Ես հոքարից չե՛մ, ինչքա՛ն կարելի է համբերել, դիմանալ: Ի վերջո մի կերպ հաղթահարում ինձ՝ սկսում եմ պատմել ողիսականս... Հրաժեշտին նրանք ինձ են սիրտ տալիս, ես՝ նրանց. ուրիշ ճար չկա, պետք է նորից համբերենք ու տոկանք: Համ էլ այսպես չի լինի, այսպես բանի չենք հասնի, հարկավոր է կազ-

մակերպություն ստեղծել՝ անհայտ կորած ազատամարտիկների հարազատների միություն, որպեսզի իրոք կազմակերպված զբաղվենք մեր ցավ ու խնդրով: Թե չէ սա ի՞նչ է, հավաքվելու տեղ էլ չունենք, որ քննարկենք, կանոնակարգենք մեր հարցերը: Թվում է՝ վատ գաղափար չէ...

21.07.1997



Այսօր իսկ հետամուտ եղանք գործին: Ավելի ճիշտ՝ կոլեկտիվ մտահղացումը գործի վերածելուն: Հարցը պաշտոնական հարթություն տեղափոխելու առիթ կար. Սպայի տանը հանդիպում էր կազմակերպված նոր քաղաքապետ ընտրված Կարեն Բաբայանի հետ, որը մինչ այդ ՆԳՆ նախարար է եղել: Էլ ո՞ւմ՝ եթե ոչ հենց նրա հետ արժե քննարկել նման հարցը: Փառք աստծո, նա հավանություն է տալիս, եւ որոշվում է, որ մեզ երկու սենյակ կհատկացվի հեռուստառադիոյի... ավերված մասնաշենքում: Ավերված է թող ավերված լինի, ընդհանուր ուժերով կարգի կգցենք, բա ձեռքերն ինչի՞ համար են:

22.07.1997



Երկու համաժողով արեցինք՝ քննարկելով ապագա կազմակերպության կառուցվածքը, գործունեության նպատակները եւ ուղղությունները, վերջապես՝ կարգավիճակն ու կանոնադրությունը: Հիմնադիր համագումար է պետք հրավիրել:

10.08.1997



Շոգ օգոստոս է: Բան-ման են առել, պահածոյացնում էի, եկան բախտակիցներս ու թե՛ հայդա, գնում ենք համագումարը նախապատրաստելու, միության նախագահ էլ որոշել ենք ընտրել քեզ: Շփոթվեցի: Ախր դա ռիսկի հարց է, կկարողանա՞մ, արդյոք, գլխավորել մի ամբողջ կազմակերպություն: Կարող ես, կարող ես, մեր միջի ամենահամարձակն էլ, գործունյան էլ, պարզ երեւում է, դու ես, այնպես որ քննարկելու խնդիր չկա, պատրաստվիր...

15.08.1997



Չեմ էլ հավատում, թե ամեն ինչ արդեն հետեւում է մնացել: Ինչ դժվար բան է այդ համագումար կոչվածը: Այսօր այն հավաստեց Արցախում եւս մի հասարակական կազմակերպության ծննդի մասին՝ ԼՂՀ անհայտ կորած ազատամարտիկների հարազատների միության: Ժամանակն է արդեն լինվին լծվել կազմակերպության գրասենյակի վերանորոգմանը...

17.08.1997



Այսօր մեզ հանձնվեցին արդարադատության նախարարության հաստատած՝ ԱԿԱՅՄ վկայականն ու կանոնադրությունը: Այսօր գրվեց վարչության անդամների կազմը հաստատող մեր առաջին հրամանը: Տեր Աստված, որքա՛ն շատ բան կա անելու: Գլո՞ւխ կհանեն:

10.10.1998



Համարյա մի տարի կլինի՝ տետրս չեմ բացել: Կանոնավոր գրել չի ստացվում: Ոչ ժամանակն է հերիքում, ոչ էլ շատ դեպքերում տրամադրությունը: Վազվզուքը մի կողմ, բայց երբ նախագծած

արդյունքին չես հասնում, եղածը հազիվ մոտե-
նալն է, չարանում ես աշխարհի վրա էլ, քո վրա էլ:
Պարզվում է, կազմակերպություն վարելն այնքան
էլ հեշտ բան չէ: Միությանն անդամագրված արդեն
հարյուրավոր ընտանիքներ ունենք, ամեն մեկն իր
պահանջն է դնում... Բոլորի հետ նույն լեզվով ես
խոսում` քեզ չեն հասկանում, վիրավորվում են,
կեղծ խոստումներ տալն էլ անհմաստ է: Ախր կան
բաներ, որ ոչ միայն ինձնից են կախված, ավելի
շուտ` ինձնից չէ, որ կախված են: Կարճ ասած`
«մեջիցս ճղվում»` երկու կտոր են լինում «վերելի»
ու «ներքելի» միջել:

Բայց ասեմ, թե ձեռքս գործ չի բռնում` չէ՛, ընդ-
հակառակը` ձվադրման գնացող ձկան պես լողակ-
ներս քարին տալով` գնում են հոսանքն ի վեր...
Պարտականությունը բախտակիցներիդ պնդամբ
ստանձնել ես, ուրեմն բարի եղիր դիմանալ, հաս-
նել արդյունքի` համոզում են ինձ: Եվ կհասնեմ:
Գուցե ոչ ակնկալածի չափ, բայց կհասնեմ: Շու-
րան երբ մեկ-մեկ ինձ տեսնում է, չեն թաքցնի, բա-
րոյա-ֆիզիկապես հոգնած վիճակում, ասում է`
գուցե իզուր գլուխդ էդ ծանրության տակ դրիր,
բայց մեկ էլ ավելացնում` չէ, դու ուժեղ ես, կդիմա-
նաս, ես էլ քեզ կօգնեմ ձեռքիցս եկածով: Իսկ նրա
ձեռքով շատ բան է գալիս, տասից ավել արհեստի
է տիրապետում: Մեզ տրված խարաբախանա սեն-
յակներն այնպես ենք կարգի բերել, վերանորոգել,

որ տեսնողը զարմանում է: Չէ, բախտս բերել է, որ Շուրայի նման ամուսին ունեն: Քոռանամ, Սպարատակս էլ է հոր նման, ինքնաշեն զենքեր էր պատրաստում՝ քեֆդ գար: Տեր Աստված, այս ինչ են ասում, զենքից քեֆ գալը ո՞րն է, ախր զենքը մահվան գործիք է: Մեղավորը թուրքն է, նա՛ մեզ ստիպեց «սիրել» զենքը...

24.10.1998



ԱԿԱՅՄ մասին առաջին հեռուստահաղորդումը... Որպես նոր կազմակերպության ներկայացուցիչների՝ իմ ու վարչության անդամների հետ հարցազրույց անցկացրեց հեռուստալրագրող Նարինե Աղաբալյանը: Խելոք ու շնորհքով աղջիկ է, մեզ լավ է հասկանում: Ամուսինն՝ Էդմոնը, պատերազմում զոհվել է... Շատ ափսոս:

29.10.1998



Բախտակիցներով, նորաստեղծ կազմակերպության վարչության անդամներով հավաքվել էինք մեր տանը՝ մի գավաթ սուրճ վայելելու եւ մտածելու, նախագծելու, թե ինչից պիտի սկսենք գործը:

Առանց այն էլ մեր հոգիները տակնուվրա էին, կազմակերպության ղեկավարի դերն ինձ վստահեցնել մի կողմից էր լարված հոգեվիճակի մեջ դրել ինձ... Ինչեւէ: Մատուցեցի սուրճի գավաթիկները: Նրանք խոսում էին՝ սովորականից շատ դանդաղ (մտածեցի՝ երեւի հաճույքը երկարածգելու համար) օգտվելով տոնուսը բարձրացնող հաճելի ըմպելիքից: Ինքս դեռ ձեռք չէի տվել գավաթիկիս: Երբ վերջապես ինքս էլ տեղավորվեցի սեղանի շուրջ ու համտեսեցի սուրճը, «աչքերս ճակատս թռան»: Այն ահավոր...աղի էր: Հասկացա, որ շաքարավազի փոխարեն աղ եմ լցրել սրճեփի մեջ: Ընկերուհիներիս հարցրի՝ ձե՞րն էլ է այսպիսին: Ծիծաղեցին՝ գլխով հաստատական նշան անելով: Բարկացա՝ բա ինչո՞ւ ձայն չեք հանում: Ասացին՝ ի՞նչ է լինելու որ... թող մի անգամ էլ այսպես խմենք: Ինչ է, չե՞նք հասկանում, թե հիմա ինչ է կատարվում քեզ հետ... Ով էլ լինի, կհուզվի, կորցնի իրեն: Մի՛ մտածիր, ամեն ինչ լավ է լինելու, սարի պես կանգնած ենք թիկունքիդ, դու միայն ասա՝ ինչ անենք...

Խելք-խելքի տալով՝ կազմեցինք մեր առաջին աշխատանքային պլանը:

21.11.1998



Նորից Սաղախլոյուն էի: Նորից՝ Սպարտակի հետ կապվելու համար «կանալ» փնտրելիս: Եվ նորից՝ ապարդյուն ջանքեր: Բայց փոխարենը մեկ ուրիշի համար նորից ուրախալի լուր բերեցի՝ նույն Մնացականյանների... Թուրքն ինձ հաղորդեց Նելսոնի «հատուկ նշաններով» ապսպրանքը՝ հավատալու համար, որ ինքն իրոք ողջ է եւ սպասում է, թե երբ կգան ազատելու. «Ես ու մեծ մաման տան ոսկեղենը թաքցրել ենք պաղվալուն դրված մեջտեղի ուշատի ցորնի մեջ, իսկ զայիմն ու դոկումենտները՝ սարայի վառարանում: Տանը խարջելի փողն էլ երրորդ սենյակի մահճակալին դարսված՝ չօգտագործվող յորդան-դոշակի ծալքի մեջ է՝ բարձի տակ»:

Այս անգամ ծնողները լիովին հավատացին, որ խոսքն իրոք իրենց տղայի մասին է: Վստահ եմ՝ անպայման կգնան ազատելու:

10.12.1998



Նստել մտածում էի՝ այսպես չի լինի, մենք կամ կենդանի պիտի գտնենք մեր տղաներին, կամ էլ, քոռանա՛մ, նրանց դիակները: Կարող էր, չէ՞, որեւէ մեկը զոհված լիներ այնպիսի հանգամանքներում, որ մերոնք ժամանակին կարողացած չլինեն տեր

կանգնել դիակին: Պատերազմում ամեն ինչ էլ լինում է: Դիակի որոնումներ պետք է անցկացնել հատկապես այն վայրերում, որոնք առավել երկար են օկուպացված մնացել թուրքի ձեռքին:

Ինքս իմ մտածածից փշաքաղվելով՝ գլուխս դրել էի աշխատասեղանին, երբ զնգաց հեռախոսը: Ժորան էր Մարտակերտից: Նրա Կամո եւ Արմեն տղաներն էլ են անհայտ կորածների ցուցակում: Ասաց՝ Մարտակերտի մատույցներից մեկում բուլդոզերիստն աշխատելիս հողում դիակ է հայտնաբերել: Հասկացող մարդ է եղել, իսկույն ժորային հայտնել է այդ մասին: Թռա այնտեղ: Ոչ, մեր որդիներից չէր: Երեւի օրեր առաջ անձրեւ էր տեղացել, փոսիկներում դեռ քիչումիչ ջուր կար, ավերով հավաքեցինք, դրանով հող ու ցեխից որոշ չափով մաքրեցինք զոհվածի շորերը՝ բլուզից մնացածը, գլխարկը, կիսագուլպաները, կոշիկը (մյուսը ոտքին չէր), զինվորական գոտին եւ այլն: Մտածեցինք՝ գուցե դրանց ձեւից, գույն ու նախշից որեւէ մեկը կճանաչի իր զավակին:

Մարտակերտից եկել լվացվել՝ հող ու փոշուց ազատվել ենք: Շուրան մի կերպ քնով է անցել, իսկ իմ կոպը կոպին չի մոտենում: Վաղը նորից պիտի այդ շրջանը գնանք: Քնել, ուժ հավաքել է պետք, բայց ինչ անեն, երբ քունս չի տանում:

14.05.1999



ճակատս կտրվի, որ շան ճակատ է...Շատ ծանր բեռ են առել ուսերիս: Այսօր ծննդյանս օրն էր, իսկ ես՝ որտեղ էի եւ ինչ բանի...

Մեծ խմբով Մաղավուզի բարձունքներում էինք: Մեզ հետ էին ՆԳՆ Ստեփանակերտի քաղաքային բաժնից գնդապետ Միքայել Հայրյանը, հեռուստաօպերատոր Արտավազը, լրագրող նույն Նարինեն, անգամ Ազգային ժողովից կար ներկայացուցիչ: Շրջվարչակազմի ղեկավար Սեւակ Արծրունին մեքենա տվեց, որ մեզ տեղ հասցնի:

Ժամանակին ահավոր դաժան մարտեր են ծավալվել այստեղ: Եվ զոհեր ենք ունեցել, եւ անհայտ կորածներ: Մեկը մեզ՝ ԱԿԱՅՄ-ականներիս, հայտնել էր, թե կոնկրետ որտեղ պետք է որոնում իրականացնել...

Թեթեւ-ինչ հողով արված կամ ուղղակի քարերով ծածկված, ցեխոտ 5 դիակ... Արտավազն ուշադիր նկարահանեց կմախքի, հագուստի ամեն մի մասը, զոհվածին պատկանող առարկան, ամեն-ամեն ինչ: Մտածում ենք դրանք իդենտիֆիկացիայի տալ...

15.05.1999



Այսօր առաջին անգամ պետականորեն ու հանդիսավորությամբ նշեցինք ԼՂՀ Անհայտ կորած ազատամարտիկի հիշատակի օրը: Բարձր ներկայացուցչությամբ. երկրի նախագահ Ա.Ղուկասյան, Ազգային ժողովի նախագահ Օ.Եսայան /որը հանդես եկավ, պիտի խոստովանեն, ցնցող ելույթով, մեկ բան է, երբ մենք ենք խոսում մեր տղաների, մեր խնդիրների մասին եւ ուրիշ բան՝ երբ բարձրագույն պաշտոնյան է հրապարակավ եւ ի ականջ բոլորի՝ մեծի ու փոքրի, յուրայինի եւ օտարի (այդպիսիք էլ էին ներկա հանդիսությանը, օրինակ՝ ԿԽՄԿ ներկայացուցչությունից եւ այլն), պատերազմից 5 տարի անց ասում. «Մեզ համար պատերազմը չի վերջացել՝ քանի դեռ տուն չի դարձել մեր վերջին զինվորը»: Ջուզադիպորեն թե նախատեսված՝ հուշահամլիրում էին եւ Մոսկվայից ժամանած մեր տաղանդավոր դերասանը՝ Արմեն Զիգարխանյանն ու հեռուստատեսային «Կինոճանապարհորդությունների ակումբ» հեռուստահաղորդաչարի հեղինակ ու վարող Սենկելիչը: Նրանք նկարահանումներ արեցին եւ խոստացան, որ մեզ վերաբերող կադրերը «հում» վիճակում էլ լինի՝ կուղարկեն մեզ...

Սերժ Սարգսյանը մի մեծ ու գեղեցիկ ծաղկեպսակ էր ուղարկել. կարմիր մեխակներ, կենտրո-

նում՝ սպիտակներից կազմված խաչ ու սիրտ: Մեր մայրական ցավի հանդեպ ՀՀ ՆԳՆ եւ ԱԱ նախարարի նման ուշադրությունն ու հարգանքը ցնցել է յուրաքանչյուրիս: Աստված քեզ 100 տարվա կյանք տա, Մերժ ջան, դու բոլորից շատ ես հասկանում մեզ, շատ էլ օգնում:

29.06.1999



Գործերը շատ են, ես՝ վազվզուքի մեջ: Երեւան էլ են գնում-գալիս:

Քանի օր է՝ չէի եղել գրասենյակում: Այսօր եկա եւ սենյակիս դուռը բացելուց շեմին թափված լուցկու ձողիկներ տեսա: Ասես հատուկ շարված լինեին, մեկ գծի վրա...Հավաքեցի, աղբարկղը նետեցի:

Նոր էի տեղավորվել աթոռին, ներս մտավ մի երիտասարդ ու թե՛ լուցկուս հատիկներն ո՞ւր են, ի՞նչ եք արել: Ապշած իրեն էի նայում:

- Էդպե՞ս եք կազմակերպություն պահում, գիտե՞ք քանի օր են եկել-գնացել... Ամեն անգամ մի լուցկի են թողել, որ հաշիվը չխառնեն:

Բարկացա.

- Բայց դուք ո՞վ եք, որ հաշիվ եք պահանջում ինձնից: Գործուղման էի, չկայի:

Ներկայացավ.

- Իմ անունը Մաքսիմ է: Ես պիտի Ռուսաստան գնամ, 8 օր առաջ պիտի ճանապարհված լինեի, ձեզ չգտա՝ գնալս ձգձգվեց: Ես ադրբեջանական բանտում եմ նստած եղել: Բայիլում: Գլխովս անցածի մասին որ պատմեմ՝ կփշաքաղվեք: Շատ եմ տանջել: Ոչ միայն ինձ... Հա, երբ իմացա, որ այսպիսի կազմակերպություն կա, մտածեցի՝ գնամ հայտնեմ, որ մերոնցից էնտեղ դեռ կան, շատ կան: Թուրքի ասելուն էլ, պնդելուն էլ չհավատաք, մտածեցեք տղաներին ազատելու մասին: Ես էստեղ չեմ կարող ապրել, չորս երեխա ունեմ, առողջական խնդիրներ էլ... Լավ, ես գնացի: Մեղք եմ տղաները, աչքները հայրենիքի ճանապարհին եմ, ականջները՝ հարազատ ձայնի, մի բան արեք...

- Չէ, մի քանի րոպե էլ հատկացրու մեզ,-պահանջեցի ես,- պատմիր՝ ինչպե՞ս ես ազատվել...

- Երկար պատմություն է, կարճ ասեմ: Բանտապահներին մեկ-մեկ փոխում են: Եկած նորերից մեկը ինձ ճանաչեց. «Արա, Մախսիմ, էդ տո՞ւ ես»,- հարցրեց, երբ ես հերթական ծեծից հետո չէի կարողանում գլուխս հատակից բարձրացնել: Մի կերպ բաց արի աչքերս ու վրաս կռացած տեսա Աֆղանստանում ինձ հետ միասին կռված ընկերոջս... Ասաց՝ ձեռն չհանես, մի քանի օր «ծեռքիս տակ կնայեմ քեզ»՝ ուժ հավաքես, հետո կհաջողացնեմ կանալիզացիայով փախչես: Ելքի մոտ քեզ մեքենա է սպասելու... Կտանեն մոտեցնեն

սահմանին, դրանից դեմն արդեն դու՝ եւ հայի քո
աստվածը, ճակատիդ թե գրված է, գարդաշ, կանց-
նես ձերոնց կողմը: Էդպես են ազատվել: Թուրքի
մեջ էլ, ճիշտ է՝ քիչ, բայց մարդիկ կան:

Նա գնաց, իսկ ես, աթոռին կպած, չէի կարողա-
նում ուշքի գալ:

Որոշել են առավոտյան վարչության անդամնե-
րին հավաքել ու հայտնել (ինչպես միշտ) տեղի ու-
նեցածի մասին:

5.07.1999



Ի՛նչ լավ է տանը...Անգամ եթե տարիներ առաջ
ռումբի թողած հետքերն են դեռ բնակարանիդ
առաստաղին ու պատերին:

Նալչիկից են վերադարձել: Այնտեղ մասնակցում
էի «Մարդկանց առեւանգման, պատանդման ու
վաճառքի պրոբլեմները եւ իրավապաշտպան գոր-
ծունեության հեռանկարները» թեմայով երկօրյա
(հուլիսի 3-4) կոնֆերանսին: Այնտեղ իմ ելույթի
լեյտմոտիվը «բոլորին՝ բոլորով» կարգախոսն
Ադրբեջանի կողմից անտեսվելու փաստն էր: Ասա-
ցի ազգամիջյան հակամարտություններն էլ, պա-
տերազմներն էլ ի վերջո ավարտ են ունենում, եւ
այդ ավարտը պետք է սկսվի հենց ռազմագերիներ-

րին տուն արձակելուց, սակայն արդեն լրացել է մեր ու Ադրբեջանի միջև կնքված հրադադարի 5 տարին, իսկ մեր տղաները դեռ տառապում են ճաղերի ետև:

7.07.1999



Ցերեկվա պատահածից հետո չեմ կարողանում ուշքս գլուխս հավաքել: Այս էլ ինձ ապշահար անելու երկրորդ դեպքը:

...Նա մուտքից ներս մտավ ու թե՛ ճի՞շտ եմ եկել, ինձ «Անհայտ կորածների կոմիտեն» է պետք: Ներկայացավ «Լենա Սաֆարյան»: Հին Մարաղայից եմ, ասաց: Եկել եմ իմ աչքով մի անգամ էլ տեսնեմ մեր Ղարաբաղը: Թուրքի գլուխը թա՛ղեմ, մեզ ասում էին՝ էլ Ղարաբաղ չկա: Մոտերքում հո տղամարդ չկա...

Բարձրացրեց բլուզն ու մայկան: Աստված իմ, կրծքի պտուկները չկային: Ծխախոտով բազմանվազ այրել էին թուրքերն, ասելով՝ որ երեխա կերակրել չկարողանաս... Կոնքուհետույքին էլ՝ նույն այրվածադաջվածքով խաչեր...

1992 թվականի ապրիլի 10-ին Մարաղայի ողբերգության զոհերից էր լինելու, եթե դիակների արանքում ուշագնաց ու վիրավոր ընկած՝ անգիտակցաբար չչարժվեր, եւ թուրքերը չնկատեին

իրեն: Նկատեցին ու գերի տարան: Բազմաթիվ կտտանքներից հետո մի ծեր մարդ նրան խղճացել՝ տարել է իրենց տուն, որ հարմար պահը գալուց վաճառի Լենայի հարազատներին: Այդպես էլ ստացվել է: Կրասնոդարի երկրամասում ապրող եղբայրներին հաջողվել է դուրս գալ քրոջ հետքի վրա ու պատկառելի գումարով գնել:

Ես զանգեցի հեռուստատեսության ղեկավար Գարիկ Գրիգորյանին, որ օպերատոր ուղարկի՝ նկարահանելու Լենային ու նրա կրածի ապացույցները, բայց պարզվեց, որ ազատ կամերա չկա, օպերատորները շրջաններում էին: Փորձեցի գտնել լուսանկարիչ Ռուդիկին՝ գոնե նկարի, նա էլ քաղաքից դուրս թաղման էր: Լենան մեզ մոտ մնաց 3 ժամ: Հարցրեց՝ ձեր անհայտ կորածների թվում Ջարիֆան ու Նազիլյան էլ կան:

- Երբ մեզ Մինգեչաուրից տարել էին Բաքվի Վոլոդարսկին, միասին էինք:

Ասացի՝ մենք Ջարիֆա չունենք, ի՞նչ Ջարիֆա, Ջարիֆան թուրքի անուն է: Քիչ անց թանգարանի նկարները դիտելիս նա գոչեց. «Բա ասում եք՝ չունենք... Ահա՛ Ջարիֆան: Գիտե՞ք՝ ի՞նչ համարձակն է: Ես էլ՝ Նազիլյան»: Մատը դրել էր սկզբում Ջինա Գրիգորյանի, հետո էլ՝ Նադյա Բաղդասարյանի նկարի վրա: Մինչեւ հոգուս խորքը ցնցվել էի: Ուրեմն՝ Ջինան ու Նադյան ո՞ղջ են: Փա՛ռքդ շատ, Աստված, մեր հույսն, ուրեմն, անտեղի չէ, մենք ող-

ջեր ունենք այնտեղ, շատ ունենք: Պահիր նրանց,
Տեր, գուցե մի օր գազանների մեջ կարթնանա
խիղճը, եւ նրանք ազատ կարծակվեն:

15.07.1999



Մինչեւ այսօր կարգին ոչ ուտել եմ կարողանում,
ոչ խմել: Երբեմն հագուստս անգամ չեմ հանում:
Անընդհատ աչքիս առջեւն է Հասանդայայում տե-
սածս... Եվ այնուամենայնիվ, սրտիս խորքում
շնորհակալ եմ այն մարդուց (անունը տալ չեմ ու-
զում, հասկանում եմ, որ պետք չէ), ով հնարավոր-
ություն տվեց մեզ լինել այնտեղ: Մենք փաստա-
վավերագրական ֆիլմ ենք պատրաստում` այդ
նկարներով հանդերձ: Նպատակ ունեմ ռազմագե-
րիների ու պատանդների հարցերով զբաղվող
կազմակերպությունների ներկայացուցիչների հետ
հանդիպումների ժամանակ խոսել դրանց եւ մեր
անհայտ կորած տղաների մասին, այն մասին, թե
որքան անմարդկային է մեր հակառակորդը, որը
հնարավորություն չի տվել ու չի տալիս մարտա-
դաշտից հանել ու մարդավարի թաղել զոհերին...

20.08.1999



Ուտքերս տժժում եմ: Չախ ուտքիս թրոմբի ցավն արթնացել՝ ցավազրկիչով էլ չի անցնում: Ամբողջ օրը ուտքի վրա եմ եղել: Մարտակերտի շրջանում:

Երկու ամիս կլինի, զբաղված եմ տղաների կենսագրություններն ու մարտական կյանքին վերաբերող տեղեկությունների հավաքմամբ՝ յուրաքանչյուրի «անձնական գործն» ստեղծելու, քարտադարան հիմնելու նպատակով: Լինում եմ շրջափակումիսարիատներում, վարչակազմերում, գյուղապետարաններում. այցելում անհայտ կորած ազատամարտիկ ունեցող ընտանիքներին, հավաքում փաստաթղթերը, ճշտում տեղեկությունները...

Այնքան հոգնած եմ, որ անգամ լոգանք ընդունելու ուժ չունեմ: Հերն անիծած, առավոտյան կլողանամ, մաքրվեմ քրտինք ու փոշուց: Կարելորն այն է, որ գրեցի գրելիքս: Թողնեմ հետո-ին՝ կամ կմռանամ, կամ ով գիտի ինչ:

14.09.1999



Չորս օր Ումութլվում էինք: Այնտեղ է Շահունյանի շրջանի վարչակազմի ժամանակավոր նստավայրը:

...Հանդիպում ենք վարչակազմի ղեկավար Ռոբերտ Այդինյանի ու շրջանի գինկոմի հետ: Արխիվներից հանում-հավաքում եւ ճշտում ենք անհայտ կորած ազատամարտիկներ ու խաղաղ բնակիչներ ունեցող ընտանիքների տվյալները: Հաշվառում ենք, թե քանի երեխա կա նման յուրաքանչյուր ընտանիքում ու թե նրանցից ով ինչով է զբաղված: Այսինքն՝ շարունակում ենք լրացնել կազմակերպության քարտադարանը:

Պատուհանից երեւում է Սարսանգի կապույտ «հայելին»: Գունագեղ աշնան խաղաղ օր է, իսկ ինձ թվում է, թե պայթյուններ են լսում... ժամանակին այստեղ ինչպիսի՞ դաժան մարտեր են ընթացել: Թշնամին մինչեւ ատամները զինված՝ կատաղի գրոհներ էր ձեռնարկում Սարսանգին տիրանալու համար: Քանի՞-քանիսը զոհվեցին մերոնցից, հավանաբար՝ անհայտ կորածներ էլ եղան: Խնդիրն այնքան հեկը չէր, որքան՝ ջուրը. Թարթառի ջուրը, որ նախկինում բոլ-բոլ կենդանություն էր տալիս թուրքերի բամբակի պլանտացիաներին: Ձեր եփածն է, դե կերեք...

Մարմինս՝ ոնց որ ջարդված: Ճանապարհ գնալը

դժվար են տանում, բայց ինչ արած, գնալ պետք է. մարդկանց տեղերը պիտի իմանանք, որպեսզի մարդասիրական օգնությունը ճիշտ հասցեով տեղ հասցնենք:

26.09.1999



Երեկ ԼՂՀ մշակույթի նախարար Արմեն Սարգսյանը զանգեց. «Տիկին Վերա, կարո՞ք եք ձեր մեքենայով չորս հոգու տանել հասցնել Ուլուբաբ»: Մերժել չէի կարող. այս տարի մեր Հունիսի 29-ի միջոցառումը ինքն էր ղեկավարել, բացի այդ էլ՝ ինչո՞ւ մերժեմ, մեր մեքենան «ՈւԱԶ» է եւ հարկավոր դեպքում ի զորու է բարձրանալ անգամ սարերը: Շուրան նույնիսկ ուրախացավ. Ուլուբաբը նրա մոր ծննդավայրն է եղել... Ասում են «եղել». որովհետեւ ավելի քան երեսուն տարի է՝ այն լրիվ մարդաթափ է:

Սիրուն աշուն է, սեպտեմբերի վերջ: Արի ու տես, որ սարահարթը բարձրանալիս մառախուղը պատեց չորս կողմը, վաղուց մշտական երթեւեկող չունեցող, քարուքանդ ճանապարհն էլ տեղ-տեղ ջրաեւ ցեխափոսերով էր լի: Դրանցից մեկում մեքենան տնկվեց-մնաց: Հարկավոր էր ճյուղեր կտրտել, գցել անիվների տակ: Արի ու տես, որ մեր «փողկապավոր» հյուրերից երկուսը բնավ մտադիր չէին

ցեխտովելու: Տեսնում էի՝ Շուրան բարկանում է... Չորսից մեկը Երվանդ Միրզոյանն է՝ բացսիրտ ու կատակասեր մի մարդ, մեծ Հայրենականի իսկական մարտական հրամանատարներից է, որի մասին հենց պատերազմի ժամանակ բանակային թերթերն են գրել (միջանկյալ ասեմ, որ վախճանվելուց առաջ այդ մարդը հուշերի գիրք է տպագրել՝ «Իմ հարսանիքում ես չեմ պարել» վերնագրով): Հենց այդ Երվանդ Իսակովիչն էլ ինձ «պողոթերժկա» արեց. «Ճիշտ է ասում, էլի, տղերք, եթե ուզում ենք տեղ հասնել, բոլորս էլ պիտի իջնենք, մեքենան հանենք ցեխից»: Իջան, հանեցին, շարունակեցինք ճանապարհը: Ասացի, չէ՞, Ուլուբաբը վաղուց է լքված բնակավայր հանդիսանում, նրա բնակիչներից ոմանք քաղաք են գաղթել, իսկ մեծ մասն իջել-բնավորվել է նոր Նորագյուղում: Ինչո՞ւ ենք գնում այնտեղ: Չտվածս հարցի պատասխանն իմացա, երբ մեքենան հասավ մի կիսավեր եկեղեցու թե մատուռի: Պարզվեց՝ խմբում Հայաստանից ժամանած հնագետներ կան... Մնացածն արդեն հասկանալի էր ինձ:

Հոգնած ու չարչարված անգամ՝ դարաբաղյան աշունով չհիանալն անհնար էր: Հոնիները կախել էին կարմիրով բեռնված ճյուղերը, մոշենու արտասովոր խոշոր հատիկները դեռ հեռվից էին «աչքո մտնում», վայրի տանձի կաթուկի բուրմունքով համեմված էր օդը: Մի շիշ «քաշովի» օղի դրվեց մեջ-

տեղ, Երվանդ Միրզոյանը գրպանից հանեց մի վարունգ, միջից կիսեց, դանակով հանեց միջուկները՝ ու եղավ երկու «բաժակ», դրանցով էլ տղամարդիկ կիսավեր ու լքված հոգեւոր տան պատի մոտ դատարկեցին շիշը:

29. 09.1999



Շոգ օգոստոս է: Այսօր Հասանդայայում էինք: Նորից՝ որոնումների: Այստեղ մեր զոհերը, թերեւս, ավելի շատ են եղել, քան մեկ այլ վայրում: «Արաբո» ջոկատի 79 մարտիկներ այստեղ են անհայտ կորել... Նրանցից 30-ը Արցախից էին, որոնց թվում՝ ժորա Կարապետյանի ու Հենրիխ Մնացականյանի երկուական տղաները. առաջինի Կամոն ու Արմենը, երկրորդի Արտակն ու Սպարտակը:

Դեմարկացիոն գիծ ասացին թե ինչ...մի խոսքով՝ սահմանները միմյանցից բաժանող չեզոք գոտու տարածք պիտի մտնենք: Կանալի մոտ դիակներ կան: Բայց ինչպես գնանք, երբ դաշտն ականապատված է: Մեզ ականների տեղն իմացող հրամանատար են հատկացնում: Նա ժամանակին կռվել է այդ տեղերում, նաեւ ծանոթ է ականների տեղադրվածությանը: Տղամարդու լայն քայլերով, շախմատաձեւ առաջ ենք շարժվում շատ զգուշո-

րեն: Այս ու այնտեղ ցուցանակներ են տնկված՝
Осторожно, мина!

Տե՛ր Աստված, 17 դիակ: Գանգեր, ոսկորներ՝ վի-
րավորվածության, խոշտանգվածության պարզ
հետքերով: Մեկի ոտքին այրումով խաչ կա դաջ-
ված: Աչքերս մթնում են, գլուխս՝ պտտվում: Օպե-
րատոր չկա հետներս, եղածը լուսանկարչական
ապարատ է՝ նկարում ենք տեսածը: Ուրիշ ի՛նչ կա-
րելի է անել նման պայմաններում, երբ վստահ չես
անգամ՝ կհաջողվի՞ ականապատ դաշտով անվ-
նաս էլ վերադառնալ:

9.10.1999



Որոնողական աշխատանքը տանում է Գյուլլի-
ջայի, Ալիբալիի, Ֆիզուլիի կողմերը: Այս վերջինում
4 դիակ է հայտնաբերվել, ուզում էի իմ աչքով տես-
նել, գուցե ինչ-որ նշան լինի՝ ճանաչեմ որեւէ մե-
կին: Լեզուս չորանա, ախր Սպարտակս էլ է այդ
ուղղությունում կռվել... Իրարամերժ լուրերով բա-
վարարել չեմ կարող, գետում խեղդվողը ծղոտից
էլ է բռնում: Չեմ թաքցնում. եթե տղաս չկա, հաջող-
վի գո՛նե դիակը գտնեմ, տուն բերեմ...

Տուն են եկել ձեռնունայն: Մի կողմից էլ ուրախ
են, որ չեն ճանաչել ոչ-ոքի: Հույսը մեռնում է վեր-
ջինը...

11.10.1999



Սերժ Ազատիչն էր Ստեփանակերտում: Սպասում էինք ԱԿԱՅՄ նրա գալուն՝ ուշանում էր: Գիտենիք, որ դա «իրենից չէ», ինքը շատ պունկտուալ մարդ է: Անհանգստանում էինք, մեկ էլ զանգեցին, թե Երեւանում վատ բան է կատարվել, Սարգսյանը շտապ այնտեղ է մեկնել ուղղաթիռով: Երեկոյան միացրինք հեռուստացույցը եւ «Հայլուրով» ի՛նչ տեսանք. Ազգային ժողովի դահլիճում, ուղիղ նիստի ժամանակ, ինչ-որ սրիկաներ գնդակահարում են երկրի՝ այդտեղ գտնվող ղեկավարներին՝ Վ.Սարգսյանին. Կ.Դեմիրճյանին, մեր Լեոնարդ Պետրոսյանին եւ էլի մի մի քանի հոգու: Ի՛նչ ահավոր է: Հավանաբար, այդպես ենք տանուլ տվել ծովից-ծով Հայաստանը: Այս ի՞նչ ժողովուրդ ենք, հակասական ժողովուրդ. ճակատագրական վտանգի պահին միասնանում -բռունցք ենք դառնում, խաղաղ ժամանակ՝ մեր իսկ ձեռքով կտրում այն ճյուղը, որի վրա նստած ենք...

27.10.1999



Ոչ, եկել եմ այն եզրակացության, որ այս կարգի որոնողական աշխատանքը մեզ հաջողություն ապահովել չի կարող: Գտանք, հավաքեցինք, նմուշներ բերեցինք՝ հետո... Ի՞նչ օգուտ՝ եթե Ջայաստանում իդենտիֆիկացման լաբորատորիա գոյություն չունի: Մնում է նորից առաջնորդվել կենդանության վերաբերյալ լուրերով գնալ դրանց հետքերով:

Ջայի Աստված, ինչ մեզ համար չարեցիր այս տարիներին, արա մեր դուռն արդեն ծեծող 2000 թվականին: Ամեն:

28.12.1999



Մեր երեխաներից 120-ի համար առաջին անգամ նվերերով տոնածառ կազմակերպեցինք թիվ 3 դպրոցի դահլիճում: Ինչպիսի՜ բավականություն է տեսնել փոքրիկների աչքերում ճառագող ուրախությունը, երբ Ձմեռ պապը, գավազանը ձեռքին, խոսում-պարում էր նրանց հետ...

31.12.1999



Այս տարվա տոնածառն էլ շատ լավ անցավ: Ամանորը տոնեցինք հունվարի 3-ին: Նվերներն առատ էին, ուրախությունը՝ մեծ:

4.01.2000



Աշոտ Սարգսյանը եկավ ու թե՛ ի՞նչ եք նստել, վեր կացեք, գնում ենք Շուշի: Ի՞նչ կա: Ո՞նց թե ինչ, չե՞ք ուզում մկրտվել... Ուրախացանք: Ասացինք՝ բա կնքահայրն ո՞վ է լինելու: Թե՛ ինձ հավա՞նք չեք... Հավատադարձությանն ու դրա քարոզչության կարեւորությանը Աշոտը մեծ տեղ է տալիս՝ մեծ էլ ջանքեր հատկացնում: Այդ թեմաներով մարդկանց հետ կարողանում է խոսել մի այնպիսի լեզվով, որ ականայից լսում ես: Բժախնդրության չափ խիստ է ազգային ավանդույթների պահպանման, հայ տղաների եւ հատկապես աղջիկների պահվածքի հարցերում: Ընդ որում՝ դա անում է ոչ միայն պաշտոնական պարտականությունների, այլեւ՝ սեփական խղճի թելադրանքով:

Կարճ ասած՝ մենք հիմա մկրտված՝ սուրբ Խաչի հետ ենք, մեր ազգային հավատքի աջի տակ: Աստված հաջողություն տա բոլորիս, մեր ցավին էլ դարման գտնի. տղաները տուն գան...

18.01.2000



Մի քանի օր շարունակ Արցախի հեռուստատեսությունն էի գնում: Մաղավուզում օպերատոր Արտավազդի նկարահանած կադրերով ռեժիսոր Ջրայր Ավետիսյանի հետ փաստավավերագրական ֆիլմի վրա էինք աշխատում: Եվ ահա այն պատրաստ է, շատ ապրի Ջրայրը: Կոչել ենք «Սպասեցեք մեզ»: Ջենց հեռուստատեսությունում էլ տեղի ունեցավ ժապավենի շնորհանդեսը, որին մասնակցելու եկավ արտգործնախարարի տեղակալ Աշոտ Ղուլյանը:

1.03.2000



Կանանց առաջիկա տոնի առթիվ մեզ շնորհավորելու համար այսօր կազմակերպության գրասենյակ եկավ երկրի նախագահը՝ Արկաղի Ղուկասյան՝ պաշտպանության նախարար Սեյրան Օհանյանի եւ ԼՂՀ նախագահի խորհրդական, ԱԺ պատգամավոր ժաննա Գալստյանի հետ: «Սպասեցեք մեզ» ֆիլմը դիտելուց հետո նրանք առաջարկեցին առաջին հրապարակային ցուցադրումն իրականացնել հանդիսավոր պայմաններում՝ Սպայի տանը: Նման գնահատման եւ ուշադրության համար ինձ երախտապարտ զգացի:

6.03.2000



Այսօր՝ Ռազմագերիների միջազգային օրը, Սպայի տանը տեղի ունեցավ «Սպասեցեք մեզ»-ի առաջին ցուցադրումը: Սպայի տանը ներկա էր ՀՀ Անհայտ կորած ազատամարտիկների հարազատների միության նախագահ Ռիմա Առաքելյանի գլխավորած պատվիրակությունը: Մինչ ֆիլմի ցուցադրումն սկսվելը միջոցառումը վարող՝ մշակութթի նախարար Արմեն Սարգսյանը բացման խոսք ասաց, հետո ելույթ ունեցան պաշտպանության նախարար Սեյրան Օհանյանը եւ Ռիման: Դահլիճը լեփ-լեցուն էր: Ցուցադրումն ավարտվելուց մարդիկ հուզմունքից կարկամել էին...

11.04.2000



Ամեն մի ծրագիր կյանքի կոչելու համար հարկ է լինում դռներ ծեծել, իշխանավորների դիմել, բարեգործների, կարճ ասած՝ նյարդերս սղոցելով եմ առաջ տանում գործը: Այդուհանդերձ՝ շնորհակալ եմ բոլորից: Այսպես թե այնպես, վաղ թե ուշ՝ ընդառաջում եմ, նպաստում հարցերի լուծմանը: Այդ թվում՝ եւ Արկադի Ղուկասյանը: Դե, երկրի նախագահի մոտ ընկնելը ջրի ճամփա չէ...

Այսօր նա ինքը եկավ մեզ մոտ, ասաց, որ հասկանում է մեր ցավը, ու որ եթե միայն հայկական

կողմից լինել կախված՝ տղաները վաղուց կլինեին ազատված... Մեր հակառակորդն, ասաց, մարդկային ոչինչ չունի, չի ուզում տեղի տալ, բարի կամք դրսևորել, դրա համար էլ գործը տեղից չի շարժվում: Խոստացավ ուշադրության կենտրոնում պահել անհայտ կորածների ընտանիքներին սատարելու, կարիքավորներին բնակարանով ապահովելու եւ մյուս հարցերը: Դիտեց մեր պատրաստած փաստավավերագրական ֆիլմը՝ «Սպասեցեք մեզ»:

Ավելի ուշ, Սպայի տանը կայացած՝ այդ ֆիլմի պրեմիերային էլ էր ներկա երկրի մյուս ղեկավարների հետ: Բանն այն է, որ այս օրը՝ ապրիլի 11-ը, Ռազմագերիների եւ պատանդների պաշտպանության միջազգային օրն է:

Մեր առաջին ֆիլմն էլ, որ կոչվում է «Անունդ՝ հայտնի, ճակատագիրդ՝ անհայտ», հեռուստաթեր է դուրս եկել երեք ու կես ամիս առաջ՝ փետրվարի 23-ին (Հայրենիքի պաշտպանի օրը):

14.04.2000



Վիտալի Բալասանյանի ուղեկցությամբ մեզ մոտ՝ ԱԿԱՅՄ գրասենյակ եկան ԵԱՅԿ Մինսկի խմբի համանախագահները՝ Անջեյ Կասպրշիկն ու մյուսները: Գալիս են, խոսում ու գնում, ի՞նչ է առաջ ընկնում: Մեր խնդրով՝ ոչինչ: Երեկոյան հեռուստատեսությամբ Կասպրշիկը հարցազրույց տվեց: Իր խոսքում, շնորհակալ են, կարելորեց ԱԿԱՅՄ նման կազմակերպության գոյությունն ու գործունեությունը, բայց եւ նշեց, որ շատ ավելի լավ կլիներ՝ եթե այն պատերազմի ժամանակ կամ էլ անմիջապես հետո ստեղծված լիներ, որովհետեւ թարմ հետքերով արդյունքի հասնելն ավելի հեշտ է... Քիչ էր մնում ասելի՝ այդպես խոսելն էլ է հեշտ, ոչ թե սեփական՝ այլ ուրիշի ցավի մասին... Թեեւ ընդունել է պետք, որ փաստորեն ինքը ճիշտ է, թարմ հետքերի հաշվով ճիշտ է ասում: Դա մենք էլ գիտենք:

5.05.2000



Սերժ Սարգսյանը մեզ բոլորից շատ է օգնում: Անհայտ կորած ազատամարտիկների 200 ընտանիքի համար 32 կիլոգրամանոց ծանրոցներ է ուղարկել (սննդամթերք), ու մենք այն տարել բաժանել ենք ըստ հասցեների: Սեյրան Օհանյանը նույն-

պես. 40 ընտանիքի հաշվով 22 կիլոգրամանոց էլի սննդամթերքային ծանրոցներ է ապահովել Միության առավել կարիքավոր ընտանիքների համար:

Մեր երկրորդ ֆիլմը, որ կրում է «Անունդ հայտնի՝ ճակատագիրդ անհայտ» վերնագիրը, ցերեկով ցուցադրվեց Սպայի տանը, երեկոյան էլ՝ ԼՂՀ հեռուստատեսությամբ: Ֆիլմում կադրից դուրս հնչում է Ռուդոլֆ Մարտիրոսյանի (որին ցուցադրումից հետո մեր մայրերից Անգին Աղաջանյանը կնքեց «Արցախի Լեւիտան» անվամբ) ձայնը:

24.06.2000



Սեփական տուն-օջախից սա էլ երկրորդ տեւական բաժանունս էր, որ, փառք Աստծո, վերջապես ավարտվեց: Կարոտից մեռնում էի:

...Փարիզ մեկնեցի հուլիսի 1-ին: Գնում էի Շառլ Ազնավուրի օգնությանը դիմելու... ի՛նչ միանտություն՝ առանց նախապես իր հետ պայմանավորվելու: Տեղ հասնելուց պարզվեց, որ Ազնավուրը Փարիզում չէ ու չի էլ լինի երկար ժամանակ: Մտածում էի՝ աշխարհահռչակ արվեստագետ է եւ հայրենասեր հայ, որ խնդրեմ աղաչեմ, գուցե կարողանա իր հեղինակությամբ ազդել Մուսլիմ Մագոմաեւի,

Ռուստամ Իբրահիբեկովի, նույնիսկ Փոլադ Բյուլբյուլօղլու վրա, որպեսզի նրանք էլ ազդեցության իրենց լծակը գործադրեն, Ադրբեջանի իշխանություններին համոզեն ազատություն շնորհել գոնե մեկ կամ երկու հայ ռազմագերու: Դա էլ՝ երկրորդ սխալս, որովհետեւ դեռ հարց է, թե նրանք իրո՞ք կուզենային լսել նույնիսկ Ազնավուրի նման մեկին, եւ ամենակարեւորը՝ կլսե՞ր, արդյոք, իշխանությունը արտերկրում ապրող ստեղծագործող իր, թեկուզեւ բարձր, մտավորականներին: Ինչեւէ:

Ասված էր՝ ինձ օդանավակայանում դիմավորելու կգա «Յառաջ» թերթի խմբագիր Ռաֆֆի Արաքս Յերմոնը, բայց օդանավը վայրէջք կատարեց, իսկ նա չկար...Ու չերեւաց: Մնացել էի գլուխս կորցրած, ոչ ծանոթ ունեի, ոչ լեզու գիտեի: Ստեցան ուղեկիցներս՝ Ռուբիկ Գալուստյանն ու Յակոբ Գույումճյանը: Պարոն Յակոբն ասաց՝ մի մտածեք, տիկին, կգնանք մեր տուն, հետո կորոշենք ինչ ձեռնարկել: Նա երկու արկղ ծիրան էր բերել իր հետ (ասաց՝ հայկական ծիրանի համն ուրիշ է), օգնեցի հասցնել տաքսիների կանգառ:

Տիկին Վասիլիկին ինձ ջերմ ընդունեց:

- Վասիլիկի,- կնոջը դիմեց պարոն Յակոբը,-կուզե՞ս իմանալ ինչով էի զբաղված Արցախում:

Դիտեցինք մի տեսաժապավեն. Ստեփանակերտի կոշկի ֆաբրիկայում ֆրանսահայերի օգնությամբ բացվում է նոր արտադրամաս, որը զինվո-

րական կոշիկներ ու համազգեստ պետք է կարի բանակի համար: Գույունճյանի կողքին վարչապետ Ռանիելյանն է: Կինը թե՛ բա ինչո՞ւ երկրի մյուս ղեկավարները ներկա չէին, նա էլ բացատրեց, որ այդ օրը՝ հունիսի 29-ին, ուրիշ կարելոր միջոցառում էլ կար՝ Անհայտ կորած ազատամարտիկների հիշատակի օրն էին նշելու գնացել: Այնքան էի ցնցվել, որ արցունքներս չկարողացա պահել: Ասացի՝ նրանք հենց իմ կազմակերպած միջոցառմանն էին եկել, որովհետեւ ես ԼՂՀ անհայտ կորած ազատամարտիկների հարազատների միության նախագահն եմ... Բայց ինչո՞ւ, դու ի՞նչ կապ ունես նրանց հետ՝ մտերմական դու-ի անցնելով՝ հարցեց տիկին Վասիլիկին: Ասացի՝ իմ միակ որդին էլ է ռազմագերի... Այդպես բացահայտվեց Փարիզյան այցիս նպատակը: Պարոն Գույունճյանն ասաց՝ մենք պետք է դիմենք քարոզչության օգնությանը, գնանք ռադիոտուն՝ Յակոբ Պալյանի մոտ: Վերջինս ինձ հետ հարցազրույց վարեց, եւ հաջորդ օրերին չէր լռում գույունճյանների տան հեռախոսը. ֆրանսահայերն իրենց բարոյական զորակցությունն էին հայտնում, շատերն անգամ տուն այցելեցին:

Եղանք շատ տեղերում, շատերի հետ խոսեցինք: Մեծահարուստ Էդվարդ Ջրբաշյանը մի ինքնաթիռ պնդուկով եւ ընկույզով չամիչ առաջարկեց, կողքին մի հայ տղամարդ էլ կար, նա էլ՝ շքեղ ավտո-

մեքենա, ասաց՝ վարորդս Ձեզ հետ կարող է այն Ստամբուլով հասցնել Երեւան: Նայեցի պարոն Չակոբին, նա գլխով արեց, ու ես պահի տակ համաձայնվեցի: Նրանք զբաղվեցին փաստաթղթերը լրացնելով, իսկ մենք վերադարձանք տուն: Գիշերը երազ տեսա. Սպարտակս մռայլ կշտամբում էր ինձ.«Այդ ինչի՞ վրա ես, մամ...Մենք բանտում փտում ենք, փոխարենը որ մեզ ազատես...»: Խոսքը չավարտած՝ անհետացավ, ես էլ վեր թռա անկողնումս ու մինչ լույս աչքիս քուն չեկավ: Առավոտյան գնացինք Ջրբաշյանի մոտ, ու ես ասացի, որ հրաժարվում եմ մեքենայից: Դժվարանում էին ինձ հասկանալ, ես էլ չխորացա: Չետագա օրերն անցկացրի Փարիզի նույն արվարձանում՝ Ալֆորվիլում, ապրող Խաչատուր Դուդաքյանի տանը: Նրանք բնակարանային ավելի լայն հնարավորությունների տեր էին: Տանը միայն իրենք էին՝ պարոն Խաչատուրն ու տիկինը՝ Ալիսը:

Ծանոթացել էի եւ Գլամարի փոխքաղաքապետ Չակոբ Արթինյանի հետ: Ի՞նչ բյուրեղ մարդ է... Չրաժեշտին բոլորն ուզում էին ինչ-որ բաներ նվիրել ինձ, բայց ես վերցրի ընդամենը մի քանի կտոր հագուստեղեն ու սեղանիկի մի ծածկոց, ասացի՝ սա մեր գրասենյակի սեղանիկի վրա կզգեմ՝ որպես հիշատակ... Շորերն էլ բաժանեցի մեր վարչութան անդամներին: Շնորհակալ եմ ինձ՝ հանկարծահաս եւ ինչ-որ տեղ պատահական հյուրիս հյուրընկա-

լած այդ լավ մարդկանց, բայց կարծում եմ, որ միայն սեփական հարկի տակ ապրած յուրաքանչյուր օրն է արժանի երկրպագման...

25.07.2000



Թուրքերի հետ հեռախոսակապով բանակցությունների՝ մեկը մյուսի գլխին եկող ծախսերս փակելու համար մոտ երեք ամիս է՝ շուկա եմ գնում եւ... ունի՞ց պիտի ամաչեմ՝ բանջարեղենի, մյուս գյուղապրանքների վերավաճառքով զբաղվում: Միակ որդուս կորցրած՝ պատերազմի տարիներին հո չէի հարստացել: Լավ ապրանքի գնման իմ անփոփոխ հասցեներն ունեմ. լոբին՝ քարինտակցիներից, մեղրը՝ բերդաձորցիներից, պանիրը՝ գառնաքարցիներից, ձուն՝ նորագյուղցիներից, կարտոֆիլը՝ ավետարանոցցիներից, կանաչեղենը՝ քարաշենցիներից եւ այլն: Կանաչու մեծ փնջերը փոքրացնում՝ քանակն ավելացնում էի... Իզուր չի ասված, թե գետում խեղդվողը ծղոտից էլ է բռնում:

Մի անգամ էլ կապույտ աչքերով մի մարդ մոտեցավ ու թե՛ տիկին (կանաչի վերավաճառող «տիկին»), եթե խնդրեմ, երկու փունջ մաքրած չե՞ք տա ինձ, գնի կրկնակին կվճարեմ: Ոչ այնքան նրա խոստացածի, որքան այրմարդու համար ոչ սովո-

րական խնդրանքի պատճառով ասացի՝ լավ: Երբ եկավ կանաչին վերցնելու, ընկերոջն ասաց. «Սպարտակ, տոպրակը կպահե՞ս՝ փնջերը տեղավորեմ»: Սիրտս ծուլ եղավ... Մարդը նկատեց դա, հարցրեց. «Ձեզ ի՞նչ պատահեց, տիկին»: Արցունքներս չկարողացա զսպել, ասացի՝ միակ որդուս անունն էլ է Սպարտակ, նա պատերազմում անհայտ կորել է, պարզապես լսեցի անունն ու...

Այդպես ծանոթացանք ես ու Միքայել Յաջյանը: Յետագայում իմացա, որ նրա ընկերոջ լրիվ անուն-ազգանունը Սպարտակ Ղարաբաղցյան է: Երբ ստեղծեցինք մեր կազմակերպությունը, պարոն Յաջյանն այցելեց մեր գրասենյակ, ծանոթացավ վարչության անդամների հետ, դարձավ ԱԿԱՅՄ բարեկամներից մեկը:

Յեռուն չգնամ. հենց այսօր Միքայել Գրիգորելի-չը մեզ օգնեց քաղաքականապես գրազետ ձեւով շարադրել անհայտ կորածների մայրերի անունից Ադրբեջանի նախագահ Յեյդար Ալիեւին հղվող նամակը: Ընդհանրապես խելոք մարդ է ու լավ խորհրդատու:

2.12. 2000



Ես արդեն 2 թռնիկ ունեմ... Սպարտակիս մի խոսքը հիշեցի:

Մեր այգում մի թթենի ունենք՝ երեք հսկա ճյուղերով: Սպարտակն ասաց՝ մամ, տես, հա՛, էս ծառից ինչ ճյուղ էլ որ կտրելու լինեք՝ ջահելացնելու համար, էն մեկին ձեռք չտաք, թողեք ավելի հաստանա, ուժեղանա, դրանից իմ ու քույրիկիս ապագա երեխաների ճոճաթոռն են կախելու՝ ճինջեխածեն: Եվ ահա այսօր, հուլիսյան տապ օրով, երկինքը մեկեն մթնեց ու հորդ անձրեւ տեղաց՝ հետն էլ կայծակ: Վերջինս կպավ թթենուն ու կտրեց ճյուղերից երկուսը, բայց Սպարտակի ասած ճյուղին ոչինչ չեղավ: Կարծես Աստծո մատն է այս ամենում:

28.07.2000



Ինչպիսի՜ անակնկալ. Ստեփանակերտում են զույգ Յակոբները. Գույունճյանն ու Արթինյանը: Երբ զանգեցին, դժվարանում էի հավատալ ականջներիս: Բնականաբար, նրանց հրավիրեցի մեր տուն: Երբ տեսան ռումբի պայթյունից վնասված առաստաղը եւ ընդհանրապես բնակարանի ընդհանուր աննախանձելի վիճակը, հուզվեցին մինչեւ հոգու խորքը: Վերհիշեցինք փարիզյան

որոշ մանրամասներ...Սի բանում համամիտ էինք. եթե հրաժարված չլինեի մեքենայից, այն կարելի էր վաճառել Երեւանում (հայկական շուկայում լավ գին ուներ) եւ հնարավորության դեպքում գումարը ծառայեցնել որպէս փրկագին...Հայի ետին խելք:

Նրանք եղան մեր հուշաթանգարանում: Սեղանիկներից մեկի վրա տեսան փարիզյան «արժանահիշատակ» ծածկոցը: Պարոն Արթինյանն ասաց՝ ես խեղդվում եմ, տիկին, Ձեր ազնվությունից... Չեմ թաքցնի, ինձ դուր եկավ նրա գնահատականը:

15.08.2000



Հինգերորդ օրն է՝ նոր ուսումնական տարվա շեմին դպրոցական նոր պայուսակներ ու գրեմական պիտույքներ ենք բաժանում անհայտ կորած ազատամարտիկների 90 երեխաների: Անցած օգոստոսին էլ նույնն արել ենք 120 երեխայի համար: Դրանում մեզ օգնել է Կարմիր Խաչի Ստեփանակերտի գրասենյակը:

20.08.2000



Այսօր հայ ավետարանչական ընկերակցության Ստեփանակերտի գրասենյակից 20 երեխայի հաշվով տրիկոտաժե ներքնազգեստներ ստացանք: Երեխաներին հրավիրեցինք մեր գրասենյակ ու բաժանեցինք:

1.09.2000



Ստեփանակերտում եւ շրջաններում անկողնուն գամված 67 հիվանդ ունենք: Մի քանի անգամ նրանց այցելել ու սննդամթերքներ ու փափուկ ծածկոցներ ենք հանձնել: Երանի չէ՞ր հնարավորությունն ավելի մեծ լիներ՝ ավելիով կարողանայինք օգնել:

18.10.2000



Անկողնուն գամված 67 հիվանդ ունենք միության անդամների թվից: Մի քանի անգամ այցելել ենք նրանց, սննդամթերք ու փափուկ ծածկոցներ նվիրել:

19.10.2000



Պառկել էի քնելու, չգիտեմ ինչու հիշեցի Գարեգին Բ կաթողիկոսի այցը մեր գրասենյակ: Երբ շրջեց թանգարանում, շատ ազդվեց: Ասաց՝ կձգտի կապվել թուրքերի հոգեւոր հովիվ Ալլահշուքյուր Փաշազադեի հետ եւ շոշափել ռազմագերիների հարցը, ինչ հնարավոր լինի՝ կանեն, ասաց, հրաժեշտին էլ օրհնեց մեզ ու համբերության կոչեց:

Հիմա, վերհիշելով այդ պահը, հոգուս մի տեսակ հանգստություն իջավ: Երեւի սուրբ խոսքի զորությունից է: Թվում է, ի տարբերություն շատ գիշերների, հիմա կհաջողվի քնել:

4.11.2000



Դիմել էի սոցապնախարարություն՝ հագուստեղեն ու լվացքի պարագաներ տան մեզ: Շատ ապրեն, տվեցին՝ մենք էլ բաժանեցինք կազմակերպության անդամ 239 ընտանիքի: Ամեն անգամ, երբ հաջողվում է նման գործողություն իրականացնել, գոնե մի քանի օրով հոգեկան հանգիստ եմ զգում:

16.11.2000



Որոշել ենք տղաների հիշատակն ու մեր սպասունը խորհրդանշող հուշարձան կառուցել: Դրա համար, հուշարձանի լավագույն մակետի համար, մրցույթ ենք հայտարարել: Այն անցկացվեց երեք նվազով: Ուզում ենք ընտրել իրոք ամենալավը: Ի վերջո, մրցանակը շահեց քանդակագործ Յուրի Զովհաննիսյանը: Նրա քանդակում շղթայակապ որդուն մոր պատկերով օգնության է հասնում Աստծո առաքած հրեշտակը:

30.11.2000



Պահանջ են զգում մեր տառապանքի եւ գործի մասին գիրք գրել: Պատերազմում անհայտ կորածների պրոբլեմն էլ է մեր ժամանակակից պատմության մի մասը եւ այն հնչեցնել է պետք աշխարհի ականջին: Մեր ցավը մեզնից խոր ո՛վ կարող է ապրել ու արտացոլել: Գիտեմ, որ լրագրող Նվարդ Սողոմոնյանն զբաղվում է այդ թեմայով, գիրք էլ ունի, ինչ կա որ, իրենն՝ իրենը, իմս՝ իմը... Կարող եմ նույնիսկ խնդրել նրան, որ ինձ օգնի՝ պատրաստենք գիրքը. ես լրագրող չեմ, բայց ցավի տիրոջ իմ ասելիքն ունեմ:

5.01.2000



Մի քանի օր առաջ՝ հունվարի 29-ին, Երեւանից զանգեց ՀՀ ազգային անվտանգության եւ ներքին գործոց նախարարի (Սերժ Սարգսյան) աշխատակազմի ղեկավար Մարատ Մուսայելյանը եւ ասաց, որ պարոն Սարգսյանի ցուցումով ԿամԱԶ բեռնատարով, որն ունի նաեւ բեռնված կցորդ, հումանիտար օգնություն է ուղարկվել Արցախ՝ հատուկ Անհայտ կորած ազատամարտիկների ընտանիքների համար, պատրաստվեցեք ժամանակին դիմավորել վարորդներին: Այդ օրը մինչեւ գիշերվա ժամը 1-ն սպասեցինք, բայց բեռնատարը չերեւաց: Անցավ հաջորդ օրն էլ՝ չկա... Արդեն լուրջ անհանգստացանք: Մարատ Շնավոնովիչը նորից զանգեց՝ Վերա, ինչո՞ւ ձայն չեք հանում, ստացե՞լ եք բեռը: Ոչ: Լավ, դուք զանգեք-հետաքրքրվեցեք մինչեւ Եղցահող, ես՝ մինչեւ Գորիս, տեսնենք ինչ է պատահել: Ահավոր ծյուն էր եկել, հետո էլ գետինն այնպես էր սառել, որ ճանապարհները փակվել էին, մեքենաներ գլորվել ձորը, վթարներ տեղի ունեցել: Թվով երրորդ զանգով Մարատը հայտնեց. «Բեռը Խնձորեսկ-Քարաշեն կարճուղու կենտրոնական հատվածում է: Մի դատարկ ԿամԱԶ էլ ինքների վերցրեք եւ ուղեւորվեցեք այնտեղ, Գորիսից, արդեն պայմանավորվել ենք, Ազգային անվտանգության պետ Օնիկ Սաֆարյանն է գալու», - ու

դրեց լսափողը: Այլեւս չկասկածեցի, որ վատ բան է պատահել: ԼՂՀ վարչապետ Անուշավան Դանիելյանի հանձնարարությամբ մեքենան տրամադրվեց, եւ քրոջս ամուսնու՝ Արցախյան պատերազմի վիրավոր Արամայիս Աղաջանյանի հետ ճանապարհվեցինք Գորիս: Մեծ դժվարությամբ հասանք տեղ:

Միացյալ խմբով պատահարի վայր գնացինք: ԿամԱԶը սառցապատ ու խորդուբորդ ճանապարհից դուրս թռչելով՝ 35 մետրի չափ գլորվել էր գառիթափով ու հետհարվածից շրջվել դիմացի բլրակի ստորոտում... Արնաշաղախ վարորդները դեռ տեղում ընկած էին: Արդյունաբերական ապրանքներն ու մթերային արկղերն աջ ու ձախ թափված էին գետնին, մի զգալի մասը՝ փշրված: Շրջակա գյուղերի բնակիչները, որ մեզմից շուտ էին իմացել վթարի մասին, հասցրել էին բավականին քաշել տանել ամեն ինչից... Սաֆարյանի ներկայությամբ արագ ակտեր կազմեցինք, ինչ հնարավոր էր կամ իմաստ ունեւր հավաքել՝ հավաքեցինք եւ այդ ամենը վերաբեռնելով արդեն մեր տարած բեռնատարին՝ հասցրինք Ստեփանակերտ:

3.02.2001



Արդեն շաբաթ է անցել դեպքից, բայց հիմա էլ չեմ կարողանում ժպիտս պահել, երբ հիշում եմ, թե ինչպես ապրանքը բաժանեցինք անհայտ կորածների ընտանիքներին:

...Ապրանքը բերելը բերեցինք, բայց... Այն ուշ երեկոյան հասցրինք կազմակերպության գրասենյակ, իսկ գրասենյակը դեռ վերանորոգված չէր, դռների վրա ոչ մի փական չկար, կիսավեր տարածքում էինք: Ի՞նչ անել, «անտերունչ» բարիքն այստեղից էլ կքաշեն տանեն... Որոշեցինք անհայտ կորած ազատամարտիկ Արսեն Աբալյանի հայր Սերգեյին այդ գիշեր պահակ կարգել ապրանքի վրա, որի շարքում մի հեռուստացույց էլ կար, այն իսկույն միացրել՝ պարզել էինք՝ աշխատո՞ւմ է, թե՞ ոչ: Աշխատում էր: Ես ու Շուրան գնացինք տուն, բայց աչքիս քուն չեկավ. իսկ եթե Սերգեյ քեռին հանկարծ քնով անցնի... Ասացի՝ չէ, Շուրա, վեր կաց, գնանք: Դեռ աստիճանների վրա՝ լսեցինք Սերգեյի խռնփոցի ձայնը... Հեռուստացույցի կապույտ էկրանը լուռ ու դատարկ էր, «պահակը»՝ Մորփեոսի գրկում: Տեղում էլ լուսացրինք գիշերը, հետո զանգեցինք հասցեներով ու կեսօրից հետո, երբ մարդիկ եկան, սկսեցինք բարիքը բաժանել հստակ կազմած ցուցակներով: Աստված Սերժ Սարգսյանին երկու կյանք տա: Նրա սրտով ղեկա-

վարի առաջին անգամ են հանդիպում իմ կյանքում:

Իսկ ընդհանրապես, արժե, որ տեղի ունեցած իրադարձության վերաբերյալ գրելիքս վերջացնեն ժողովրդական խոսքով՝ լավ է՝ երբ ամեն ինչ լավ է ավարտվում:

8.02.2001



Օրերս թբիլիսիում էի, մասնակցում էի Ղարաբաղյան հակամարտության գոտում անհայտ կորածների որոնման աշխատանքային խմբի (ղեկավար՝ Յուլյա Մախարաշվիլի) երկօրյա նիստին: Եղավ պահ, երբ ադրբեջանական կողմից Համլետ Բադալովը Ադրբեջանի իմ կոլեգա Թամարա Այուբովայի ներկայությամբ ասաց՝ մենք տեղեկացել ենք Ձեր որդու՝ Սպարտակի (նա Սայադ Շուրաբեիչ Գրիգորյան անվան տակ է պահվում) որտեղ գտնվելու մասին եւ կարող ենք փրկագին տալով ում պետք է՝ ազատել նրան, բայց՝ մի պայմանով. եթե դուք էլ գտնեք ու մեզ տաք իմ կամ Թամարա խանումի տղային: Բադալովի տղայի ճակատագրի մասին ոչինչ ինձ հատնի չէր, բայց որ Այուբովայի Վադիմ որդին զոհվել էր՝ հաստատ էր... Ասացի՝ ես այստեղ եմ բոլոր սպարտակների համար եւ խոսում եմ ոչ միայն իմ որդու ազատագրության

մասին: Այնպես էի լարված, այնքան վատ էի զգում
ինձ, որ կտրուկ թողի դահլիճը՝ ուշքս հավաքելու:
Այս Ի՞նչ լաբիրինթոսում եմ...

16.02.2001



Տարիներ առաջ, դեռ խորհրդային օրոք, բա-
նաստեղծություններ էի գրում, որոնք, հիմա եմ
հասկանում, ոտանավորիկներ էին... Հանգավո-
րած պարզունակ տողեր՝ սիրո, երազանքի եւ... Է՞լ
ինչի մասին պիտի գրեր երիտասարդ աղջիկը:
Ավելի ուշ, երբ ամուսնացա, Շուրային եղբայր
եկող Լազր Գասպարյանը, որ «խորհրդային Ղա-
րաբաղ» թերթի խմբագիր, հետո էլ պատասխանա-
տու քարտուղար էր աշխատում, ինձ հասկացրեց,
որ իսկական պոեզիան դա չէ, ու ես թողեցի գրելը:
Բայց ահա, քանի-քանի տարի անց, ճակատագրի
բերումով իմ լեզվին ՑԱՎՆ է սկսել ծաղկել բանաս-
տեղծության լեզվով... Ի՞նչ անեմ: Գրում եմ կաս-
կածելով. իսկ եթե նորի՞ց բանի պետք չլինեն... Հե-
տո էլ պատասխանում եմ. իսկ դու ինչո՞ւ ես ու-
զում, որ ինչ-որ բան ասվի, դրա՞ համար ես գրում:
Իհարկե՞ ոչ: Այն էլ հիմա՞ այս տարիքում: Չէ, ուղ-
ղակի գալիս եմ մտքերն ու տողավորվում, եւ այդ
տողերը միակն եմ, որտեղ ինձ համարյա կազմա-

բանորեն տեսանելի են դառնում էմոցիաներս: Սկսում են ինձ ճանաչել դրանցում, ինձ ու վիճակս: Ներքին վիճակի մասին են խոսում:

Գրում եմ, լավ էլ նկատելով, որ ամենաքիչը տեխնիկական առումով սայթաքումներ ունեն, դե, գրող չեմ, ոչ էլ գրականագիտություն են ուսումնասիրել: Հասկանում եմ, որ անթերի չեն գրածներս, բայց կանգ առնել չեմ կարողանում: Երբ ներքին մենակություն են զգում, որը փարատել հնարավոր չի լինում ոչնչով, ինձ փրկում են միայն այդ...այ, հիմա էլ չգիտեմ՝ ասեմ «ոտանավորները», թե՞ «բանաստեղծությունները»: Վա՛յ, Լազր Հաշիմիչ, այս ինչ օյին դրեցիր գլխիս...

Լավ, կգնամ թերթի խմբագրություն: Բայց ո՞ւմ մոտ: Երեւի Նվարդ Ավագյանի՝ եւ բնաստեղծուհի է, եւ կոռեկտ անձնավորություն: Կտամ՝ կարդա, ինչ կա՝ թող այն էլ ասի: Իմ ձեռքին գրիչ դնողը իմ ու բախտակիցներիս ցավն է:

19.02.2001



Այսօր զավեշտական դեպք պատահեց: Օգնություն էինք տարել Հադրութ: Բաժանելուց հետո գնացինք մեր ներկայացուցչի՝ Փիրուզի տանը մի կտոր հաց ուտելու: Անձանոթներ էլ կային՝ հիմնականում կանայք: Ես սովորություն ունեմ այցերի

Ժամանակ Շուրային ներկայացնել որպես կազմակերպության վարորդի (իրականում հենց այդ գործն էլ կատարում է՝ առանց հաստիքի ու վարձատրման, արդեն քանի՞ տարի...): Բացառություն չեղավ այդ օրն էլ: Երբ կենացները «բարակեցին», ասացի՝ եկեք այս բաժակն էլ բարձրացնենք մեր վարորդի պատվին ու տեսա, թե ինչպես կանայք բազմանշանակ հայացքներ փոխանակեցին: Դու մի ասա՝ Արցախի հեռուստատեսության օպերատոր Սոս Մայիլյանն էլ էր նկատել դա, ինձ աչքով արեց ու բարձրաձայն թե՛ տիկին Վերա, հասկացա՞ր սրանց հայացքների իմաստը, մտածեցին, թե Շուրան սիրեկանդ է: Ա՛յ ժողովուրդ, ասաց, էս մարդը էս կնկա հալալ-զուլալ, մադար-գյուդար ամուսինն է, չգիտեիք՝ իմացեք: Կանայք շատ շփոթվեցին: Յետո բոլորս ծիծաղեցինք, ու «քեֆը» շարունակվեց ուրախ նոտայի վրա: Վա՛յ ձեր ինչն են ասել...

4.03.2001



Ջանգեց պարոն Յաջյանը. «Տիկին Վերա, գիտեմ, որ փողի նեղություն եք քաշում, Ձեզ օգնելու շանս կա: Սփյուռքից (Կանադայից) խումբ է եկել Արցախ, մեկ տասնյակի չափ հայեր են, վճարովի սկզբունքով նրանց բնակարաններում էլ են տեղա-

վորում, տանն ունե՞ք նման հնարավորություն»:
Տակ տվի, գլուխ տվի, ասացի՝ լավ, ես ու ամուսինս կջանանք հնարավորինս գոհացնել նրանց:

Ջրմուղը չէր աշխատում, ձորի աղբյուրից էինք ջուր բերում թե խմելու, թե տնտեսական կարիքների համար: Օրերն անցնում էին, հյուրերը՝ հյուրեր: Նրանց տարանք Գանձասար՝ մասնակցեցին պատարագին: Վանքի բակում հանդիպեցի եղբորս աներձագ, զոհված էռնեստի կնոջը՝ Աիդային: Ասաց՝ ամուսնու ծնված օրն է ու լավ սեղան է գցել, ամբողջ խմբով մեզ իրենց տուն հրավիրեց: Հյուրերս կերան-խմեցին, ու ճանապարհվեցինք ետ՝ Ստեփանակերտ: Տան փոքրի ձեռքին սիմվոլիկ 1 դոլար էլ չէին դրել... Ախր գիտեի՞ն ում հարկի տակ են հյուրընկալվում:

Անշուշտ, գիտեին եւ այն, որ մեր միակ տղա զավակը ռազմաճակատի առաջին գծում է եղել, այնտեղ էլ անհայտ կորել է: Ամուսիններով կաշվից դուրս էինք գալիս, անհնարինը հնարավոր դարձնում՝ նրանց լավ սպասարկելու համար: Սովորական կերակուրներից բացի, դարաբաղյան հատուկ ուտեստներ էինք մատուցում, մտածելով՝ թող ճանաչեն հայի արցախական տեսակին, մեր արքութարքի, ապրուստ-կենցաղի մասին պատկերացում կազմեն:

Ինչեւէ: Եկավ Կանադա վերադառնալու օրը՝ եւ նրանք հավաքեցին իրենց շորուշիրթերն ու գնա-

ցին... Կախման կետն այստեղ նշանակում է, որ ոչ մի կոպեկ էլ (դե, «կոպեկ» ասելու ենք սովոր) չվճարեցին: Ջանգեցի պարոն Չաջյանին, պատմեցի, զայրացած ասաց՝ ի՞նչ մարդիկ դուրս եկան դրանք, ինչպե՞ս կարող էին այդչափ անշնորհք-անշնորհակալ լինել, չէ՞ որ նախապես գիտեին, ասվել էր, որ որպես մասնավոր հյուրանոցի՝ պետք է վճարեն:

Անցած լինի... Իրենց հալալ: Պարզապես սուկալի հիասթափվում ես նման «հայրենակիցներից»:

12.08.2001



Շատ ապրի Նվարդը, չմերժեց: Ընդառաջեց, օգնեց. նյութերը դաս-դասեցինք, ամենակարեւոր ասելիքը երկրորդականից ջոկեցինք... Կարճ ասած՝ թափած ջանքի համար շնորհակալ եմ նրանից: Գիրքը շուտով լույս է տեսնելու: Վերնագրել ենք «Անհայտ ճակատագրեր՝ ահագնացող տագնապ»: Ի դեպ, այնտեղ զետեղել ենք եւ մեր կազմակերպության մի քանի նամակներ, որոնք ժամանակին ուղարկել ենք տարբեր բարձր ատյանների հասցեներով: Միաժամանակ ԱՅ նախագահ Յեյդար Ալիեւին ու ՀՀ նախագահ Ռոբերտ Քոչարյանին հղված նամակում շարադրած մեր պահանջ-

ներն ադրբեջանական կողմին հետևյալն են. հայ ռազմագերիների մի մասը դեռ ողջ է, եւ հարկավոր է դրսեւորել բարի կամք, ազատել նրանց՝ անկախ դատական ատյանների կայացրած վճիռներից, հայկական կողմին հանձնել բանտերում մահացած ռազմագերիների աճյունները, ապահովել ականապատված չեզոք տարածքներում մնացած՝ զոհվածների աճյունների անձեռնմխելիությունը, լուծել Լեռնային Ղարաբաղի եւ Ադրբեջանի հարակից տարածքներում հայ եւ ադրբեջանցի զինվորների անհայտ թաղման վայրերի համատեղ որոնման ու հետազոտման, հայտնաբերված աճյունների իսկության պարզման հարցերը եւ այլն:

Մինչ այդ էլ ենք գրեթե նույն բովանդակությամբ նամակ գրել Ալիեւին, բայց նա չի արձագանքել: Երեւի չարձագանքի այս անգամ էլ... Գլուխը քարը:

22.04.2001



Հարազատներին տեսնելու համար Պյատիգորսկից Ստեփանակերտ ժամանած ժամնա անունով մի կին, իմանալով ով եմ, հայտնեց, որ ինքը Պյատիգորսկ է բռնագաղթել Բաքվի հայտնի դեպքերի ժամանակ եւ որ Սեդոյ մականվամբ իր ամուսինը Պյատիգորսկում շատ ադրբեջանցիների գիտի,

որոնք պահպանում են կապը Բաքվի հետ: «Եկեք մեզ մոտ, խոսեք նրանց հետ, գուցե կկարողանան ինչ-որ բանով օգնել Ձեզ», - ասաց:

...Պյատիգորսկում են: Տեսա, խոսեցի հետները: Մեկը կա, բարի տղա է երեւում, Դոդմար է անունը, ասաց կխոսեն մոտիկներիս հետ, ստուգեն տեսնեն «որտեղ ինչ» կա... Իմացավ: Կարդաց իմ ներկայացրած ցուցակը, որտեղ գրել էի տղաներից նրանց անունները, ում մասին որոշակի եւ համեմատաբար թարմ տեղեկություններ ունեինք, կարդաց ու չգիտեմ ինչու ասաց՝ նա այստեղ չէ... Ո՞վ՝ հարցրի: Ասաց՝ կարո՞ղ եք դրանց նկարները բերել: Վերադարձա Ստեփանակերտ, վերցրի նկարներն ու տարա: Նայեց-նայեց ու նորից թե՛ չէ, նա այստեղ չէ: Ո՞վ՝ հարցրի համբերությունս կորցրած: Դոդմարը թե՛ ձերոնցից մեկը կա Բաքվում: Սերգեյ Շահենի Բալայան: Բայց նա Ձեր ցուցակում չէ:

Հայրենիք վերադառնալով իմացա, որ այդ տղան զոհված է համարվում: Որ իբր նույնիսկ թաղված է... Օ՛, պատերազմ: Այդ ի՞նչ ես անում մեզ հետ:

Սպարտակիս նկարը տեսնելով՝ նույն Դոդմարն ասաց. «Սրան հատուկ հանցագործ են համարում, որովհետեւ միլիցիոներ է եղել... Սրան չեն ազատի, չէ: Մենք նրա մասին դեռ Բաքվում՝ հեռուստատեսությամբ ենք լսել... Նա է, այո, լավ հիշում են»։ Նա

խոսում էր, իսկ իմ ոտքերը՝ դողում, շունչս կտրվում: Չասացի, որ իմ տղան է: Ինչ իմանամ՝ ինչպես կարձագանքեին, հետեւանքն ինչ կլիներ...

31.05.2001



Լուր ենք առել, թե անհայտ կորած Յանլետ Վարդանյանը կենդանի է եւ նրան Բաքվի «Գյուլիստան» ռեստորանում, պահնորդի հսկողության տակ, թառ նվագել են տալիս (մեր հայրենակիցը շատ լավ թառ նվագել գիտի): Ա՛խ, մեկը լինե՛ր՝ Բաքու ընկներ, ստուգեր...

5.06.2001



Վաղուց էի մտադիր հրատարակել մեծ ու գունավոր օրացույց, որը միաժամանակ կներկայացներ, ըստ ծննդյան ամիսների, մեր անհայտ կորած ազատամարտիկներին: Ամեն ծրագրված չէ, սակայն, որ կարող է դյուրին ստացվել... Ես դա իմ կաշվի վրա շատ են զգացել: Ապրի Սերժ Սարգսյանը, նա՛ ֆինանսավորեց: Գլուխ են խոնարհում այդ մարդու առջեւ, այնքան լա՛վ է հասկանում մեր ցավը, անչափ ուշադիր է եւ կարեկից մեր հոգս ու խնդիրներին:

Օրացույցն ահա վերջապես սեղանիս է: Գլուխս
այս գիշեր հանգիստ կդնեմ բարձին:

26.06.2001



Այսօր ԱԿԱՅՄ գրասենյակում էին Ավստրալիա-
յից ժամանած տեր եւ տիկին Իսկանդարյանները:
Անուսինը՝ Վարուժանը, ԼԴՅ մշտական ներկայա-
ցուցիչն է այդ երկրում, կինն էլ՝ Սիլվիան, մի շատ
հաճելի անձնավորություն է: Սրտին շատ մոտ է ըն-
դունում մեր ցավը...

Հանգամանքների բերումով այդ պահին գրա-
սենյակում էր եւ ադրբեջանական գերությունից
ազատված Նելսոն Մնացականյանը: Իսկանդար-
յանների խնդրանքով բոլորս միասին նկարվե-
ցինք...

11.05.2002



Մայիսը կիսվել է արդեն: Կարկառն էլ վարարած
է: «Սպասում» ֆիլմի համար անհայտ կորած ազա-
տամարտիկների 20 երեխայի հետ գետափին էինք
այսօր: Օպերատորը ՆԳՆ աշխատող Արայիկ Միր-
զոյանն է, ռեժիսորը՝ մեր անդավաճան Հրայրը:
Պարզվեց, որ մայիսի 24-ը Ավթանդիլյան Գառնիկի
որդի Հրաչի ծննդյան տարեդարձն է: Նա դեռ չէր

ծնվել, երբ հայրն անհայտ կորավ մարտում... Երեխան ոտանավոր արտասանեց այդ մասին: Ցնցող էր: Այդպիսի պահերի համար է ասված՝ լցվել եմ, լալ չեմ կարող... Ախր ինչպե՛ս լաց լինեի երեխաների ներկայությամբ: Արցունքներս դեպի ներսս էին հոսում: Տեր Աստված, տուն բեր Յրաչիկի եւ մյուսների հայրերին: Նրանց էլ՝ ովքեր դեռ չէին հասցրել հայր դառնալ:

Խորոված արեցինք, փոքրիկները գետում լողացան: Սիրտդ մի փոքր հանգստանում է, երբ ժպիտ ես տեսնում նրանց դեմքերին, լսում ուրախ ծիծաղը:

24.05. 2002



Տղաների համար նոր՝ յուրատիպ-յուրատեսք անձնական գործեր եմ պատրաստել: Անձը ներկայացնող, կոշտ ու կարմիր կազմով փաստաթուղթ՝ նկարով, հակիրճ մարտական կենսագրությամբ՝ մի էջում, եւ մյուսում՝ երկտուն բանաստեղծություն կարոտի ու վերադարձի թեմայով:

Այսօր, տղաների Յիշատակի օրվա հանդիսությունից հետո, ծնողները եկան գրասենյակ, ու յուրաքանչյուրի ձեռքին դրեցի իր անհայտ կորած հարազատի այդ ոչ անկարելորդ փաստաթուղթը:

Պատրաստել էինք երկուլական հատ, որպեսզի

մեկն էլ մնար մեզ մոտ: Հիմա հարկավոր դեպքում
էլ չենք քրքրի արխիվը, պե՞տք է՝ ձեռքդ մեկնիր ու
վերցրու որինն ուզում ես...

29.06.2002



Արտիցս ասես ծանր քար ընկած լինի...

Նվարդ Արամովնան կարդաց, ասաց՝ անթերի
չեն, բայց անկեղծ են: Սրանք բոլո՞րն են՝ հարց-
րեց: Ասացի՝ ոչ, երկու-երեք տետր էլ ունեն: Թե՛
բերեք, տեսնենք, սրանք, չեն թաքցնի, խմբագր-
ման կարիք ունեն: Ոչ այնքան խոր՝ բայց ունեն:
Դուք տարիներ առա՞ջ էլ էիք եկել այստեղ, թե՞
սխալվում են: Ասացի՝ չեք սխալվում, բայց հիմա
այն չէ, ինչ այն ժամանակ էր... Ներքուստ խեղդ-
վում էի: Հասկացավ ինչ էի ուզում ասել: Բերեք
կարդանք, կրկնեց ու ժպտալով ավելացրեց՝ եթե
սրանցից վատը չլինեն՝ կարելի է գրքով էլ տպագ-
րել: Հենց մեր տպարանում...

Շուրայից գաղտնի էի գրում, բայց մինչեւ ե՞րբ
պիտի թաքցնեի: Հայտնեցի օրվա նորությունս ու
սպասում էի նրա ծուռ ժպիտին: Հիմա կասի՝
պա՛հ-պա՛հ-պահ, չգիտեի, որ նոր Սիլվա Կապու-
տիկյանի հետ են ապրում... Բնավորության այդպի-
սի գիծ ունի՝ առանց թույնի ձեռ առնել: Բայց ո՛վ
զարմանք, նա հանգիստ ասաց՝ ինչ կա որ, դու հո

մենակ մեր մասին չես գրում, մերոնց բոլորի անու-
նից ես գրում...

Հետո խոստովանեց, որ ձեռքն է ընկել տետրե-
րիցս մեկն ու կարդացել է...Ապրես, Շուրա ջան,
այսօր քո մեջ նոր մարդու հայտնաբերեցի:

13.10.2002



ՀՀ ֆինանսների եւ էկոնոմիկայի նախարարու-
թյան գանձապետական համակարգի ներքին աու-
դիտի վարչության պետ Սուրադ Հարությունյանը
եկել էր Ստեփանակերտ: Լսել էր մեր հուշաթան-
գարանի մասին եւ այցելեց: Խորապես ազդվել
հուզվել էր: Տեսնելով նոր տպագրված «Անհայտ
ճակատագրեր. ահագնացող տագնապ» գրքիս
տպաքանակը, ասաց կարող է օգնել այն Հայաս-
տանում տարածել-վաճառելուն:

Շատ ապրի, իրոք օգնեց: Շնորհակալություն
նրան, գրքի վաճառքից ստացված գումարով էլ
հենց կիրատարակեմ չափածոս:

15.11.2002



Այսօր ԼՂՀ գրողների միությունում տեղի ունեցավ «Տառապանքը ազգություն չի ճանաչում» եւ «Հույսը ճանապարհին» ժողովածուների շնորհանդեսը: Հատկապես երկրորդը, որ չափածո է, հուզել էր բոլորին: Արտահայտվեցին Վարդան Հակոբյանը, Սոկրատ Խանյանը, Յուրի Հովհաննիսյանը, Սերգեյ Դավթյանը, Սիլվա Խաչատրյանը եւ ուրիշներ: ՑՕՐ-ից մի ջութակահար զինվոր էր եկել, շատ լավ նվագեց «Մարտիկի երգը»: Մարդկանց աչքերում արցունքն էր լճացել: Ախր այդ երգը համահունչ է մեր ապաբախտ տղաների կարոտին՝ առ հայրենիքը: Վերջում, երբ խոսքը տվեցին ինձ, ասացի՝ բոլորից շնորհակալ եմ ոչ այնքան մեծարման ու բարի խոսքերի համար, որքան՝ մեր ցավն ըմբռնելու... Շեշտեցի, որ եթե չլիներ այդ ցավը, այսքան տարիներ անց գրիչ չէի առնի ձեռքս, որ քանի դեռ որդիս տուն չի վերադարձել՝ իմ գործն ու այդ գրիչն են ինձ ոտքի վրա պահողը: Աստված վկա, իրոք այդպես է:

20.12.2002



Այս տարի Սերժ Ազատովիչի ու Սեյրան Սուշեղովիչի հովանավորությամբ լույս տեսան իմ «Եվ դարից երկար ձգվում է տունդարձի օրը» եւ «Տառապանքը ազգություն չի ճանաչում» գրքերը: Անչափ շնորհակալ եմ նրանցից: Հասկանում եմ, գիտեմ, որ միայն իմ ցավի մասին չէ, որ գրում եմ: Եվ որ գրել պետք է՝ նույնպես հասկանում եմ:

28.12.2002



Հեռուստատեսությամբ ցուցադրվեց մեր նոր՝ «Կարոտից առած ցավ՝ կարոտ հուշեր» ֆիլմը. ամեն տարի մեկ թեմատիկ փաստավավերագրական ֆիլմ պատրաստելը դարձել է կազմակերպության գործունեության «ատրիբուտներից» մեկը...

25.06.2003



Այ, հիմա գլուխս հանգիստ կդնեմ բարձին: Երեսաներին ճանապարհեցի Երեւան, որպեսզի այնտեղից էլ թռչեն Կիպրոս...

20 հոգի եմ: Բոլորն էլ՝ անհայտ կորած ազատա-

մարտիկների զավակներ: Ամառ է, արձակուրդ, թող մի լավ հանգստանան, միջերկրականի յոդով հարուստ օդը շնչեն, ամրանան, մի քիչ էլ «աշխարհ տեսնեն»՝ գան: Մեկ այլ խմբի էլ Հունաստան էինք ուղարկել, շատ գոհ վերադարձան: Հայաստանյան ճամբարների մասին չեմ խոսում, դրանք կան ու կան:

5.07. 2003



Սպայի տանը կայացավ մեր «Գթասրտության ժամանակը» փաստագրական ֆիլմի պրեմիերան: Դահլիճում ասեղ զցելու տեղ չկար... Քանի որ ցուցադրումը համընկավ կազմակերպության 5-ամյա հորելյանը նշելու հետ, միջոցառման բոլոր մասնակիցներին, շուրջ 1000 հոգու, բաժանել էինք այդ նպատակով լույս ընծայած բրոշյուր: Ֆիլմի ստեղծման պատմությունը բավականին հետաքրքիր է:

Սցենարը գրել է «Արցախ» թերթի գլխ. խմբագրի առաջին տեղակալ, բանաստեղծուհի եւ արձակագիր Նվարդ Ավագյանը, ռեժիսորն էլ մեր նույն Հրայրն է: Իսկ այ թե ով պետք է կադրից դուրս հնչեցներ տեքստը՝ դարձել էր խնդիր: Բանն այն էր, որ նպատակ ունեինք ֆիլմը հնչեցնել երեք լեզվով՝ հայերեն, ռուսերեն ու անգլերեն: Տիտղոսա-

թերթի վրա հենց այդպես էլ գրված է: Սակայն իրականում հասնել այդ ամենին չկարողացանք: Դա անելու համար որոշակի գումար էր պահանջվում, որն, ավա՛ղ... Որոշեցինք այդ բացը «լրացնել» կարդացողի ծայնով, ինչի համար պետք եղավ դիմել, թեև ինքներս էլ չէինք հավատում մեր բռնած գործի հաջողությանը, ոչ այլ ոքի, քան՝ Սոս Սարգսյանին: Նվարդ Արամովնան հավատացրեց, որ բեմարվեստի՝ նրա նման հսկան ու նրա նման մեծ հայր չի կարող մերժել հայրենյաց՝ ոչ իրենց կամքով անհայտ կորուսյալ զավակների խնդիրը էկրանից հնչեցնելու խնդրանքը... Այդպես էլ եղավ, Վարպետը հանձն առավ կատարել գործը ու թեև շատ հիվանդ էր՝ արեց այն:

Պրեմիերային ներկա էին պետության, կառավարության ղեկավարները, իշխանության մյուս թեւերի պատասխանատուները, հյուրեր Չայաստանից ու Սփյուռքից: Ֆիլմի մասին խոսեցին շատերը: Բոլորի ելույթներն էլ ավարտվում էին նույն մաղթանքով՝ համբերություն ձեզ ու բարի վերադարձ տղաներին...

5.10. 2003



Ես ու Ռիմա Առաքելյանը Թբիլիսի էինք գնացել՝ էլի ռազմագերիների հիմնահարցով խորհրդակցության մասնակցելու: Վերադառնալուց Երեւանի օդանավակայանում ականատեսը դարձանք 3 ադրբեջանցու յուրայիններին հանձնելու փաստի: Այ այդպես է. մերոնք հա բարի կամք են դրսեւորում, իսկ նրանք՝ «մեզ մոտ հայ գերի չկա»... Մինչեւ Ե՞րբ ենք հանդուրժելու այդ սուտն էլ, անարդարությունն էլ: Ինչեւէ, ես էլ, հայաստանցի իմ կուլեգան էլ տուն գնալու կապակցությամբ շնորհավորեցինք (սրտանց) այդ տղաներին եւ միաժամանակ խնդրեցինք հայրենիք հասնելուց հետաքրքրվեն մերոնց ծակատագրով... Խոստացան, բայց դե... Ժողովուրդն ինչպե՞ս է ասում՝ ձյան վրա գրիր, արեւին դեմ արա...

10.11.2003



Լրացել էր կյանքիս 50 տարին... Ե՞րբ թռավ այդքան ժամանակը: Մեր «աղջիկները» հանգանակ արին ու ոսկե մատանի նվիրեցին, ինչպես ընդունված է հայության մեջ՝ մասնակիցների «ցուցակով» հանդերձ: Մատանին տուն չտարա, «բիրկան» էլ չպոկեցի, վարչության անդամներին ասա-

ցի՝ այստեղ կպահեն այնքան, մինչեւ մեր տղաներից մեկը երեւա, ու հարսանիքին նվիրեն իրեն...

Հետո ինչե՛ր չանցան գլխովս: Այս աշխարհում բազում բարեկամներ ունեցող ամենալավ մարդուն անգամ կարող է, չէ՞, բաժին ընկնել առնվազն մեկ չարական... Ես գուցե «ամենալավը» չեմ, բայց որ վատն էլ չեմ, հաստատ է: Իմ բաժին չարականը, գիտակցաբար թե անգիտակցորեն, ժամանակին շատ ցավ ու անհանգստություն պատճառեց ինձ: Այնքան՝ որ իրավապահ մարմինների հետ անգամ գործ ունեցա: Իմ գործունեությունը, սակայն, միշտ այնքան է լինում թափանցիկ եւ օրինական, որ ամիսների քաշքշուկից հետո կայացված վերջնավճիռն իմ օգտին եղավ: Մինչ այդ, սակայն, երբ իրավապահները եկան գրասենյակ, «հայտնաբերեցին» վերոնշյալ մատանին: Ես նրանց բացատրեցի, որ այն աշխատանքային ընկերներիս հորելյանական նվերն է: Հարցրին՝ իսկ ինչո՞ւ է այստեղ, ինչո՞ւ տուն չեք տարել: Ցույց տվի գրասենյակի պահեստում նույնպես խնամքով պահվող հարսանեկան զգեստը եւ ասացի այն, ինչի մասին արդեն գրել եմ վերը:

Նրանք ցնցվել էին: Դա հիմա էլ, կարծում եմ, կարող են հաստատել այն ժամանակ ԼՂՀ գլխավոր դատախազության քննչական բաժնի ավագ դատախազ, արդարադատության առաջին կարգի խորհրդական Յուրի Ստեփանյանն ու նույն դա-

տախազության պետական շահերի պաշտպանության բաժնի դատախազ Արմեն Սարգսյանը:

4. 04. 2004



Երեկ «քաշքշուկի» մասին վերհիշելուց ոնց էր՝ բաց թողեցի մի կարեւոր հանգամանք: Դատից տառացիորեն մի քանի օր առաջ մեր փոստը նամակ բերեց Արցախի ԿԿ Ստ.Շահումյանի անվան երիտասարդական միության անունից: Ես, որ հանձնվողը չեմ, կարդալուց լաց եղա: Ուրախությունից՝ առ այն, որ աշխարհի արդարամիտ մարդիկ, այնուամենայնիվ, ավելի շատ են, քան անարդարները: Այդպես չլիներ, աշխարհը փուլ կգար հիմնովին: Չետո իմացա, որ այդ կազմակերպության ներկայացուցիչները ներկա էին լինում դատական նիստերին եւ ծանոթ էին իմ «գործի» ընթացքին: Նամակում (այն պահում եմ «գործին» վերաբերող մյուս թղթերի հետ) ասված է հետեւյալը (մեջբերում եմ ամբողջությամբ). «Մենք հիացած ենք Ձեր անկոտրում կամքով ու անսպառ եռանդով: Այս օրերին, երբ Դուք փոշու մեջ կորած՝ զբաղված եք անհայտ կորած ազատամարտիկների հուշաթանգարանի շինարարությամբ, անհեթեթ ասեկոսություններով վրդովում եմ որդեկորույս

մոր հոգին, որը լի է վշտերով ու տազնապներով: Կարելի է հասկանալ սոցիալական շատ ծանր վիճակի մեջ գտնվող մեր ժողովրդին, սակայն ճշմարտությունը միայն մեկ երես ունի՝ փաստը կատարած գործն է: Համբերություն ու համառություն Ձեզ՝ անհայտության մեջ գտնվող որդիներին տուն բերող կածանի մացառուտները հաղթահարելու գործում:

Ստի ու խարդախության ոտքը, բարեբախտաբար, կարճ է լինում:

Մենք մեծ հավատով սպասում ենք անհայտության մեջ գտնվող մեր հարազատներին»:

5.04.2004



Չորս տարի է՝ կռվում ենք (կարծում եմ, այս դեպքում ճիշտ բառը հենց սա է) տղաների հուշարձանի համար: Տեղի հարցն ու ֆինանսավորումը հա՛ճոճվում է: Իշխանությունների մտքինն ինչ է, չեն հասկանում: Մայրերը պայթում են, ես էլ չգիտեմ ինչպես համբերության կոչեմ նրանց, ինչպես հորդորեմ պատկան այրերին՝ հարցն ի վերջո լուծեն: Նյարդերս ասես սղոցված լինեն: Շուրան բողբում է՝ արդեն տանն էլ հանգիստ խոսել չես կարողանում...ճիշտ է ասում:

14.05.2004



«ՑԱՎ. Մուշկապատ». մեր այս կարճամետրաժ ֆիլմում մուշկապատցի Շահմուրադը պատմում է ադրբեջանախորհրդային օմոնի կողմից իր կալանավորվելու եւ Բայիլի բանտում անցկացրած օրերի մասին: Նույն ֆիլմում հանդես է գալիս մուշկապատցի մեկ այլ նախկին կալանավոր՝ տեղիս հայրենապաշտպան ջոկատի հրամանատար Նորայր Յովսեփյանը. նկարագրում է ազերիների կողմից իրեն բաժին հասած կտտանքները: Նրա կինն էլ պատմում է, թե ինչպես է 7 գյուղերից գումար հանգանակել՝ ամուսնուն ազատելուն անհրաժեշտ փրկագնի համար: Այդ ֆիլմը թուրքական կողմի դաժանությունը մերկացնող հզոր վկայություն է: Նորայրը վերադառնալուց գյուղապետ էր աշխատում, բայց բանտում խարխլված առողջության պատճառով երկար կյանք չունեցավ. վախճանվեց 46 տարեկանում: Երեք տղաներից ոչ մեկին դեռ չէր պսակել...

24.06.2004



Իշխանության ներկայացուցիչներից եկել էին գրասենյակ՝ խոսելու (ընդամենն էլի խոսելու) հուշարձանի հարցով: Բաղդասարյան Գերասիմը, մենք Գարո ենք ասում (նրա անհայտ կորած տղան սպա է եղել) եւ Շուրան այլեւս չդիմանալով՝ ի դեպ սրտի նոպա ունեցավ և հազիվ կարողացավ ասել. «Ինչո՞ւ եք «հայոց հարց» սարքում... Որքա՞ն կարելի է ձգձգել: Մեր տղաներն էլ են զինվոր եղել, նրանցից ոչ-ոք հիմա ռեստորանում նստած բարիքներ չի վայելում, ոչ էլ ենթակա է տաք անկողնում հանգիստ մեռնելու: Նրանք հիմա՛ էլ են զինվոր... Վախկոտ կամ դավաճան որ լինեին, Ադրբեջանի հեռուստատեսությամբ տասն անգամ ցույց տված կլինեին, չե՞ք հասկանում: Մրցույթով անցած հուշարձանը եթե չի ստացվում, նրանք, ինչ է, գոնե մի խաչքարի՞ էլ չեն արժանի»:

Այդ գաղափարից իսկույն կառչեցին: Բա ո՞նց, համեմատել իսկ չի կարելի. խաչքարը մի ահագին էժան կնստի...

Դե, ինչ. մենք հոգնել ենք: Հոգնել ենք պատերազմելուց: Պատերազմած երկրում ենք ապրում, էժանով պիտի բավարարվենք: Հոգնե՛լ ենք: Գիտեմ՝ բայց ինչ արած...

Չերկարացնեմ. այսօր խաչքարի ու միաժամանակ հուշաթանգարանի բացումը եղավ: Հանդի-

սավորությունից գանգատվելու տեղ չունենմ. ամեն
ինչ տեղը տեղին էր: Երկրի նախագահն անձամբ
կտրեց ժապավենն ու մի կողմ քաշեց քողը: Արա-
րողությանը ներկա էին իշխանության բոլոր թեւե-
րի ներկայացուցիչները: Շատ ժողովուրդ կար՝
ծով... Դրա համար էլ ենք շնորհակալ թե՛ պետու-
թյան ու կառավարության ղեկավարներից, թե՛ մեր
հասարակայնությունից: Ոնց որ մեր սիրտը խրված
փշերից մեկը հանեն...

29.06.2004



Այսօր տղաների հուշաթանգարան այցելեցին
նախագահ Ղուկասյանը, ժաննա Գալստյանը, Սեյ-
րան Օհանյանը եւ այլ բարձրաստիճան անձինք:
Կազմակերպության աշխատանքային սենյակնե-
րում եւ հուշասրահում լինելուց, հստակ կանոնա-
կարգված մեր արխիվին, ստեղծած կինոդարա-
նին, հուշաթանգարանի ցուցանմուշներին ծանո-
թանալուց հետո Արկադի Արշավիրովիչն ասաց.
«Մենք հասարակական շատ կազմակերպություն-
ների ենք ֆինանսական միջոցներ տրամադրել,
բայց ոչ մեկում աշխատանքի նման ծավալի չենք
հանդիպել... Տիկին Վերա, պատրաստ ենք ձեզ
աջակցելու հետագա ծրագրերում»:

25.07.2004



Երեւի այսպես է լինում, երբ ասում են՝ այսինչի խոսքը գործից չի տարբերվում: Երկրի նախագահն իր խոստումը կատարելու առաջին քայլն արեց. բարեգործական կանաչի օգնությամբ մեզ փոխանցեց 500 (հինգ հարյուր) եվրո: Շնորհակալություն նրան էլ, այն բարեգործին էլ, ով հայապահության գործին է ծառայեցնում վաստակածի մի մասը:

1.08.2004



Հուշաթանգարանը վերակառուցելու-վերանորոգելու եւ կահավորելու համար մոտ 2 միլիոն պարտք էի մնացել առետրի ու շինարարական կազմակերպություններին: Դա այն դեպքում, երբ սեւագործ բանվորների դերում հաճախ մենք ենք հանդես եկել՝ վարչության անդամներն ու կազմակերպության անդամներից ոմանք: Չորս տարուց հետո վերջապես երկրի ղեկավարի ցուցումով այդ գումարը պետբյուջեից հատկացվեց մեզ, ու պարտքը մարեցինք:

Ես շնորհակալ եմ հատկապես առետրի այն կետերի տերերին, ովքեր համբերատար սպասեցին խնդրի լուծմանը՝ շատերն անգամ չհիշեցնելով դրա մասին... Չորս տարի: Շուկայական հարաբե-

րությունների պայմաններում: Լինելով սեփականատեր: Մանվելը, Շուրիկը, Բորյան... Ումից շինանյութեր են վերցրել:

Նախագահ Ղուկասյանը մեզ մի անգամ էլ օգնեց 2 հազար դոլարի չափով: Մեր մուտքերի 1 դրամն անգամ ֆիքսում ենք հաշվապահական գրքերում: Գլուխը հանգիստ բարձին դնելը լավ բան է, բացի այդ էլ եթե կազմակերպություն ես, պարտավոր ես հաշիվ-հաշվառքդ կանոնակարգած պահել: Մանկուց չեմ կարող տանել անփութությունը: Նախ ծնողներս են (հատկապես մայրս) ինձ այդպես սովորեցրել, հետո՝ կյանքի հանգամանքները...

10.11.2004



Այսօր այնպիսի մի բան պատահեց, որ ցնցեց ինձ մինչեւ հոգուս խորքը: Մեր գրասենյակ եկավ մի մարդ: Ասաց հադրութքի է: Սուրիկ Աթայան: Աչքերում մի տեսակ տխրամածություն կար: Կարծեցի անհայտ կորածի հարազատ է, դրա համար է մեզ մոտ եկել, բայց մեկ էլ մտածեցի. եթե նման բան լիներ, վաղուց կիմանայի, Չադրութի շրջանում մեր ներկայացուցիչը՝ Փիրուզան ասած կլիներ: Չէ, այստեղ ուրիշ բան կա, ինչ՝ պարզ չէ, բայց որ այս մարդն էլ է կորուստ ունեցել, չեմ կասկածում:

Ջրուցեցինք, բացվեց: Ասաց՝ ժամանակին, այո, մեծ ցավ է ապրել. իր երեխաների մորն է կորցրել... Հուսադրեց՝ դուք դիակները չեք տեսել, գուցե դեռ կերելան, դիմանալ ու սպասել է պետք: Երեւում էր՝ սրտառուչ մարդ է: Այդ պահին ներս մտավ մերոնցից մեկը ու թե՛ ծնունդդ շնորհավոր, Վերա (մայիսի 15-ը իրոք ծննդյանս օրն է): Հաղորդեցի այցելուն ասաց՝ կներեք, ես մի քանի բուսակներով դուրս գամ, գործ ունեմ, հետո կշարունակենք զրույցը, ասելու բան ունեմ: Ժամանակ անց վերադարձավ ստվարաթղթե մի տուփի ձեռքին եւ իմ կողմը մեկնելով՝ ասաց. «Սա էլ իմ կողմից, տիկին Վերա, Ձեր ծննդյան կապակցությամբ»: Այնքան անսպասելի էր դա, որ առաջին պահ հապաղեցի շնորհակալություն հայտնել... Բայց առավել զարմանալին դեռ առջեւում էր: Դիմելով ինձ ու Շուրային՝ Սուրիկը հարցրեց. «Կարելի՞ է ձեր տուն հյուր գալ»: Ամուսիներով իրար նայեցինք: Դե, հայ մարդ ենք, հո չէինք ասելու «չէ»:

Երբ հասանք մեր հինգհարկանի շենքի բակը, հյուրն սկսեց հետաքրքրվել շենքի ջրամատակարարման համակարգով, ինչն ավելի մեծ տարակուսանքի մեջ զցեց մեզ: Իսկ նա, ինքն իրեն մտմտալով՝ թե դա լավ է, ուրեմն՝ հնարավոր է: Ի՞նչն է հնարավոր: Ասաց՝ սրտանց ուզում եմ մի լավ գործ անել ձեզ համար, ա՛յ այն ազատ տեղը ձեր կորած տղայի հիշատակին մի աղբյուր-հուշարձան կա-

ռուցել... Առաջարկից շատ հուզվեցինք, բայց ես մերժեցի: Ասացի այս թաղում չորս տասնյակից ավել զոհվածներ ու անհայտ կորածներ կան, ես չեմ կարող իմ տղային առանձնացնել նրանցից, եթե նման բան կառուցվելու լինի՝ պետք է վերաբերի բոլորին, իսկ դա մեծ գումար է պահանջելու: Մի պահ մտածելուց հետո հյուրն ասաց՝ ավելի լավ, թող լինի բոլորի համար... բայց կառուցել անպայման պետք է, մեծ թաղ է: Ու առ այսօր հույսով ենք, որ մեր թաղամասում ևս կկառուցվի հուշարձանադբյուր:

15.05. 2006



Մի կին եկավ մեզ մոտ՝ գրասենյակ: Արզիկ Մինասյան: Նախկին լեհիճնավանցի: Ասաց՝ Ալվարդ Ալեքսանյանի եղբոր կինն է: Ալվարդի նկարն էլ, «անձնական գործն» էլ մեզ մոտ կա: Անհայտ կորել է 1992 թվականի ապրիլի 10-ի Մարաղայի ողբերգական իրադարձությունների ժամանակ: Թուրքերը հանկարծակի խուժել են գյուղ, եւ ծնողները հազիվ հասցրել են հարսին, երեխաներին ու 23 ամյա դստերն՝ Ալվարդին թաքցնել տանիքի տակ: Իրենք ծվարել են բակի չորանոցում, որպեսզի թշնամին մտածի, որ տանը միայն երկուսով են:

Տանիքում գտնվողները տեսան, թե գազաններն ինչպես տանկի տակ տրորեցին հարեւանին՝ Բախշի Մովսիսյանին, մյուսի՝ Բորիսի գլուխը կտրեցին սղոցով... Մարաղացիներին գերության քշելիս տեսան: Ալվարդի հորն ու մորն էլ սպանեցին: Դա էլ տսնելով՝ 23-ամյա օրիորդն իրեն չկարողացավ տիրապետել՝ իջավ տանիքից ու ճչալով վազեց հոգին ավանդող ծնողների կողմը: «Լավ էլ սիրունն է,- գոչեցին թուրքերը,- էս էլ մեր պարգեւայինը»: Ալվարդին գերի տարան:

Ջարմանալ կարելի է, թե ճակատագիրը երբեմն ինչ խաղեր կարող է խաղալ մարդկանց գլխին: Ալվարդի եղբայր, Արզիկի էլ տեգր՝ ազատամարտիկ Արթուրը կռվում անհայտ կորավ, բայց նախախնամության կամքով որպես ռազմագերի՝ հայտնվեց Միր-Բաշիրի շրջանի Խորուլու գյուղում, որին մերձակա մեկ այլ գյուղում պահվում էր քույրը: Վերջինս համեմատաբար խղճով մարդու տան էր ապրում, քանզի այդ թուրքն օգնեց, որ քույր ու եղբայր հանդիպեն իրար: Եվ Ալվարդը կազմակերպեց Ասկյար անունով թուրքի տնից Արթուրի փախուստը: Եվ տղային հաջողվեց հասնել Թալիշի մեր առաջապահ պոստին... Թե հետո ինչ է եղել իր՝ Ալվարդի հետ, ոչ-ոք չգիտի: Արզիկի անունուն զոհվելու բախտ էր վիճակված... «Արթեն բիլեթ ըմ յեր կալալ, Ռուսաստան ըմ քինում...», - արցունքն աչքին՝ ասաց Արզիկը:

Տեր աստված, ի՜նչ ողբերգությունների միջով է անցել եւ անցնում այս ժողովուրդը: Մեկս մյուսի տառապանքին նայելով՝ դիմանալու կամք ենք թելադրում մեզ:

18.07.2006



Տեր Աստված, ի՜նչ կլինի այնպես անես, որ վաղաժամ մահ չլինի: Անհայտ կորած ազատամարտիկների կանանցից արդեն շատերը չկան... Եվ խնդիրն այն է, որ դրանք տարիքի հետ կապված մահեր չեն: Գրեթե որպես կանոն՝ վախճանվում են ծանր հիվանդություններից: Հիմնականում՝ սիրտանոթայինից, դիաբետից, օնկոյից: Թող բժիշկներն ինչպես ուզում են բացատրեն, ես դա կապում եմ նյարդային համակարգի վաղաժամ քայքայման հետ: Արդեն կորցրել ենք 84 ծնողի՝ հիմնականում կանանց: Բայց վերջին դեպքը ահավոր ծեւով է ցնցել մեզ: Անհայտ կորած ազատամարտիկ Անատոլի Պետրոսյանի տիկնոջ՝ Կարինեի մահը նկատի ունենմ:

...Այդ օրը եկավ գրասենյակ, բայց չկարողացավ բարձրանալ սանդուղքի աստիճաններով, շնչափն էր լինում: Օգնեցինք, բարձրացրինք: Պատմեց, որ վատ է զգացել՝ դիմել բժշկի, ու պարզվել է, որ սրտային լուրջ հիվանդություն ունի, փրկության միակ ելքը վիրահատությունն է. որը մեծ գու-

մար արժե... Ինչո՞վ կարող էինք օգնել: Ստածել էր պետք, դռներ ծեծել, օգնության համար ատյանների դիմել, իսկ դա ժամանակ էր պահանջում: Վարչության անդամներով որոշեցինք գոնե մեկ-երկու «օրվա ծախսի» գումար տալ: Չհրկիզվող պահարանում այդ պահին ընդամենը մի 10 հազարանոց կար, տվեցինք, ճանապարհեցինք, իսկ երկու ժամ անց մահվան լուրն առանք: Սրտի նույնպես նոր ուժով էր կրկնվել...

Երեխաները մնացել են երկկողմանի որբ: Հատկապես Մարատը, որ դեռահասության տարիքում է... Տեր, մեզ ազատիր այս իրոք կենաց ու մահու պատերազմից, հենց այնպես չենք ասում, որ այն մեզ համար դեռ չի վերջացել:

16. 09.2006



Իմացել են, որ մեր որոնողական աշխատանքի մասին լսելով, Հասանդայայի՝ մեզ հետաքրքրող տարածքը թուրքերն առավել անմատչելի են դարձրել, իրենց կողմից ավելի պնդացրել, չգիտեմ որքանով է ճիշտ՝ իբր երրորդ զատիչ գիծ էլ են քաշել, ականները խտացրել: Այնքան՝ որ նույնիսկ ԵԱՀԿ ներկայացուցիչներին չի հաջողվում լինել այնտեղ:

17. 09.2006



Մեզ այսօր այցելեցին, ԱԿԱՅՄ սրահներում շրջեցին Եվրախորհրդի Խորհրդարանական վեհաժողովի՝ անհայտ կորածների հիմնախնդիրներով զեկուցող, հոլանդացի սենատոր Լեո Պլացվոետը եւ վեհաժողովի կոմիտեի քարտուղար Մարկ Յեվիլեն:

Ջրուցեցին վարչության անդամների հետ: Ուշադիր լսում էին: Եվրոպացուն հատուկ քաղաքավարության դրսեւորում էր թե՛ ավելին՝ չգիտե: Է՛հ, այդպես գալիս-խոսում-գնում են, արդյունքում՝ մեզ համար ոչ մի տեղաշարժ:

18.09.2006



Գրեթե ամեն տարի ստիպված ենք լինում փոխել՝ թարմացնել վարչության անդամների ցուցակը: 7 հոգու արդեն անվերադարձ կորցրել ենք... Էլի սիրտ-անոթային եւ օնկո-հիվանդություններից: Ցավը, կարոտն ու սպասումը սպանում են նրանց:

15.10.2006



Վերջերս մեկ-երկու տեղից լուր էինք առել, թե Թուրքիայում Ադրբեջանից տարված հայ բանտարկյալներ կան: Խելքից հեռու բան չէր՝ եթե նկատի ունենանք երկու երկրների եղբայրական կապն ու «ընդհանուր հետաքրքրությունը» մեր նկատմամբ... Ամիս չանցած էլ զանգեց մեր քաղաքի կին մտավորականներից մեկն ու պնդեց հանդիպման վրա: Ասաց՝ ինչ ասելու եմ, հեռախոսի բան չէ: Հանդիպեցինք:

Պատմեց, որ իր բարեկամներից մեկը գործով Ատամբուլում է եղել, եւ այնտեղ մեկը հատուկ ցանցապատ ցանկապատի ետեւից լսելով իր հայերեն խոսքը, հարցրել է՝ ո՞ր կողմի հայ ես, ախպեր... Լսելով Ղարաբաղի անունը, աղաչել է՝ ես բալլուջեցի Գաբալն եմ, հարազատներիս կասեք, որ կենդանի եմ, չգիտեմ ինչու, մեզ հապշտապ այստեղ են տեղափոխել Բաքվից:

Միրոս ասես կանգ առավ: Ականջներումս խշշոց էի զգում, երբ զրուցը նկերուհիս հարցրեց. «Գաբալ անունով անհայտ կորած ունե՞ք»: Ասացի՝ Գաբալն անուն չէ, դա որդուս գործընկերոջ ու մարտական ընկերոջ՝ Գառնիկ Աղաջանյանի մականունն է...

Մտածում էի՝ ի՞նչ անել: Միայն բառացի տեղեկության վրա հիմնվել չէի կարող, հարկավոր էր

ինչ-որ ձեռով ճշտել փաստը, որպեսզի հիմք ունենայի դիմել համապատասխան մարմնի... Վարչության անդամներին պատմեցի այդ մասին, ժաննա Թավրիզյանն ասաց. «Կլխա՛վտ շոռ տամ, Վերա, էլիա մեր մաշի սրտավը տուվրս, եր կաց քյինի էտ պրիշակը, տես հինչըս կարում անիս... Բալի լիա մին պեն կտեռնա՝ մնըցըծներեն հղեն էլ պեց անե»։ Անհայտ կորած ազատամարտիկ Ռազմիկի մոր աղաչանքը զանց առնել չկարողացա, թեև նման ուղևորությունների դառը համը չէի մոռացել։

...Ստամբուլում եմ։ Որպես գրոսաշրջիկ։ Այլ հնարավորություն չկար ինձ համար։ Յետս միայն լուսանկարչական ապարատ է, նույնիսկ գրանցող սարք չեմ վերցրել. մեկ է, օտար օդանավակայանում ստուգման ժամանակ ինձնից խլելու էին։ Ընդհանուր ծանոթ եմ գտել, հետը շրջում եմ «որոշակի» վայրերով, խոսում մարդկանց հետ, ովքեր կարող էին ինչ-որ տեղեկության տեր լինել ինձ հետաքրքրող հարցում։ Տեղացի մի հայի հետ մոտենում եմք մի շենքի, որը հիմնականում պարսպապատ է։ Ասում է՝ այստեղ էլ եմ պահում կալանավորներին, բայց ներս մտնել կարող եմ միայն դրա համար հատուկ թույլտվություն ունեցողները, «Կարմիր խաչի» նման միջազգային կազմակերպությունների ներկայացուցիչները եւ այլն։ Կալանավորներին աշխատանքի տանում-բերում են ուժեղ հսկողության տակ, այն էլ, չգիտես ինչու, ոչ

միշտ նույն ժամերին...

Օրերն անցնում են, իսկ ինձ չի հաջողվում ոչ մի արդյունքի հասնել: Այս էլ հերթական հիասթափությունս: Ստեփանակերտ եմ վերադառնում ներքուստ փշրված:

Կախարդական շրջան ենք ընկել՝ դուրս գալ չկա:

9.11.2006



Այսօր՝ Ռազմագերիների միջազգային օրը, մեզ մոտ հանդիսավոր արարողություն էր. բուժկետ բացեցինք... Այն սպասարկելու է անհայտ կորած ազատամատիկների հարազատներին: Հիվանդներ շատ ունենք, դե գոնե նվազագույն բժշկական օգնություն կկազմակերպենք նրանց համար: Բուժկետի բացմանը ներկա էր անձամբ առողջապահության նախարար Ջոյա Լազարյանը: Բուժկետի համար դեղորայք եւ բժշկական այլ պարագաներ էին բերել: Նվերներից հատկապես ուրախացրեց արյան ճնշումը չափող գործիքի առկայությունը: Մեր ճակատագիրն ու վիճակն այնպիսին է, որ նույնիսկ ժողովի կամ ցանկացած հարցի քննարկման ժամանակ կարող է մեկնումեկը վատ զգալ իրեն, առաջին օգնության համար անհրաժեշտ

բժշկական միջոցներ ձեռքի տակ ունենալը շատ
լավ է: Պայմանավորվել ենք, որ հանրապետական
հիվանդանոցից բժիշկներ՝ թերապետ Լյուբա Յա-
րությունյանը, վիրաբույժ Արմո Գրիգորյանը եւ Էն-
դոսկոպիստ Արամ Գրիգորյանը ամիսը մեկ անգամ
լինեն բուժկետում եւ ընդունեն մեր հիվանդներին,
լսեն նրանց բողոքները, խորհուրդներ տան, ստա-
ցիոնար բուժման անհրաժեշտության դեպքում՝ ու-
ղեգրեն հիվանդանոց՝ անվճար բուժման եւ այլն:

Մենք հիպերտենզիայով տառապող մի քանի հի-
վանդ ունենք, եւ ուղղակի բացմանը բուժքույր Մա-
րինե Գրիգորյանը, որը միաժամանակ անհայտ կո-
րած ազատամարտիկ Կարո Գրիգորյանի կինն է,
չափեց իրեն վատ զգացած Անգին Աղաջանյանի՝
անհայտ կորած ազատամարտիկ Գառնիկի մոր
ճնշումը, որը բարձրացել հասել էր 220/120-ի...
Գուցե՝ հուզմունքից, գուցե դրանից անկախ՝ չգի-
տեմ: Ժամանակին դեղ ընդունեց, եւ վտանգը
կանխվեց: Չէ, իրոք ճիշտ ենք արել՝ բուժկետը բա-
ցելով: Լազարյանին շնորհակալություն՝ մեզ հաս-
կանալու եւ ընդառաջելու համար: Նաեւ բոլոր
նրանց, ովքեր պարտավորվել են անվճար կատա-
րել հավելյալ գործը...

11.04.2007



Լույս տեսավ մեր կազմակերպության պաշտոնաթերթի անդրանիկ համարը: Կոչել ենք «Հուլյսի ճանապարհ»... Մեզ այդ առնչությամբ շատերն են շնորհավորել՝ պետական այրերից սկսած՝ հասարակական կազմակերպությունների ներկայացուցիչներով ավարտած: Արցախի ժուռնալիստների միության նախագահ Կիմ Գաբրիելյանի շնորհավորական խոսքում ասված է. «Ցանկացած նոր պարբերականի ծնունդ նշանակալից երեւոյթ է Արցախի մշակութային կյանքում: «Հուլյսի ճանապարհ»-ի պարագայում դա մի քիչ ավելին է, քանզի լրատվամիջոցի սոսկական առաքելությունից բացի, թերթը նաեւ փարոսի դեր պիտի կատարի անհայտ կորած ազատամարտիկների համար: Թող թերթ-փարոսի այդ լույսը առատ լինի անհայտ կորածների տունդարձի ճանապարհին: Հուսանք ու հավատանք»:

29.04.2007



Հաղթանակի հերթական տոնակատարությունից տուն են եկել ու թեւ հոգնած՝ հանգստանալ չեն ուզում: Ավելի լավ է շարադրեն երեկվա եղածի մասին: Մեզ մոտ՝ գրասենյակում մեծ ուրախություն էր. վերջապես ավարտել ենք մեր անհայտ կորած

հերոս տղաներից մեկի՝ պռոշյանցի Կարոտ Մկրտչյանի անվան գրադարանի կայացումն ու կահավորումը: Արդեն հազարին մոտ գրքեր ունենք՝ հիմնականում հայրենասիրական եւ պատմա-քաղաքական գրականություն: Կարոտը ֆիդայական ջոկատի շատ խելոք ու կորովի հրամանատար է եղել, կռվել է շատ տեղերում, անհայտ կորել է Շահումյանի շրջանում մղված դաժանագույն մարտերից մեկում:

Թեև նեղվածք էր՝ շատ մարդ էր ներկա բացմանը: Հուզիչ ելույթներ եղան: Իսկ ժապավենը կտրեց անձամբ պաշտպանության նախարար Սեյրան Օհանյանը, բնականաբար՝ ԱԿԱՀՄ նախագահի հետ միասին:

9.05.2007



Այսօր տեղի ունեցավ մեր ռազմահայրենասիրական կաբինետի բացումը: Վաղուց էի ուզում անել դա: Որպեսզի դրսից այս թանգարանն այցելողն իմանա, որ մեր 239 անհայտ կորած ազատամարտիկները մաս ու միավորն են եղել հաղթական բանակի, այն փոքրաթիվ բանակի, որը կարողացավ ոչ միայն դիմակայել՝ այլև հրադարձ խնդրել տալ թե կենդանի ուժի ու թե տեխնիկայի թվաքանակով իրեն բազմիցս գերազանցող թշնամուն:

Մենք այս թանգարանն ստեղծել ենք ոչ թե «թաշկինակ բռնելու»՝ լաց լինելու համար, այլ ցույց տալու, որ այն մեր ազատամարտի տարեգրության մի մասն է եւ մեր հակառակորդի անմարդկային էությունն ու պահվածքը մերկացնող հզոր փաստ. պատերազմն ավարտվելուց սովորաբար, միջազգայնորեն գործող համապատասխան օրենքի, գերիներին բաց են թողնում տուն, իսկ Ադրբեջանը դա չի անում:

Կաբիներտում ներկայացված են բանակի անցած հերոսական ուղին. մարտական դրվագներով լուսանկարներ, Արցախի հերոսների դիմանկարները եւ այլն:

Ժամավեճը կտրեցինք երկուսով՝ ԼՂՀ նորանշանակ Պաշտպանության նախարար Մովսես Հակոբյանն ու ես: Ներկա էին պետական ու կառավարական այրեր, սպաներ, ուսանողներ, հ/կ ներկայացուցիչներ, քաղաքական գործիչներ:

28.06.2007



Շատ են հուզված: Երեկ հերթական անգամ պետական մակարդակով նշեցինք Անհայտ կորած ազատամարտիկի հիշատակի օրը, իսկ այսօր «Հուլիսի ճանապարհուն» կարդացի շուշեցի երկու լավ մտավորականների՝ հունանիտար քուլեջի

տնօրեն Ալբերտ Խաչատրյանի եւ ԼՂՀ վաստակավոր ուսուցիչ Լարիսա Ղազարյանի բարեմաղթանքի խոսքը՝ թերթի առաջին համարի հետ կապված: Գրել են. «Մենք սրտի թրթռով ընթերցեցինք «Հուլյսի ճանապարհի» անդրանիկ համարը: Ողջունելի է կազմակերպության ու նրա ղեկավարի՝ Վերա Գրիգորյանի պրպտուններով լեցուն գործունեությունը: Բազմաթիվ հետաքրքիր ձեռնարկումների շարքը համալրվեց եւս մեկով. սեփական ամբիոն՝ մամուլ ունենալու նախաձեռնությամբ: «Հուլյսի ճանապարհ» անվանումը առանձնակի խորհուրդ ունի, այն երկար սպասումի, համբերության, ուժի, կամքի, արիության առհավատչյան է:

Թող խանձարուրում գտնվող «Հուլյսի ճանապարհը» առնականանա, ծավալվի ու դառնա թշնամու ճիրաններում գտնվող հայորդիների տունդարձի պողոտա...

Ծնունդդ շնորհավոր, «Հուլյսի ճանապարհ:
Թող հայ մտքի սլացքը բազմապատկվի:»:

30.06.2007



Տարիներն անցնում են, անհայտ կորած մեր տղաների երեխաները՝ մեծանում, մեծ կյանք մտնում: Հոգեկան բավարարություն են զգում, երբ մտածում են, որ եղել են պահեր՝ սատարել ենք նրանց, ինչ-որ խնդիր լուծել ընտանիքի համար: Բա էլ ո՞ր օրվա համար է կազմակերպությունը: Վարչության անդամներով արդեն մասնակցել ենք 38 հոգու պսակադրությանը: Որպես կանոն՝ կազմակերպության անունից ոսկե մատանի ենք նվիրում նորապսակներին: Երկու ընտանիքի համար նույնիսկ երկուական ոսկի գնեցինք. անհայտ կորած ազատամարտիկներ Մովսես Օհանյանի Իգոր Եւ Արթուր, Գրիգորի Ալուխանյանի՝ Մարատ Եւ Ռոման որդիների համար: Թող տղաների բախտն իրենց հայրերին բաժին ընկածից հեռու լինի, թող ապրեն առանց անհաջողության ու տառապանքի:

5.07.2007



Այսօր իմացա, որ «Ազգ» թերթը իր հուլիսյան համարներից մեկում տեղեկատվություն է տպագրել մեր թերթի անդրանիկ համարի մասին:

«Ուշագրավ է, որ Միությունը,- գրել է «Ազգը», - ունի նաեւ իր օրհներգը, որի հեղինակը ԼՂՀ պե-

տական օրհներգի հեղինակ Արմեն Նասիբյանն է: Իսկ տեքստն էլ պատկանում է վերոհիշյալ Միության ստեղծման նախաձեռնող, կազմակերպող եւ նախագահ-տնօրեն Վերա Գրիգորյանին»:

7.09.2007



Նոր ենք ըստ էության զգում հուշաթանգարանի գոյության նշանակությունը, մեր կատարածի արժեքը: Գնալով ընդլայնվում է թանգարան այցելուների թիվը: Այնտեղ արդեն հայրենյաց դասեր են անցնում...զինվորական եւ ուսանողա-աշակերտական կոնտինգենտի հետ: Արդեն մտածում են անհայտ կորած ազատամարտիկների թեմայով օրինակելի շարադրությունների մրցույթ հայտարարելու մասին: Այս հարցով կդիմեն քաղաքապետարանի կրթության բաժնին: Կարծում են, կընդառաջեն: Թող արտահայտվեն երեխաները: Դա կլինի տղաների հասցրած կատարածն ու հիշատակը մոռացության չտալու միջոց:

24.01.2008



Այսօր պատահեց մի բան, որի մասին հիշելուց հիմա էլ եմ փշաքաղվում: Մարտունու մի բնակչուհի, ներկայացավ «Ռայա» (այնքան հուզվել էինք, որ ազգանունը չհարցրի էլ), երկու եւս սեւազգեստ կնոջ հետ եկավ մեր գրասենյակ: Ասաց՝ ամուսնուս փակ դագաղը պատերազմի ժամանակ հանձնել ենք հողին, բայց օրերս ադրբեջանական բանտից (Բայիլից) տուն վերադարձած կադարձեցի մի 17 տարեկան տղա (ժամանակ առաջ արոտի տարած ոչխարներին փնտրելիս վրա հասած թանձր մշուշում ձիով սխալմամբ հայտնվել էր հակառակորդի տարածքում ու գերվել) եկավ մեր տուն ու թե՛ Ռաֆիկ ձյաձյան խնդրել է ձեզ հայտնել, որ ինքը կենդանի է...

- Այնքան անսպասելի էր, որ հարցրի՝ Ռաֆիկն ով է, այ տղա, ո՞ւմ մասին ես խոսում: Թե՛ քո ամուսնու, Ռայա տյոտ, դու (տվեց ամուսնուս ազգանունը) Ռաֆիկի կինը չե՞ս: Աչքերս մի պահ մթնեցին, ոտքերս թուլացան: Ասացի՝ մտածո՞ւմ ես ինչ ես ասում, իմ ամուսինը զոհվել է: Չէ, ասաց, նա կենդանի է, բանտում ես ամբողջ ժամանակ իրենց կամերայում եմ եղել: Երեւի գիտեր է, որ չեք հավատալու, ասաց՝ մերոնց որ ասես՝ թո՛նրում հաց թխելիս սխալվել՝ ծհանի սառը ծայրի տեղ շիկացած մասից եմ բռնել ու այրել աջ ձեռքիս բիլա-

կը, այ, տես՝ սպին հիմա էլ կա... Ես որ ասես, կինս կիմանա, որ իրոք կամ, չեմ մեռել: Տյոտա ջան, ես նրան խոսք եմ տվել ու չէի կարող տեղ չհասցնել նրա աղաչանքը: Սկեսուրս որ լսեց այդքանը, ինֆարկտ խփեց, անդամալույծ դարձավ...

Այդ հանդիպմանը ներկա էին եւ մեր աշխատակից Գայանեն ու այն ժամանակ լույս տեսնող մեր «Հույսի ժանապարհ» թերթի խմբագիր Ռոբերտ Եսայանը: Բոլորս էլ ցնցվել էինք: Ի՞նչ ասեինք այդ կնոջը: Պատերազմում ամեն ինչ էլ պատահում է, բայց տուժած կողմ ու իշխանություն՝ միասին որ տարիներով պատեպատ ենք խփվել, կարողացե՞լ ենք հաջողության հասնել: Թուրքը հա՛ ժխտում է մերոնց առկայությունն այնտեղ: Խորհուրդ տվեցի դիմել Կարմիր խաչին... Գուցե նրանց հաջողվի մի բան անել՝ ասացի:

9.02.2008



Գառնիկ Աղաջանյանի մոր՝ Անգիմի համար քաղցկեղն այլեւս ժամանակ չէր թողել... Գնացինք տեսության: Ավելի ճիշտ՝ հրաժեշտի... Մի քանի ժամ հետո հոգին Աստծուն էր ավանդելու: Դժվարանում էր խոսել: Սկզբում չճանաչեց ինձ: Սիրտս սեղմվել՝ խեղդում էր: Այնքան ուժեղ, արիակամ

Անգին ստվեր էր մնացել՝ այն էլ էր հալվում: Մեր կազմակերպության, վարչության ամենաակտիվ անդամն է եղել: Ինչե՛ր չենք տարել նրա հետ, ախր Սպարտակն ու Գառնիկն էլ իրենց հերթին են ընկերներ եղել, նույն համակարգում ծառայել, կողք-կողքի կռվել, նույն մարտում էլ անհայտ կորել: Չորս օրից հետո պիտի նշենք մեր տղաների հիշատակի հերթական տարեդարձը, եւ առաջին անգամ՝ այնտեղ ներկա չի լինի Անգինը...

Հիվանդի ծանր շնչառությունը մի պահ ընդհատվեց, ու մենք լսեցինք նրա պարզ ձայնը.

- Մատաղ ինիմ քեզ, Գագի՛կ, ծեր լոխճին ցավը տանիմ, յեշեցեք հա՛, մեյդս վեր տրած էլ ինի, 29-ին կքյինաք հուշարձանեն կոշտը, ժողովուրթեն նհետ նշիք տղորցը օրը... Սկանումը՞ք, անպայման կքյինաք...

Հոգեհանգստի սեղանին սեղանապետն այդ մասին բարձրաձայնեց, եւ մարդիկ շատ հուզվեցին լսածից: Այս ի՛նչ ժողովուրդ, ինչպիսի՛ հրաշք մայրեր ունենք: Հենց դրանում է թաքնված հաղթանակի արմատը:

24.06.2008



Այսօր՝ Անհայտ կորածների միջազգային օրը, մեզ՝ վարչության կազմին ու կազմակերպության եւս մի քանի անդամի, ընդհանուր թվով՝ 16 հոգու, ընդունեց ԿԽՄԿ Ստեփանակերտի գրասենյակի ղեկավար Ժակ Բարբերիսը:

Դիտեցինք «Արաբո» ջոկատի տղաների ճակատագիրը մասնակիորեն ներկայացնող՝ զարհուրելի փաստավաճկերագրական ժապավենը: Տղաների դիակների հետ ի՛նչ են արել թուրք գազանները... Նկատեցինք, որ նույն դիակները, կիսով չափ իրար գլխի տված՝ ընկած երեւում են մի քանի տեղում... Սրիկանե՛ր, դիակներով էլ են կեղծարարություն անում: Մենք հո գիտենք, թե հենց վերջին մարտում ջոկատն իրականում քանի հոգուց է եղել կազմված, եւ որ բացառված չէ, թե նրանցից կարող են լինել եւ կենդանի մնացածներ:

Պարոն Բարբերիսն ասաց, որ ԿԽՄԿ-ի գլխավոր նպատակն է պահպանել տուժածների կյանքն ու առողջությունը, թեթեւացնել նրանց վիճակը եւ ապահովել, որ հակամարտության (այս բառից գծվում են՝ մեր պարագայում ժամանակակից երկամյա լայնածավալ պատերազմը մեղմորեն կոչել հակամարտութ՞ուն) հետեւանքները (հիվանդություններ, վնասվածքներ, տարերք) վտանգի տակ չդնեն նրանց կյանքն ու ապագան:

Խոսեցինք այն մասին, որ ԿԽՄԿ-ն չպետք է իր տեսադաշտից դուրս թողնի մարդկանց կենսունակությունը վերականգնելու արմատական նպատակը: Որ անհայտ կորածների ընտանիքներին, հարազատներին օգնություն կարելի է տրամադրել տարբեր ձեւերով՝ ոչ միշտ սննդամթերքով կամ դրամական գումարով: Բարբերիսն ասաց՝ հարկավոր է շեշտը դնել կենսական ծառայությունների մատուցման ավելի օպտիմալ ձեւի վրա, այնպիսի օգնության, որը վերարտադրողական հատկություն ունենա... Դեռ պարզ չեմ պատկերացնում, թե կոնկրետ ինչի մեջ պետք է արտահայտվի դա, բայց հարցի նման դրվածքի հետ լիովին համաձայն եմ. միանվագ թեթև օգնությունները տան Կերակրողին կորցրած ընտանիքի համար խնդիր չեն լուծում:

30.08.2008



Այսօր ներկա էի մայրաքաղաքի թիվ 12 դպրոցի հերթական ուսումնական տարվա Առաջին զանգին: Ամեն տարի կրկնվող արարողությունը, մեկ է, հետաքրքիր էր: Եվ ամենահետաքրքիրը երեխաների հուզմունքն է, որ փոխանցվում է նաեւ մեզ: Միջոցառմանը ներկայացել էինք խմբով. ՀՄՊ եւ

աշխատանքի վետերանների միության նախագահ Ա. Մարտիրոսյանը, թոշակառու բժիշկ Ե.Աթայանը, սպաներ ԼՂՀ ՊԲ ուսումնական հրետանային դիվիզիոնից, ՊԲ քիմծառայությունից եւ այլոք:

Ինչպես միշտ՝ նման պարագայում, Սպարտակիս Առաջին զանգը հիշեցի...Թող էլ պատերազմի երես չտեսնենք, այդ մանուկները թող երջանիկ ապագա ունենան:

1.09.2008



Մեծ Բրիտանիայի խորհրդարանի լորդերի պալատի փոխխոսնակ Քերոլայն Քոքսը Արցախում էր... 67-րդ այցով: Միայն հիանալ կարելի է արդեն շատ տարեց այդ կնոջ կենսունակությամբ եւ հայ ժողովրդի ու մասնավորապես նրա արցախյան հատվածի հանդեպ անդավաճան նվիրվածությամբ: Աստված օրհնի Ձեզ ու Ձեր շառավիղներին, լեդի: Բարոնուհու այս մեկ այցը կապված էր իր ստեղծած եւ իր անունը կրող Վերականգնողական կենտրոնի 10-ամյա հոբելյանի հետ:

Տես որ, սակայն, նա մեր հուշաթանգարան էլ եկավ: Պիտի շեշտեմ՝ ոչ առաջին անգամ... Ուրախացավ նոր ցուցանմուշներ տեսնելով: Տառացիորեն ասաց հետեւյալը. «Գլուխ եմ խոնարհում, Վե-

րա, այս տղաների ու Ձեր առջել: Այս հուշաթանգարանը վկայում է այն մասին, որ հայ ժողովուրդն այս հողի վրա ապրել է դարեր ի վեր»: Ասացի՝ բարոնուհի, մեր սիրելի հարազատ, մեր ավագ քույր, այդ մենք պետք է խոնարհենք, եւ խոնարհում ենք, գլուխներս Ձեզ պես պատմական անձի (այո, Ձեր անունն, իրոք, արդեն պատկանում է պատմությանը, համենայնդեպս՝ հայ ժողովրդի պատմությանը՝ անժխտելիորեն) մեծության ու վեհանձնության առջել... Ամոթ էլ է ասելը, բայց հուզմունքից քիչ էր մնում լաց լինեի, ախր այդ կինը մի անբացատրելի ձեւով է անվերադարձ մերված մեր ցավին ու խնդիրներին:

23.09.2008



Արցախ են ժամանել կանադահայ բարերարներ Ջենեթ ու Քեթրին Չաքարյանները եւ Սկրտիչ Մալխասյանը: Եկել են պատերազմից տուժած Ջրաբերդ գյուղի վերակառուցմանն օժանդակելու:

Այցելեցին մեր թանգարան: Գլուխ խոնարհեցին տղաների նկարների, ցուցանմուշ-մասունքների առջել, խոստացան աջակցել օրացույցի, թերթի լույսընծայմանը: Խոստման տերը կմնան թե ոչ՝ չեն կարող ասել, բայց բոլոր դեպքերում հաճելի է,

երբ զգում ես, որ ցավդ կամ խնդիրդ հասկանում է անգամ դրսից եկածը (ինքս ինձ հետ ինչո՞ւ անկեղծ չլինեմ. երբեմն ավելի՝ քան ներսիններից ոմանք):

Ի՞նչ արած, կյանք է...

24.09.2008



Հոկտեմբերը մեզ համար Ծննդյան ամիս է, 10-ը՝ ծննդյան օր. 1998թ, այդ օրը ստեղծվեց, իրավական ուժ ստացավ մեր կազմակերպությունը: Իսկ այս տարվա հոկտեմբերը հատկանշական է նաև նրանով, որ լրանում է ԱԿԱՅՍ գործառնության ու գործունեության 10 տարին...

Շատ բովանդակալից ու պատկառելի ձեռով նշեցինք մեր սրտին թանկ այդ հոբելյանը: Ներկա էին պետության, օրենսդիր ու գործադիր իշխանության առաջին դեմքերը, պատասխանատու աշխատողներ, քաղաքական ու հասարակական գործիչներ, հյուրեր Հայաստանից եւ հեռու ու մոտ արտասահմանից: Ջեկուցումս, որում, ինչպես հայելու մեջ՝ արտացոլել էի տաս տարում մեր արած-թողածը, ընդունվեց ջերմորեն: Առավել հուզիչ էր մեր պատրաստած «Տասնամյա գոտեմարտ՝ ժամանակի հետ» փաստավավերագրական կինոժապավենը:

Ա՛խ, տղաներ, տղաներ, երանի հնարավոր լի-
նե՛ր՝ ձեր հեռուներից տեսնեի՞ք ու իմանայի՞ք այս
ամենի մասին: Որպես դիմակայության դեղ, մեր
տառապող տղերք:

10.10.2008



Օրերս ներկա էի «Հայրենյաց պաշտպան» երի-
տասարդական ճամբարի հանդիսավոր փակմա-
նը: Առաջին փորձն է: Շուրջ 100 ապագա զինվոր-
ներ են հանգստացել ու կոփվել այստեղ: Նրանց
հետ պարապել են ԼՂՀ պաշտպանության բանակի
սպաները: Ֆիզիկապես կոփվել ու ռազմական
պատրաստություն են ստացել ճամբարականները:

Որպես Բանակ-հասարակություն համակարգող
խորհրդի անդամ՝ նրանց կոչեցի ամբողջ կյանքում
ձգտել գործուն հայրենասեր լինելուն, նվիրեցի
«Հույսի ճանապարհ»-ի նոր լույս տեսած՝ հերթա-
կան համարը եւ իմ գրքերից որոշները: Աստված,
պահիր, պահպանիր իմ երկրի խաղաղությունն ու
այս դեռահասներին, պատանիներին, թող կա-
տարվի նրանցից յուրաքանչյուրի նվիրական երա-
զանքը:

15.10.2008



Այսօր հոգիս տակնուվրա եղավ: Բժշկական քուլեջի քույրական կուրսերից էին ծանոթանալու եկել հուշաթանգարանին, ու երբ բոլոր սենյակները շրջելուց հետո մտան այնտեղ ու դիտեցին բոլոր ցուցանմուշները, աղջիկներից մեկն ուղղակի երդման պես ասաց. «Աստված չանի՝ նորից պատերազմ լինի, բայց եթե լինի, ես առաջին իսկ օրից կլինեմ կռվող զինվորի կողքին, որպեսզի երբ տղաները վիրավորվեն՝ նրանց ժամանակին առաջին օգնություն ցույց տամ ու հանեմ կրակի գծից»: Չգիտեմ ինչու՝ այդ պահին ինձ թվաց, թե որդուս հետ ճիշտ հակառակն է եղել, այսինքն՝ երբ վիրավորվել է, կողքին դարձանող չի եղել... Յետո ուշքի եկա ու մտքումս կշտամբեցի ինձ. դու գիտես, հրամանատարն էլ, ընկերներն էլ պատմել են, որ նա թեժ մարտում գոռալով առաջ է անցել՝ կրակելով հակառակորդի վրա... Ու եթե արդեն վիրավորված՝ ընկել է, ապա կողքին հայտնվել կարող էր միայն թշնամու սանիտարը: Տեր Աստված, այս ինչե՛ր են գրում, մտքերս ասես զինովցածի մտքեր լինեն...

Ուսանողների համար ցուցադրեցինք մեր պատրաստած փաստագրական ֆիլմերից: Նրանց խոհուն հայացքներն ու աչքերուն լճացած արցունքը խոսքից ավելին ասացին ինձ: Ապրեք, երեխաներ,

թող երբեք պատերազմի ձայն չլսեք: Ձեր գործի գիտակը դարձեք, ու թող լինի այնպես, որ միայն խաղաղ օրերի տկարներին բուժօգնություն ցույց տաք:

16.10.2008



Առավոտ եկա գրասենյակ թե չէ՝ աշխատասեղանիս «Ազատ Արցախ» թերթի այսօրվա համարը տեսա: Բացեցի եւ այնտեղ տպագրված տեսա ԼՂՀ ԱԿԱՅՄ «Հայրենիք եւ Հավատ» մեդալի հիմնադրման մասին Որոշման տեքստը: Գործի սկիզբը դրված է, մնում է այն ավարտին հասցնելը:

Կհասցնե՛մ: Քար էլ պետք լինի կրծելու՝ կկրծեմ, բայց կհասցնեմ:

16.12.2008



Լուր առանք, թե առաջածորցի անհայտ կորած ազատամարտիկ Միեր Թելոսյանի ուսանողուհի դուստրերից մեկը՝ Դիանան, Երեւանում մահացուելքով վրաերթի է ենթարկվել, մյուսն էլ՝ Ինգան, ծանր վիրավորված է: Ասացին՝ մայրն ու եղբայրը մեկնել են. դիակը հնարավոր չէ բերել: Հուղարկավորությունը տեղի է ունենալու Երեւանում:

Երեք հոգով՝ ես, Շուրան ու ժաննա Թավրիզյանը, փութացինք Առաջածոր՝ Միերի մոր մոտ... Տեսարանն ավելի քան ծանր էր. մահացածի տատը ճակատագրի երկրորդ հարվածից իրեն փետում էր... Ցավակցեցինք, բայց որքա՛ն դժվար է նման պարագայում մխիթարանքի խոսք գտնելը: Մեզ հետ սննդամթերք էինք տարել, գումար էլ տվեցինք: Դե, հայի ադաթ է, ընտանիքն էլ՝ Կերակրողին կորցրած... Կազմակերպության անունից սգո ծաղկեպսակ դրեցինք Դիանայի նկարի մոտ:

27.04.2009



Այս տխրություններին վերջ չի՞ լինելու... Միերի կինը՝ Սուսաննան, վախենալով մյուս աղջկա կյանքի համար, տղայի՝ Վահանի հետ լիովին տեղափոխվեց Երեւան: Աստված պահի Սեյրան Օհանյանին, օգնեց՝ աշխատանքի դասավորեց նրան: Ծեր տատը մնաց իր օջախում... Ժողովրդական դրամայի անվերջանալի թվացող շղթայի եւս մեկ օղակ:

25.05.2009



...Առաջին անգամ նշվում էր ԼՂՀ Ոստիկանության (ոչ թե միլիցիայի) օրը: Ռոզա Աթասյանի, Անգին Աղաջանյանի եւ իմ ստորագրությամբ հանրապետական թերթում շնորհավորական ուղերձ հղեցինք ՆԳՆ հասցեով: Երեքիս որդիներն էլ՝ իմ Սպարտակը, Ռոզայի Մովսեսն ու Անգինի Գառնիկը, ծառայում էին ՆԳ համակարգում... Հանդիսավոր ժողովը հեռուստատեսությամբ դիտելուց հետո Ռոզան թե՛ եկեք գնանք նախարարի մոտ: Ես ու Անգինը. «Ինչի՞ համար»: Ռոզան. «Նրան ասելիք ունենմ: Գալի՞ս եք, թե՞ ոչ»: Գնացինք: Նախարարը, որ Բակո Սահակյանն էր, նորմալ ընդունեց մեզ: Ռոզան շարադրեց ասելիքը. «Պարոն նախարար, մեր տղաները այս շենքից են իրենց հերթական, բայց, ինչպես պարզվեց՝ վերջին մարտին գնացել... Վատ չէր լինի, չէ՞, եթե հանդիսավոր ժողովում տրվեին եւ նրանց անունները»: Կոռեկտ, բայց ներսից թեժ խոսք էր... Նախարարը մեղմ արձագանքեց. «Ոչ նրանց, ոչ էլ ձեր մասին մենք չենք մոռանում: Դուրս գալուց հերթապահի մոտ բան կա՞ կվերցնեք ու կհավատաք, որ իրո՞ք չենք մոռացել»: Հետո նա հարցուփորձ արեց կազմակերպության մասին՝ ինչ ծրագրեր ունենք, ինչով կարող է օգտակար լինել եւ այլն: Պայմանավորվեցինք, որ սկզբի համար կհոգա ԱԿԱՀՄ եւ տղաների մասին

պատմող գրքի տպագրության ծախսերը: (Խոստացավ եւ կատարեց խոստումը): Իսկ հերթապահի մոտ յուրաքանչյուրիս ծրար էր սպասում՝ 100-ական դոլարով:

Հետագայում էլ ՆԳՆ-ից և պետավտոտեսչությունից այս կամ այն տոնի կամ որեւէ իրադարձության հետ կապված՝ նույն, ավել կամ պակաս չափի գումար երբ ստանում էինք, ես դրանք, հենց առաջինից սկսած, չէի ծախսում, եւ ահա կուտակվել էր մոտ 300 հազար դրամ: Երկար մտածելուց հետո, նույնիսկ մեր թաղի բնակիչների հետ խորհրդակցելով, վճռեցի իրագործել մեր թաղի փոքրիկ հրապարակում աղբյուր-հուշարձան կանգնեցնելու մտահղացումը: Գումարային տարբեր ծախսեր արեցի՝ հուշարձանի նախագծի ստեղծման եւ այլ անհրաժեշտ հարցերի լուծման համար, բայց երբ եկավ նախագծին գործնականորեն կյանք տալու պահը, չգիտեմ ով՝ «խոփը քարին դեմ տվեց»... Դարեր ի վեր մեր նախնիները բարի կամքի թելադրանքով անձնական միջոցներով եւ անգամ սեփական ձեռքերով նման աղբյուրներ են կառուցել-թողել սերունդների համար, այդպիսով պահելով նահատակների, հայրենյաց նվիրյալների հիշատակը: Ինչո՞վ էր տարբերվում իմ ցանկացածը նրանց արածից: Ինչու այնքա՞ն պարզ հարցը վերածվեց թնջուկի՝ մինչեւ հիմա էլ չեմ հասկանում: Մեղավորներ չեմ փնտրում, ուղղակի հարցնում եմ:

Մարդկային սրտի ցավն ինչպիսի՞ գույներ կարող է ունենալ...

20.06.2010



Այսօր ցերեկով փողոցում հանդիպեցի Հայր Հակոբին: Վերհիշեցինք հուշաթանգարանի բացման օրը: Օրհնող-օծողն ինքն է եղել... Ասացի՝ այն ժամանակ երբ բոլորը ցրվեցին գնացին ու ես մենակ մնացի սրահում, ինձ թվաց, թե լսում եմ Աստծո ձայնը, որն ասում էր. «Նրանք դեռ կան, մի հուսահատվիր, ձեր համբերելուն քիչ է մնացել»: Եվ Հայր Հակոբը բացատրեց, որ դա իմ ներքին ձայնն է եղել, որ հնչել է Աստծո բերնով: Ահա թե հավատն ինչ ուժ ունի: Գրեցի այս տողերը, հիմա էլ Պարգել Սրբազանի խոսքը հիշեցի: Հուշարձանի մոտ զույգ թվով ծաղիկներ դնողներ եղան, եւ նա դիտողություն արեց. «Ողջերին ու նահատակներին մի խառնեք, ով հավատում է տղաների վերադարձին, այստեղ գալուց թող կենտ թվով ծաղիկներ վերցնի ձեռքը»: Մտածեցի, թե աթեիստի համար որքան դժվար պիտի լինի կորստին դիմանալը... Դարեր շարունակ մեր հավատքն է պահել մեզ ամենածանր պահերին:

12.09.2010



Անակնկալ. պարոն Խաչատուր Դողաքյանն է եկել: Փարիզից: Ավելի շուտ՝ Ալֆորվիլից, որին Սենա գետը եւ ընդամենը 2 կիլոմետրն են բաժանում Ֆրանսիայի մայրաքաղաքից:

Եկել է Երեւան՝ մասնակցելու Հայաստանի անկախության հռչակման 20-ամյա հորելյանին եւ որոշել, որ Արցախն էլ պիտի տեսնի: Ինձ համար հաճելի լուր էր դա, ախր ժամանակին մոտ մի ամիս ապրել եմ իրենց տանը... Աչքիս առաջը եկան տիկին Ալիսի մեղմանուշ դեմքն ու ձայնը, երբ հուսադրում էր ինձ՝ լավ կըլլա, Վերա ջան, ամեն ինչ լավ ըլլալու է...

Պարոն Խաչատուրն էր ու Գագիկ անունով մի երիտասարդ: Նրանց տարա մեր տուն: Երեք օր հյուրընկալվեցին մեր հարկի տակ: Բնության գրկում եղանք, արցախյան խորոված ըմբռնեցին, վերհիշեցինք ալֆորվիլյան իմ օրերը: Տխրեց, երբ իմացավ, որ Սպարտակի հարցում առաջխաղացում չկա... Երբ միս գնելու էի գնում, ետելիցս կանչեց. «300 գրամ, տիկին Վերա»: Շուրան ծիծաղեց. «Սա ձեր Ֆրանսիան չի է՛, պարոն Խաչատուր, 300 գրամը արցախցու սեղանին մեկ հոգու բաժինն է»: Երբ խորովածն արդեն վայելում էինք, ուտել-խմելում շատ զուսպ Դողաքյանն ասաց. «Ճիշտ էիք, ջանըն, դարաբաղյան սա քերաբը

մոռնալու փան չէ»:

Եղան մեր թանգարանում: Գիտեի, որ պարոն Խաչատուրն ընդհանրապես չի սիրում ցույց տալ իր զգացմունքները, բայց տեսա՝ շատ է հուզվում...

Կարծում եմ Արցախից ու մեզնից գոհ գնացին:

22.09.2010



Մեր «Գթասրտության ժամանակը» ֆիլմն արժանացավ Եղիշեի անվան կառավարական մրցանակի: Մրցանակը, չգիտես ինչու, շնորհվել է ոչ թե ստեղծագործկան խմբին, այլ միայն ռեժիսորին: Բայց մեկ է, անչափ ուրախ եմք, որովհետեւ կարելորդ փաստն է, եւ ապա ռեժիսորն էլ ոչ այլ ոք է, քան՝ մեր սիրելի Յրայր Ավետիսյանը: Նա մեզ շատ է օգնում:

Ժամանակին Յրայրի ընտանիքում դժբախտություն էր պատահել. մահացել էր առաջնեկը... Եվ ահա 10 տարի անց, երկու աղջկա գլխին, նրանց հարկի տակ նորից մանչ երեխայի ձայն հնչեց: Գնացինք սրտանց կիսելու Յրայրի, տիկնոջ՝ Նանարի եւ նորածնի հորական տատի՝ հանրապետության վաստակավոր ուսուցիչ Իրինա Գաբրիելյանի գոհությունն ու հրճվանքը: Իսկ երբ նորամա-

նուկն անցավ կյանքի առաջին 40 օրվա սահմանագիծը, եւ նրան տարան Շուշիի Ղազանչեցոց եկեղեցի՝ մկրտելու, կնքահոր ու կնքամոր դերում մեր անուսնական զույգն էր...

Ի՞նչ խորհրդավոր ու հոգելից երեւույթ է հատկապէս մանկան մկրտութիւնը: Ասես այդ օրն է միայն օրինականացնում նրա մուտքը մարդկության աշխարհ:

18.01.2011



Օրերս ԿԽՄԿ Ստեփանակերտի գրասենյակի աշխատակազմի ղեկավար Էդգար Սարգսյանի եւ հունանիտար օգնության բաժնի պետ Միերի հետ եղանք Յադրութի շրջանում. Տրախտիկ, Ազոխ, Տունի գյուղերում եւ Յադրութ քաղաքում: Մեր նոր ծրագիրը մեկնարկ է վերցրել: Անհայտ կորած ազատամարտիկների 3 ընտանիքի տրամադրեցինք. մեկին՝ կթան կով հորթի հետ միասին, երրորդին՝ 6 ոչխար, երրորդին 6 մեղվաընտանիք՝ փեթակով: Մեծթաղերցի Խաչիկ Բեջանյանի ընտանիքը գերադասեց բեռնաձի ստանալ՝ ապահովեցինք: Յադրութի Փիրուզ Գասպարյանը նույնպէս հրաժարվեց կովից (տանը տղամարդ չկա՝ անասնակերի հարցն ու հարակից խնդիրները լու-

ծի), փոխարենն ստացավ գերմանական մակնիշի կարի մեքենա, 60 մետր գործվածք, 6 կգ թել, 6 տուփ էլ ասեղ:

Դրանք բոլորն էլ ապրուստի «վերարտադրողական» միջոցներ են, ու հենց դա է նոր ծրագրի առավելությունը նախկիններից:

15.06.2011



Այս էլ քանիերո՞րդ անգամ վարչապետ Արա Չարությունյանը մեզ նյութապես օգնեց՝ անհայտ կորած ազատամարտիկների ընտանիքների երեխաների Ամանորյա տոնը ԱԿԱՅՆ դահլիճում պատշաճ նշելու:

Աստված երկար կյանք տա նրան:

24.12.2011



1994 թվականի ապրիլի 14-ին, երբ մոտալուտ պարտության դառնությունը ճաշակող Ադրբեջանի վարձած օտարերկրյա օդաչուները հերթական անգամ ռմբահարեցին Ստեփանակերտը, իրար ետեւից 2 ռումբ ընկավ մեր շենքի (Առաքելյան, 2ա) վրա: 49 բնակիչներ վիրավորվեցին:

Պատերազմն ավարտվելուց «որոշում» կայաց-

րինք՝ ամեն տարի այդ օրը հավաքվելու ենք բակի տաղավարում՝ միասին թեյ ու սուրճ խմելու եւ մեր գոհությունը հայտնելու Աստծուն առ այն, որ ռմբահարությունից մեր շենքից մահացողներ չեղան:

Որոշեցինք՝ այդպես էլ անում ենք: Դա մեզ համար վերածվել է յուրատեսակ ծեսի:

13.04.2012



Այսօր 15-րդ անգամ պետականորեն նշեցինք մեր տղաների հիշատակի օրը: Պարզ երկինք էր, բայց արարողությունը նոր սկսված՝ մեկեն այնպիսի հորդ անձրեւ տեղաց, որ մտածեցինք՝ հիմա ժողովուրդը կնետվի դես ու դեն՝ գլուխը փրկելու համար: Արի ու տես, որ ոչինչ էլ չեղավ. ամեն ինչ շարունակեց ընթանալ նախագծված հունով:

Երկրի նախագահը եւ պետական մյուս այրերը նույնպես անհողդողդ կանգնել՝ լսում էին ելույթ ունեցողներին: Երբ Պարգեւ Սրբազանը խոսում էր, դեմքով առվակներ էին հոսում... Այդ պատկերը մինչեւ հոգուս խորքը ցնցեց ինձ: Միջոցառումն անխափան հասավ ավարտին:

Լավ ժողովուրդ ունենք, լավ էլ պետություն, Աստված տա, որ այն շուտով ճանաչվի աշխարհի երկրների կողմից: Չճանաչվի էլ, փույթ չէ, մենք

կանք մեր հողի վրա, կարողացել ենք պահել այն՝
կպահենք այսուհետև էլ: Այդ գործում մեզ կօգնի
մեր հիշողությունը:

29.06.2012



«Մեր» ռեժիսոր Հրայրի եւ օպերատոր (ՆԳՆ-ից)
Արա Միրզոյանի ընտանիքների հետ Գանձասար՝
պատարագի էինք գնացել: Երկուսի երեխաներն էլ
(այս անգամ՝ Հրայրի աղջիկները) մկրտվեցին այն-
տեղ, եւ բոլորի կնքահայրը նորից Շուրան էր, կն-
քանայրը՝ ես: Հոգեկան մեծ բավականություն եմ
զգում, երբ Աստծո տանը մասնակցում եմ հոգեւոր
արարողության:

7.07.2012



Թաղավարդում էինք: Արցախյան պատերազ-
մում զոհված թաղավարդիների մարտական
փառքի թանգարանի հանդիսավոր բացումն էր:
Շատ բովանդակալից անցավ: Միջոցառման
ավարտից հետո «Գոյամարտի» հեռուստալրագ-
րողների հետ եղա Նինելենց տանը: Երեխաների
համար քաղցրավենիքի ու էլի դեսուդենի «հոգե-
պահուստ» էի տարել ինձ հետ: Ամուսինն էլ, երե-

խաներն էլ ջերմ դիմավորեցին մեզ: Չլիներ պատերազմը, նրանք իմ թոռները կարող էին լինել... բայց էլի իմն են, իմն էլ են համարում: Նրանց խաղաղ մանկության եւ ապագա հասուն կյանքի երջանկության համար աղոթում են համարյա այնպես՝ ինչպես Ինգայիս երեխաների համար: Նստեցինք, գրուցեցինք, համատեղ ապրած անցյալը հիշեցինք: «Գոյամարտոցիները» զարմացել էին մեր մտերմության չափով, բայց զարմանալու բան չկա. Նինելը եղել է իմ հարսը, այդպիսին էլ մնալու է իմ սրտում եւ ուղեղում, նա ինձ իմ Սպարտակի մասին է հիշեցնում... Եվ շնորհակալ են, որ ամուսինը՝ Եղիշն էլ հասկանում եւ ընդունում է դա: Լավ տղա է, Աստված հաջողության մեջ պահի նրան:

Ստեփանակերտ վերադառնալու ճանապարհին, Սարուշենի մոտ եզիպտացորեն էին խաշում՝ տաքտաք վաճառում անցորդներին: ՊԲ ռազմահայրենասիրական բաժնի ավագ սպա Կարո Չամբարձունյանը մեզ պատվեց այդ բարիքով, իսկ մայր, պատմական գիտությունների թեկնածու Միեր Չարությունյանը կես-կատակ, կես-լուրջ ասաց. «Գիրս մնա հիշատակող... Լավ է ասված, չէ՞: Տեսնես որեւէ մեկն ինչ-որ ժամանակ-որեւէ տեղ կհիշի-հիշատակի՞ սրա մասին»:

Երբ տուն հասա, հասկացա, որ այդ տեղը պիտի լինի հենց այս օրագիրը...

20.08.2012



Տառս կենդանի լինել, կասեր՝ ճակատդ շա՞ն ճակատ է, բալա... Այս մի քանի տարում մեղալի համար, հաշվել են, ուղիղ 36 անգամ Երեւան են գնացել, շուրջ 100 անգամ էլ զանգել՝ բանակցել, հետաքրքրվել, խնդրել, շտապեցրել... Մի մասը Երեւանում են պատրաստում, մյուսն էլ, ասում են, եվրոպական արտասահմանի ինչ-որ երկրում: Երբ ստանան՝ ինաց կտան: Օրը օրվա ետեւից, ամիսն՝ ամսվա, տարին՝ տարվա անցնում են, խոստացողը՝ խոստանում, իսկ ապրանքը չկա ու չկա: Գիտեմ, որ բազարից կուլա առնել չէ, բայց, մեկ է, նեղվում են:

30.08.2012



2006 թվականի մարտին էր: Երկու պատանիների հետ թանգարանային սրահի դռան առջեւ կանգնած մարդը հարցրեց. «Վերան Դո՞ւք եք»: Ասացի՝ այո: Թե՛ կարելի՞ է մտնել սրահ: Իհա՛րկե: Նրանք դիտեցին ամեն ինչ, հետո տղամարդը հարցրեց. ուզում են Ձեզ համար ուրեւէ բան անել, առավել ինչի՞ կարիք ունեք: Ասացի՝ տղաների մասունքների տեղադրման համար (անձնական իրեր, փաստաթղթեր, պարզեւներ եւ այլն) դարա-

կով ցուցասեղանների: Գրպանից հանեց 300 հազար դրամ, թե՛ կիերիքի՞: Ասացի փողը պետք չէ, շնորհակալ կլինենք, եթե ցուցասեղանները բերվեն... Քանի՞ հատ է պետք: Երեք: Երեք օր անց դարակասեղանիկները Մարատ անունով մի տղա բերեց, տեղադրեց (ինչպես պարզվեց՝ տղամարդու զարմիկն է): Բայց վերջապես պիտի՞ նշեն բարերարիս անուն-ազգանունը, թե՞ ոչ. Ալեքսանդր Ղազարյան: Ստեփանակերտում շատերը պարզապես «Շուրիկ» են ասում:

...Ցուրտ ձմեռ էր: Կուչ եկած՝ աշխատում էինք գրասենյակում, դուռը բացվեց ու ներս մտավ Շուրիկը: Իսկույն նկատեց լաբորատորայինից քիչ մեծ երկու էլեկտրական սալիկները, գլուխն օրորեց. «Սրանցո՞վ եք տաքանում»: Տղան՝ Դավիթը, հետն էր, հրամայեց՝ թռի մոտակա խանութից էն մեծ էլեկտրական վառարաններից, «Հառլեն» մակնիշի, երկուսը բեր: Վազեց, բերեց:

Անցավ մեկ ամիս՝ Շուրիկը նորից երեւաց մեզ մոտ: Հայրենասիրական երգեր «երգող» ծաղիկներ էր բերել թանգարանի համար: Ասաց՝ գիտե՞ս ինչ, Վերա, չգիտեմ՝ ուրիշներն ինչպես, իսկ ես մեր զոհվածներին ու անհայտ կորած տղաներին հիշելուց ասես մեղավոր եմ զգում ինձ, որ... նրանք չկան, իսկ ես կամ: Է՞լ ինչի կարիք ունեք: Ասացի՝ ուղեգորգերի՝ թանգարանային սրահում մեկնելու համար: Ժամանակ անց դա էլ բերեց: Բալի գուլյնի,

գեղեցիկ նախշերով մետրովի ուղեգորգ էր, հերիքեց ե՛ւ թանգարանային գլխավոր սրահին, ե՛ւ գրադարանին:

Այդպիսի սրտի տեր մարդու համար ինչպե՞ս չաղոթես Աստծուն, չասես՝ նրա լավի մեկը հազար արա... Երկար ժամանակ մտմտում էի, թե ինչպես կամ ինչով եմ մարելու այդ մարդու հանդեպ ունեցածս «պարտքը»: Երբ վարչությունը որոշեց «Հայրենիք եւ Հավատ» մեղալն ստեղծել ու պետության կողմից նախաձեռնությունը հավանության արժանացավ, առաջին միտքս Ալեքսանդր Ղազարյանին էլ պարզեւատրելն էր (մենք Որոշման մեջ հատուկ կետ ունենք՝ մեր կազմակերպության հետ սերտորեն համագործակցողներին, ծրագրերի կատարմանը նպաստողներին, շարունակական բարերարներին պատվոգրով ու մեղալով երախտահատույց լինելու վերաբերյալ): Եվ ահա երեկ՝ ԼՂՀ անկախության հռչակման 20-ամյա հոբելյանի օրը, մեր գրասենյակում, վարչության անդամներով, պարզեւը հանձնեցինք Շուրիկին: Թոռնիկի հետ էր: Հուզված ասաց՝ ախր ի՞նչ եմ արել է, ընդամենն ապրողիս պարտքն եմ կատարել...

2.09.2012



Վերջապե՛ս: Երեւանի ոսկերչական գործարան - 1 «ԳՆՈՄՈՆ» ԲԲԸ-ից զանգեց Աղասի Գաբրիելյանը եւ հայտնեց, որ մեղալը պատրաստ է, կարող եք գալ վերցնել: Առաջին քանակությանն անհրաժեշտ գումարը ԼՂՀ կառավարությունն ապահովել էր, փոխանցումը կատարեցինք: Երեք օր չանցած՝ ԼՂՀ նախագահի աշխատակազմից զանգեցին՝ եկեք բեռը ստացեք: Ինձ թվաց, թե մեջքիս ծանր քարերից մեկն ընկավ...

10.09.2012



Այսօր մեր վարչության անդամների ներկայությամբ, հանդիսավոր պայմաններում «Հայրենիք եւ Հավատ» մեղալ հանձնեցի երկրի նախագահի աշխատակազմի ղեկավար Մարատ Մուսայելյանին, ԱԱԾ պետ Վիկտոր Քոչարյանին, գեներալ-մայոր Անդրանիկ Մակարյանին, քաղաքապետարանի կրթության, գիտության եւ սպորտի բաժնի պետ Կառլեն Մարգարյանին, ՀՀ Զինվոր-հասարակություն համակարգող խորհրդի նախագահ Մարգարիտա Խաչատրյանին:

Նրանցից յուրաքանչյուրն իր գծով, ի պաշտոնե, սերտորեն համագործակցում է մեզ հետ, այս կամ այն չափով նպաստում մեր հարցերի լուծմանը:

1.11.2012



Կազմակերպությանը հատկացված սենյակները խայտառակ վիճակում էին, հրետակոծություններից ավերված: Սանհանգույցն էլ էր ահավոր վիճակում: Հաշվարկ կատարելուց հետո գնացինք «ՍԲՍ» ընկերության տնտեսական ապրանքների խանութ՝ գնումներ կատարելու: Խանութի տեր Բորիս Բարսեղյանը կտրականապես հրաժարվեց փող վերցնելուց: Ասաց՝ ընտրեցեք ինչը որքան պետք է ու տարեք, մեր անհայտ կորած տղաների հարազատներից 1 դրամ իսկ չեմ վերցնի, թող իմ լուման լինի ձեր մեծ կարիքներիս...

Հետո նա եկավ գրասենյակ՝ իր աչքով տեսնելու արդեն պատրաստ հուշաթանգարանը: Եկավ թանկարժեք նվերով՝ երկու զավակին գրկած մոր դրվագազարդ հուշարձանիկով: Ասաց՝ Աստված տա, այս մոր պես դուք էլ գտնեք ու գրկեք ձեր կորած զավակներին: Բորիս Սերգեեւիչը, կարելի է ասել՝ ավանդույթի է վերածել ԱԿԱՅՆ-ին նյութապես օգնելը, ու մենք շատ ենք շնորհակալ նրանից: Երեկ մենք վարչության կազմով ինքներս այցելեցինք նրան եւ հանձնեցինք արդեն հայտնի մեղալր:

Ժողովուրդը լավ խոսք ունի՝ «մեղքը՝ լալով, պարտքը՝ տալով»...

25.12.2012



Կամո Ներսիսյանի արածը կարելի է որակել իսկական արարք: Մարդը ԱԿԱՅՍ հաշիվն է փոխանցում 500 հազար դրամ՝ որպես տարեմուտի նվեր... Այդ փողով մենք անկողնուն գամված 30 հոգու համար մթերքներ ու մարտիության նվեր տարանք, ընդամին հայտնելով, թե ում միջոցներով: Օրհնանքներ տեղացին «Արցախբանկի» վարչության նախագահ Կամո Սերգեյի Ներսիսյանի հասցեին: Այդ դեպքը միակը չեղավ. հետագայում էլ նույնպիսի գումարով պարոն Ներսիսյանը մի անգամ եւս օգնեց մեզ. ու մեր նիստերից մեկում որոշում կայացվեց առ այն, որ նա էլ պետք է պարգևատրվի ԱԿԱՅՍ մեդալով:

Մեր վարչության անդամներով պարգեւը տիրոջը հանձնեցինք 2012 թվականի դեկտեմբերի 26-ին՝ բանկի գրասենյակում, իր աշխատողների ներկայությամբ:

28.12.2012



Այսօր մեզ համար «հայտնության» օր էր...

Ինչքան գեղեցիկ անցավ ԼՂՀ պաշտպանության նախարար, պաշտպանության բանակի հրամանատար, Արցախի հերոս Սովսես Չակոբյանին մեր «Չայրենիք եւ Չավատ» մեդալը հանձնելու արարողությունը: Գեներալ լեյտենանտը մեր գրասենյակ եկավ «Գոյամարտ» ծրագրի ստեղծագործական խմբի հետ: Մեդալն ստանալով՝ նա զինվորական պատվի բռնեց, ասելով. «Ծառայում եմ Չայրենիքիս»: Մեր մայրերն անասելի հուզվեցին այդ տեսարանից, իսկ անհայտ կորած բուժքույր Նադյա Բաղդասարյանի ամուսին Չրանտ Չակոբյանը կատակեց՝ կասե՞ք, թե մեզնից ո՞վ է հայրը, ո՞վ՝ տղան, պարոն նախարար, ես Չրանտ Սովսեսի Չակոբյանն եմ, Դուք՝ Սովսես Չրանտի Չակոբյանը... Ներկաները լիաթոք ծիծաղեցին, այդ թվում բոլորից բարձր՝ նախարարն ինքը:

Անհայտ կորած ազատամարտիկ, հայտնի ֆուտբոլիստ, իսկ ինչպես պարզվել է վերջերս՝ նաեւ հիանալի բանաստեղծությունների հեղինակ Վարուժան Բաբայանի եղբայր Ռոբերտ Բաբայանը հւզիչ ելույթ ունեցավ. «Մենք գիտենք, պարոն նախարար, թե ինչպիսի մարտական ուղի եք Դուք անցել պատերազմի ընթացքում եւ ինչ գնահատականի արժանացել՝ եթե այդ մասին Արցախյան

շարժման իդեոլոգներից անգամ խստապահանջ Ջորի Բալայանն է անվերապահորեն փաստում իր «Սուրեն Ադամյանի գումարտակը» հոդվածում... Մենք այն կարդացել ենք:

Մովսես Չակոբյանը շատ անգամ է օգնություն ցույց տվել մեր կազմակերպությանը: Մարդկանց դուր է գալիս նրա անկեղծությունն ու անմիջականությունը, որոնք վերջին պարագան չեն պետական պաշտոնյայի եւ շարքային քաղաքացու փոխհարաբերություններում:

31.12.2012



Երեկ այն մուտքում, որտեղ մեր բնակարանն է, հարսանիք կար: Որքա՜ն են ուրախանում, երբ քողը գլխին հարսնացու են տեսնում, մտածում են՝ տարի անց Արցախում նոր բալիկ կծնվի, նոր օջախի հիմք է դրվում... Ես այս մտքի մեջ՝ հարսնաքավորների միջից հանկարծ տղամարդու մի ձայն՝ բարեւ, տյոտ Վերա, ո՞նց ես... Նայում են խոսողին, չեն ճանաչում: Չե՞ս հիշում ինձ՝ կշտամբալից ասում է նա: Այդ պահին աչքս ընկնում է նրա վերնաշապկի բաց օձիքին, եւ կրծքի խոր այրվածքից մնացած սպին վերադարձնում է հիշողությունս: Մաքսի՛մ՝ նվագի աղմուկից «խլացած»՝ գոռում են

ես, այդ ե՞րբ ես եկել: Գրկախառնվում եմք: Ասում է՝ հենց հարսանիքի առիթից եմ օգտվել՝ եկել... հայրենիքս տեսնեմ: Այնտեղ խեղդվում եմ կարոտից, տյոտ Վերա, բայց դե ինչ արած, ճակատագրի հարց է... Վատ չեմ տեղավորվել, թեև, մեկ է, այնտեղ էլ ապրելը փափուկ բարձի վրա քնել չէ: Արդեն ընտանիքս էլ եմ տարել: Իսկ գլխավորը՝ որ բավականին բուժվել եմ: Ձեզանից պատմեցեք է՛, ի՞նչ կա, ի՞նչ չկա, տղաներից խաբար... Է՛հ, Մաքսիմ ջան, ասացի, «չկա»-ն շատ է, «կա»-ն էլ չկա: Ուն մասին ինչ գիտեմք՝ մեկ է, ազատելու ճանապարհը ցաքով է պատած, վախենում եմք անունները հայտնենք՝ թուրքերը վերջ տան նրանց... Կախարդական շրջանի մեջ եմք, տղա ջան: Իսկ դու երկա՞ր ես մտադիր հեռվում մնալ... Դե, ասաց, երեխաներին ոտքի կանգնեցնեմ, մի կտոր հացի տեր դարձնեմ... Որ ամեն ինչ լավ լինի՝ մնացողը չեմ, մեր հողը ձգում է:

Հարսանիքը գնաց, ես էլ ասես հարազատ տղայիցս բաժանվեցի: Աստված հաջողության մեջ պահի քեզ, Մաքսիմ ջան, շատ ես տանջվել:

3.05.2013



Ստեփանակերտում շահագործման հանձնվեց եւս մեկ հրաշալի շենք, որը պատիվ կբերեր ցանկացած զարգացած երկրի մայրաքաղաքի: Նորակառույցին նայելուց թվում է, թե հայտնվել ես հռոմ-փարիզներում կամ էլ ամենաքիչը Սանկտ Պետերբուրգում...

«Արցախի ազատամարտիկների միության» նստատեղին է: Շենքում տեղ է հատկացված եւ (կարելի է ասել՝ հարակից) «Արցախի ազատամարտիկների միության» երիտասարդական թելը հանդիսացող «Չայրենյաց պաշտպան», «Չայրենական պատերազմի եւ աշխատանքի վետերանների միություն», «ԼՂՅ զոհված ազատամարտիկների ծնողների ընկերություն», «ԼՂՅ անհայտ կորած ազատամարտիկների հարազատների միություն», «Մայրություն» եւ այլ հասարակական կազմակերպությունների:

Երեկ տեղի ունեցավ նորամուտի հանդիսավոր արարողությունը, որին, բնականաբար, ներկա էր եւ ԼՂՅ գլխավոր դատախազ ու Արցախի հերոս Արշավիր Ղարամյանը, որին ժողովուրդը պատերազմական տարիների հիշողությամբ դեռ «Արշո» է կոչում՝ «մեր Արշոն»... Ո՛ր վերին աստիճանն էլ զբաղեցնում է Արշոն հիերարխիայի բուրգի վրա, պաշտոնը նրան պահանջվածից ավել չի «կոշտաց-

նում», չի խլում նրանից հոգու պարզությունն ու մարդկային սրտացավությունը: Հենց արարողության ժամանակ Գլխավոր դատախազը, նկատելով Արցախյան պատերազմի հաշմանդամ, երկու աչքով կույր Սերգեյ Բեգլարյանին, քայլ արեց, մոտեցավ եւ իր ափի մեջ առնելով նրա ձեռքն՝ ասաց. «Շնորհավորում եմ քո Մայիսի 9-ը, Սերգեյ ջան: Ես եմ՝ Արշուն...»:

Հանդիպմանը առիթ եղավ, հենց ոտքի վրա, վերհիշելու 1997 թվականի հուլիսը, երբ Ղարվանդում բանակցում էինք թուրք Ջաքիրի հետ (վերջինիս իսկ նախաձեռնությամբ) Սպարտակին էլշանով փոխանակելու խնդրով: Ջաքիրը մեզ ցույց էր տվել Սպարտակի նկարը... Այն տեսնելով՝ Արշոյի աներձագ Օլեգ Աղաբեկյանը, լսելով Ջաքիրի բացատրությունն առ այն, թե ինքը պիտի բանակցի անձամբ Ադրբեջանի ՊԱԿ-ի ղեկավար Նամիկ Աբասովի հետ, «Ջաքիր մուալիմին» շահագրգռելու համար ասաց, որ, հանուն վստահության, ինքը պատրաստ է որպես կամավոր «պատանդ»՝ անցնել ադրբեջանական կողմն ու այնտեղ սպասել փոխանակմանը, պայմանով՝ որ իրենց խմբից մեկն էլ նույնը կանի՝ անցնի հայկական կողմը: Ես ցնցվել էի Օլեգի անկեղծությունից ու համարձակությունից...

- Նա միշտ էլ այդպիսին է եղել,- հիշեցմանս վրա ժպտաց Արշավիր Սուրենովիչը,- լավ զինվոր ու

լավ հայրենասեր: Չետո էլ զարմանալու ի՞նչ կա, ախր Սպարտակին ճանաչելու օրվանից երկուսս էլ հարգում էինք: Նա իրոք լավ տղա է, այն ժամանակ մեզ չհաջողվեց արդյունքի հասնել, բայց թող բարով հաջողվի՝ մի օր իրոք երեւա, վերադառնա...»:

Նա խոսում էր, իսկ ես արդեն մտովի ուրիշ օր էի վերհիշում: Էլի բանակցելու էինք գնացել, մեր կողմից 7 հոգի էինք, թուրքերի կողմից՝ մոտ 30... Բանակցության կեսին թուրքական դիրքերից կրակոցներ հնչեցին մեր ուղղությամբ: Արշոն իսկույն բերնին տարավ ձեռքի ռադիոսարքն ու թիկունքի մերոնց հրամայեց. «Եթե պարզվի, որ սա ծուղակ է, եւ լուրջ «պայթյուն» լինի, յուրային ու թշնամի չասեք՝ առանց ժամանակ կորցնելու գնդացիներից կրակ կուղղեք մեզ վրա...»: Ես սկզբում չհասկացա Արշոյի պահանջի իմաստը, բայց երբ հասկացա, անկեղծ եմ ասում, վախենալու փոխարեն հպարտության ու հիացմունքի զգացում ունեցանրա վճռականության համար:

Մեկ-մեկ զարմանում էլ եմ, թե այսքան դրամատիկ հուշերն ինչպես եմ տեղավորվել-մնացել մի փոքրիկ ու տառապած գլխում:

10.05.2013



...2012թ. հոկտեմբերի 14-ն էր: Տոնական տրամադրություն: Հերթական անգամ նշվում էր Ստեփանակերտի Օրը: Առավոտյան մեր գրասենյակ եկավ քաղաքապետի տեղակալ Արմեն Հակոբյանը եւ քաղաքապետի անունից կազմակերպությանը հանձնեց ծաղիկներ, մայրաքաղաքի զինանշանով դրոշակիկներ ու 100 հազար դրամ: Այն իսկույն փոխանցեցինք «Հայրենիք եւ Հավատ» մեդալի թողարկման արժեքի (դեռ պարտք ունենք) մասնակի մարմանը:

«Պյատաշոկ» պուրակում սպորտային եւ այլ միջոցառումներ էին ընթանում, այնտեղ հանդիպեցի «Արփեն» ծննդաբեր մայրերի հիմնադրամի ներկայացուցիչ Սարգսին: Նրա կողքին մի անձնավորություն էլ կար, ներկայացավ «Ալեք Բաղդասարյան»: Այցելեցին մեր հուշաթանգարանը: Այն մեծ տպավորություն թողեց Ալեքի վրա: Հրաժեշտից առաջ նա 340 դոլար հանեց գրպանից ու թե՛ տիկին Գրիգորյան, սա հենց այնպես... եթե նախապե՛ս իմանայի այս ամենի մասին...

Գումարն իսկույն մուտքագրեցինք:

Անցավ ժամանակ, եկավ 2013թ. մայիսի 8-ը: Անկախության հրապարակում Եռատոնն էինք տոնում՝ տեսա նույն Ալեքին: Մոտեցա, հիշեցրի այն 340 դոլարի մասին եւ իրազեկելով, թե մուտքագր-

ված գումարը կազմակերպության ինչ ծրագրի կատարմանն է նպաստել, մի անգամ էլ շնորհակալություն հայտնեցի: «Ախր ինչի՞ համար,- նեղվեց Ալեքը,- դա ի՞նչ գումար էր՝ մարդուն այսպես մեծարելու համար... Դրան Դուք եք արժանի՝ Ձեր կատարած գործով»: Ասացի՝ բարեգործական անգամ մեկ լուծան մեզ համար մեծ նշանակություն ունի ամենից առաջ հենց այն պատճառով, որ բարեգործական է՝ սրտից բխած բարոյական քայլ, հետո միայն՝ ֆինանսական միավոր...

Դա իրոք այդպես է: Մեր ցավող սիրտը գոնե մասնակիորեն մխիթարվում է պետության ու հատկապես հասարակության ուշադրությամբ...

Գրեցի այս տողերը եւ հիշեցի, որ տարիներ առաջ, դեռ 1999 թվականին, մի անգամ էլ մեր համաքաղաքացի գործարար Էդուարդ Վերդյանն է 100 հազար դրամ նվիրել կազմակերպության կարիքներին: Գուցե կգտնվի մեկը, որ կասի՝ մի անգամ մի բան է արել՝ մեծարո՞ւմ եք... Մեծարում եմ, այո, որովհետեւ այդ մարդը, մեկ թե բազմակի անգամ՝ շատերին է օգնել, այդ թվում՝ զոհվածների, վիրավորների, գրողների, արվեստագետների եւ այլոց: Երախտամոռությունը մարդու ամենաբացասական հատկանիշն է:

11.05.2013



2003 թվականի մայիսի 28-ից իմ կյանք մտավ մի անձնավորություն, որը ճանաչածս ժամից մինչեւ գրիչ շարժելուս այս պահն իր սրտի լույսով ջերմացնում է հոգիս:

Նրա՝ Մարգարիտա Խաչատրյանի, հետ ծանոթացա, երբ Երեւան էի մեկնել ոչ միայն Առաջին հանրապետության տոնին մասնակցելու, այլեւ որոնողական աշխատանքի հետ կապված որոշ հարցերով զբաղվելու: Օրվա Յանդիսավոր արարողությունից հետո Մարգարիտայի տուն գնացինք երեքով՝ «Արաբո» ջոկատի հրամանատար Մանվել Եղիազարյանը, ես, Վաչիկ Յարությունյանը: Գիտեի, որ տիկին Մարգարիտայի Արսեն որդին խաղաղ օրով զոհվել է պարտադիր զինծառայության ժամանակ, եւ որ մայրը գլխավորում է «Զինվոր» հասարակական կազմակերպությունը:

Այդ կինն ինձ ցնցեց իր դիտողունակությամբ եւ հաստատականությամբ, ճշմարտությունը երեսին ասելու (եթե խոսակիցն անգամ երկրի առաջին դեմքն է) կարողությամբ: Եվ ընդհանրապես՝ իր ամբողջական խառնվածքով ու բնավորությամբ: Մարգարիտայի խոսքն ունակ է ծակելու ամենապինդ զրահն անգամ (պատահական չէ, որ զինվորականների շրջանում շատերը նրան կատակով

«տիկին Մորոզ» են ասում), իսկ եռանդին նախանձել կարող է ցանկացած ոք:

2006 թվականին Մարգարիտա Խաչատրյանն ընտրությունների արդյունքում դարձավ եւ Բանակ-հասարակություն համակարգող խորհրդի նախագահ (ի դեպ, Արցախից երեք հոգի՝ Ես, Գալյա Առստամյանն ու Գեղամ Ստեփանյանը այդ կազմակերպության անդամներից ենք) եւ առայսօր պատվով է կատարում իր պարտականությունները: Քանի անգամ էլ որ նա լինում է Արցախում, իսկ դա բավականին հաճախ է պատահում, այցելում է մեզ, օգնում՝ ինչով կարող է, նպաստում հասարակական կազմակերպության հեղինակության բարձրացմանը, Երեւանում էլ՝ ամեն կերպ օժանդակում մեր այս կամ այն կարելու հարցի լուծմանը: Նա ինձ համար ավագ քույր լինի կարծես եւ իմաստուն խորհրդատու: Ես ուրախ եմ, որ հայրենիքն ունի նրա նման արժանի դուստր, ինչպես նաեւ հպարտ եմ, որ վայելում եմ նրա սերն ու հարգանքը: Իսկ ինչ իմ սիրուն ու հարգանքին է վերաբերում՝ հանդեպ նրա, ասելն անգամ ավելորդ է...

Ես հաստատ գիտեմ, որ մեր կազմակերպության շատ անդամներ, իսկ ամենից շատ՝ հենց վարչության անդամները, իրենց ստորագրությունները սիրով կդնեին այս տողերի տակ, որովհետեւ բազ-

մակի շփման ընթացքում իրենք էլ են համոզվել, թե ինչպիսի աննման մարդ ու քաղաքացի է տիկին Մարգարիտան, ու թե որչափ խորն է ցավում նրա սիրտը մեր Խնդրի ու գործերի համար: Ութ տարվա ծանր ու պարտավորեցնող աշխատանքը վերջերս անդրադարձավ նրա առողջության վրա՝ ամիսներ առաջ ծանր ինսուլտ տարավ... Ով էլ լիներ նրա տեղ՝ կկոտրվեր, խեղճանար, բայց ո՛չ՝ այսօր նա էլի նախկին «Մորոզն» է եւ շարունակում է առաջ տանել գործը: Այդ կնոջ կամքն ու արիությունը տառացիորեն փառաբանման են արժանի: Ապրիր երկար, մեր զինվորների եւ նրանց ծնողների մեծ բարեկամ, մեր բոլորի քույր:

18.05.2013



Պառկել էի, որ քնեմ, բայց չկարողացա: Նման դեպքերում Շուրային չարթնացնելու համար կամաց գնում եմ խոհանոց, լույսը վառում ու մի բանով զբաղվում: Ամենից հաճախ՝ օրագիրս բացում... Անկողին մտնելուց առաջ, հեռուստացույցով, ռուսական մի կինոֆիլմ էի դիտել, որում իրա-

դարձությունները տեղի են ունենում տայգայում: Դա էլ հիմա ինձ հիշեցրեց «մեր կենու» պատմությունը...

...2008 թվականի ուշ աշնանն էր, մեր վարչության անդամ, անհայտ կորած ազատամարտիկ Արսեն Աբալյանի մայր, սուևգայիթից բռնագաղթած ժենյա Մայիլյանը զանգեց, ասաց՝ անուսինն անտառում քիչումիչ փայտ է մթերել, Շուրայի հետ մեքենայով կարո՞ղ եք գնալ բերել: Սիրոս ճմլվեց: Սերգեյ քեռին, ախր, անբուժելի հիվանդ էր եւ նրան քիչ էր մնացել ապրելու, ինչպե՞ս է անտառում վառելափայտ հայթայթել: «ՈՒԱԶ»-ի նստատեղիները հանեցինք, գնացինք ու բերինք:

Ետդարձի ճանապարհին միտս ընկավ մի ուրիշ դեպք, որը տեղի էր ունեցել ավելի վաղ՝ 2002 թվականի ապրիլի սկզբներին: Մարտակերտ օգնություն էինք տարել մեր կազմակերպության անդամներից երեքին, ու ետ վերադառնալիս, Տիգրանակերտին չհասած՝ կենու թփեր տեսանք: Յարցրի՝ Շուրա, կենին լավ վառվում է, չէ՞: Թե՛ վառվելն էն խոսքը չի՝ դռդռանչ ա անում: Ասացի՝ ուրեմն, մեքենան կանգնեցրու եւ կացինը ձեռքդ առ... Իսկույն հասկացավ միտքս: Բանն այն էր, որ մեր անդամներից ժաննա Թավրիգյանը, Արփեն Մեհրաբյանը, Էմմա Յայրապետյանը, Լենա Ալուխանյանը

Եւ Կարո Բաղդասարյանը փայտի ու հատկապես «ակնավառիչի» դժվարություններ էին քաշում: 8 մեշոկ լիքը կենու ճյուղեր բերեցինք Ստեփանակերտ, որից մեկը մեզ թողեցինք, մեկը՝ Ինգայիս, մյուսները բաժանեցինք նրանց:

Ի դեպ, կենու հետ կապված այլ պատմություն էլ հիշեցի, որ վերաբերում է երջանկահիշատակ Լենա Ալուխանյանին (ծանր եւ անբուժելի հիվանդությունից մահացել է 42 տարեկանում): Մի օր եկավ, լաց եղավ: Վախեցած հարցրի՝ ի՞նչ է պատահել, թե՛ քո տված կենու ճյուղիկներով հաթայաթին վառարանը տաքացրել եմ՝ տակը ճուտիկներ հանել ոտքի կանգնեցրել, դուրս հանել բակ, մուտքի հարթակում բնակարանը վերանորոգող հարեւանիս թափած ցեմենտը կերել՝ համատարած կոտորվել են: Եվ դրա համար լա՞ց ես լինում՝ կշտամբեցի նրան, բա ջհանդամը թե կոտորվել են: Չառաչեց. «Է՛, Վերա, չգիտես է՛ ինչ եմ մտածել՝ նրանց դիակները թափված տեսնելով: Ինձ թվաց, թե իմ առջեւ մարտի դաշտն է ու...»: Չասկացա նրան: Ահա եւ մեր մեջ շարունակվող պատերազմը: Կյանքի վերջին շրջանում առանձնապես էր զգայուն դարձել Լենան, ընդամենը քսանքանի տարեկան է եղել ու երեք երեխայի մայր, երբ ամուսինը գնացել է հերթական մարտի ու ետ չի եկել:

Չեմ կարողանում մոռանալ այն երեկոն, երբ լսեցի նրա մահվան լուրը: Շրջանից էի եկել, մեր սանդղահարթակի կիսախավարում զիվորի համազգեստով մեկը մոտեցավ ինձ ու դողացող ձայնով թե՛ տյոտ Վերա, այսօրվանից երկկողմանի որբ եմ... մաման մահացել է: Մարատն էր՝ Լենայի կրտսերը, որ պարտադիր զինծառայության մեջ էր: Աստված իմ, ինչերի՛ միջով եմք անցնում: Ու մեր տառապանքի ծայրը չի երեւում:

15.07.2013



«Մեսրոպ Մաշտոց» համալսարանում մի անգլիացի կա, դասախոս է: Արդեն քանի տարի է Ստեփանակերտում՝ բարեկամացել է եւ մեր կազմակերպության հետ. գնում-գալիս է, հետաքրքրվում մեր ծրագրերով: Մտադրվել է օգնության ուղի գտնել դրանցից մեկի իրականացման համար: Չգիտեմ՝ կստացվի թե ոչ, բայց բոլոր դեպքերում հաճելի է, երբ օտարերկրացին այդչափ ուշադրություն է հատկացնում մեր խնդիրներին («մեր» ասելով միայն մեր կազմակերպությանը չէ, որ նկատի ունենմ):

Հետաքրքիր մարդ է: Նրանից կարելի է երկրի

քաղաքացի լինելու... արվեստը սովորել: Բացատրեմ. պետթատրոնի դիմացի հինգհարկանի շենքի (Լուսավորչի, 8) մոտ մի պատկառելի, հրաշալի ուռենի կար, առջեւը՝ հուշարձան եւ աղբյուր: Գործարար մեկը տարածքն ընդլայնելու համար վերելից գլխատեց ծառը եւ պատրաստվում էր լիովին ոչնչացնել այն: Մեր քաղաքն, այո, դարձել է շինհարթակ, բայց դա չի նշանակում, թե բնակչությանը, հատկապես նրա ամենախոցելի 2 խավին՝ ծերերին ու երեխաներին, կարելի է զրկել կանաչից ու նրա հովից... Ինչո՞ւ չգտնվեց մեկը, որ կանխեր ծառի գլխատումը (կամ՝ գուցե այդպիսին եղել է, բայց իշխանությունը չի անսացել նրա բողոք-արձագանքին): Բոլոր դեպքերում գործին խառնվել՝ հարցը լուծել է օտարերկրացի Նիք Վեգները: Նա փրկեց կիսասպան եղած ծառը: (Նամակ էր պատրաստել՝ հղելու անգամ երկրի նախագահին, չգիտեմ՝ հղել է, թե՞ ոչ): Այժմ ուռենին նորից է քամուց օրորւմ իր կանաչ վարսածամերը, բայց քանի՜ տարի կպահանջվի, որպեսզի այն առաջվա պես կատարը հասցնի հինգերորդ հարկի բարձրությանը...

Կեցցեք, պարոն Վեգներ, դուք մեզ բոլորիս լավ դաս տվեցիք:

Վերջերս Նիքը եղել է հանրապետության շրջան-

ներում, շրջանային ու գյուղական դպրոցներում: Երկու օր առաջ մեզ մոտ եկավ դիտողությամբ ինչո՞ւ դպրոցներում կան Արցախյան պատերազմում զոհվածների ստեղծներ, անկյուններ, անհայտ կորած տղաների՝ ոչ: Դա ճիշտ չէ եւ անարդար է՝ թարգմանչուհու օգնությամբ բացատրում էր (տեսեք ու՛մ) Վեգները: Ի՞նչ պատասխանեի՞նք: Ես չէ, որ պետք է այդ ծուռը շտկեմ, այլ, հավանաբար, մեր ուսուցիչները, դասղեկները, դաստիարակչական աշխատանքների գծով տվյալ դպրոցի պատասխանատուն: Իսկ մենք մեր հերթին կարող ենք ու պատրաստ ենք նրանց օգնել:

15.07.2013



Արդեն մայիսն էլ սպառվեց, առջեւում քիչ ժամանակ մնաց. հոկտեմբերի 10-ին լրանում է մեր կազմնակերպության հիմնադրման 15-ամյակը: Կանաց-կանաց պատրաստվում ենք մեզ համար կարելու այդ իրադարձությունը հանդիսավոր պայմաններում նշելուն: Որոշել եմ հորելյանին նվիրված փաստավավերագրական ֆիլմ պատրաստել:


Բայց մինչ այդ երկու խոշոր միջոցառում էլ ու-

նենք անցկացնելու. հունիսի 29-ի ՕՐԸ եւ օգոստոսի 10-ին՝ մեր արդեն 6-րդ համագումարը: Աստված զորավիգ լինի այնպես, որ առաջին հերթին ինքներս գոհ լինենք մեր կազմակերպածից: Ես այդ հարցում շատ եմ խիստ, ու եթե ձեռնարկվածը ինձ դուր եկավ, գիտեմ, որ հաստատ դուր կգա ուրիշներին էլ:

20.07.2013



Երբ պատանջը կուլ չի գնում
(«Արաբո» ջոկատի անհայտ կորած ազատամարտիկներ Կամոյի եւ Արմենի հայր ժորա Կարապետյանը՝ ետպատերազմյա հինգերորդ տարում)



Սպասումը դառնում է քար
(անհայտ կորած ազատամարտիկ Սպարտակ Գրիգորյանի հայր Շուրան՝ մինչեւ ԱԿԱՅՄ ծնունդը)




Եվ կարոտն է սիրտդ ճմլում
(Արցախյան պատերազմի մասնակից Արգեն Գրիգորյանը զինվորյալ մոր՝ անհայտ կորած Զինայի նկարի մոտ)



«Այս ավերակներու վրա ինչպե՛ս «թագավորեմ»...
Սեզամ, բացվի՛ր... ԼՂՀ նախագահ Ա. Ղուկասյանի եւ նախագահի
աշխատակազմի տնտեսագիտական վարչության պետ Բորիս
Ալավերդյանի հետ՝ ապագա հուշաթանգարանի տեղում: 2002թ.:



**Եթե կարողանայի՛ն
խոսել
ճանապարհները...**
Ստամբուլ: 2006թ.,
նոյեմբեր:
Պատմական թշնամու
փակ դարպասի
առջեւ...:



**Որդեգրի՞ն է՞լ կիսեն,
Աստվա՞ծ...**

Աջից՝ անհայտ կորած
ազատամարտիկ
Էդուարդ Ավանեսյանը:
Որտեղի՞ց իմանային
ծնողները, թե իրենց ինչ է
սպասում առջեւում:



**Շատերն էին այս
տարիքին, երբ զենք
վերցրին՝ պաշտպանելու
Հայրենիքը:**

Անհայտ կորած
ազատամարտիկներ
Նորայր Միրզոյանը
(ձախից) եւ Արմեն
Կարապետյանը:



Որտե՞ղ չի տանում կարոտյալի ուղին... Ստավրոպոլ, 16.11.2012թ.
Ստավրոպոլի «Նաիրի» հայկական ազգային մշակութային
ինքնավարության տնօրեն Անտոն Վարդանյանի հետ:



Առանց բացատրության, 10.08.2012թ.
կամ՝ Բարոնուհին՝ մեր քույրը «մշուշների երկրից»:



Արվեստուն և կյանքուն...

Անհայտ կորած ազատամարտիկ Հրաչ Գալստյանը (ձախից) երբեմնի Ղարմետաքսկոմբինատի ժողթատրոնի բեմում՝ և կրտսեր մարտական ընկերոջ հետ՝ 1991 թվականին:



Մրցույթում
1-ին տեղ
գրաված
հուշար-
ձանի
մանրա-
կերտը



Հուշարձանային «ողիսական»
կամ՝ երբ ստացվում է ռուսական առածի պես. лучше синица в
руках, чем журавль в небе...
Աջից՝ ՀՀ անհայտ կորած ազատամարտիկների հիշատակի
հուշարձանը եռաբլուրում: 19.09.2003թ.



Այց պապիկին...
Լարիսա տատը Լարիսա
թոռան հետ՝ անհայտ
կորած ազատամարտիկ
Վազիֆ Սաֆարյանի
նկարի մոտ:



Կա՛ հուշաթանգարանը, ու թող երկար կեցցեն բոլոր նրանք, ովքեր
նպաստել են նրա կայացմանը:



Անակնկալ:

Պարոն Հակոբն Է /Գույունճյան/ եկել Ստեփանակերտ ու մեր հուշաթանգարան: Փարիզյա՛ն հուշեր... 2001թ.



Հոգու պարտք:

Անհայտ կորած ազատամարտիկ Արկաղի Հովնանյանի եղբորորդի Անդրեն է տատի՝ Սեդա Առաքելյանի հետ հուշաթանգարան այցելել: Նույն ինքը՝ հայ երաժշտական բեմի փայլուն աստղ Անդրեն:



Մոռացության չտրվելիք մասունքներ:
Այստեղ դիտելու եւ խորհելու շատ բան կա...



Տուր՝ եւ կստանաս (Աստվածաշունչ):
Լինում են այցելուներ էլ, որ դատարկաձեռն չեն գալիս:
Ինչպես Ռուսաստանում ապրող՝ դարաբաղու արմատով
Քալստյան ընտանիքից այս երեքը՝ Լենսերը (ծախից),
հայրը՝ Սուրենը եւ զարմիկը՝ Յրանտը: Բարենպատակ
տուրքին մեծ ու փոքր չի լինում: 25.08.2012թ.



Տաք սիրտը տաք էլ ժպիտ է ծնում...
Ալեք Բաղդասարյանն ուղեկիցների հետ՝ ԱԿԱՐՄ
գրասենյակում: 14.10.2012թ.



Կինոերախայրիք:
Արցախի հեռուստատեսությունում: «Անունդ հայտնի՝
ճակատագիրդ անհայտ» փաստավավերագրական ֆիլմի
առաջին ցուցադրումից հետո:



ՀՈՒՆԻՍԻ 29: Այց: Անհայտ կորած ազատամարտիկների հուշարձանին:



Պարտավորվածություն՝ հայրենիքից բացակա եւ նույն ժամանակ «ներկա» զինվորի հանդեպ:



Փոխայցելություններ:

Զինվորականները սիրում են լինել մեզ մոտ, մենք էլ՝ իրենց: Եվ պատահում են շփման այնպիսի պահեր, որոնք դրդում են այսպիսի պատկերի...



ԴԵՄՔ:

Տառապագին որոնումներում, բանակցություններում իմ գորավիզը՝
կորովի Արշուն...



Շաղրուլաղ 15.12.1993թ.

Արշավիր Ղարամյանի գումարտակը:



Չերսը հերոս է բոլոր ժամանակների համար:
Անհայտ կորած ազատամարտիկ, ԼՂՀ 1-ին և ԶՀ 2-րդ աստիճանի մարտական խաչերի շքանշանակիր Կարոտ Սկրտչյանի անվան գրադարանի բացումը ԱԿԱՀՄ գրասենյակում:



Կարոտի հայր Յովհաննեսը (կենտրոնում) մեր հուշաթանգարանում, որդուն նվիրված գրքի շնորհանդեսից հետո:



Օտար հարազատներ:

ԿԻՄԿ Ստեփանակերտի գրասենյակի ղեկավար Սոֆյա Պակսլին (2010-2011)
ձախակողմյա նկարում (առաջինն աջից) եւ Ջորջ Դրընդարսկին (2006)
գործընկերների հետ (կենտրոնական նկարում՝ ձեռնափայտով) եւ
Բարդայից Ստեփանակերտ ժամանած՝ Բարդայի գրասենյակի ղեկավար
Ջելեն Փլենևա՝ աջակողմյա նկարում:



Մշտահոս կաթիլը քարն էլ է ծակում:
Վերջապե՛ս...Սեղանին է «Չայրենիք եւ հավատ» մեղալը,
որով շուտով կպարզեւատրվեն արժանի շատերը:



Պարզեղ՝ տեղում:
«SBS» ընկերության նախագահ Բորիս Բարսեղյանը մեղալն
ընդունեց նույնքան արժանապատվորեն, որքան
արժանապատվորեն բազմիցս օգնել է մեզ...



Երբ դու մենակ չես...

ԱԿԱՅՍ կողմից եռատոնյան նվերների հանձնում անհայտ կորած ազատամարտիկների մի խումբ հայրերի (2008թ.):



Այցելություն, օգնությամբ հանդերձ, անհայտ կորած ազատամարտիկ Արմեն Մելիքյանի՝ անկողնուն զամված մորը՝ Լենորային (ձախից առաջինը):




Մեր հաղթաթել արծիվը:
Կլիմի եւ այն օրը, երբ թագը քիչ մտտի մրա գլխին:
Նրանց եւ բոլորի ջանքերով...



Ճակատագրի հուշածով:

Նրանք կարող էին լինել ի՛նքնները... բայց նրանք մահի ի՛նքններն են, ու են աղոթում են նրանց արելաշատության համար:



Հաղուրի շրջանի մվստաձոր գյուղի բնակիչը օգնություն է ստացել Միկրո սևասական եպիսկոպոսություն՝ ծրագրի շրջանակներում, որը ԿԽՄԿ-ն իրականացնում է Ղարաբաղյան հակամարտության հետևանքով անհայտ կորած անձանց ընտանիքների համար:



ICRC
www.icrc.org

150

Խոտը՝ քեզ, կաթը՝ ինձ...

ԱԿԱՐՄ եւ ԿԽՄԿ Ստեփանակերտի գրասենյակի համատեղ նոր ձեռնարկունը՝ «Միկրոստեփանական մախածեռնություն» ծրագիրը, գործողության մեջ:



Պետական ուշադրությունը՝ սպեղանի:
Հուշաթանգարանի դիտարժան ցուցանմուշները շատ են...



«Դրսի» սուր հայացքը:
Անգլիացի Նիկ Վեգները հաճախ է այցելում մեզ: Ուզում է օգնած լինել եւ սիրում է խորհուրդներ ու հարցեր տալ: Նրա վերջին, ամենաթարմ հարցը. «Ինչո՞ւ Արցախի դպրոցներում կան պատերազմում զոհվածների վահանակներ, անկյուններ, իսկ կորած ազատամարտիկների՝ ոչ: Դա տօգել է եւ անարդար»:



«Մի ունեցիր 100 ռուբլի, այլ ունեցիր հարյուր բարեկամ»:
Գեներալ մայոր Վարդան Ավետիսյանն ինձ շատ է օգնել «Հայրենիք
եւ Հավատ» մեդալի կայացման հենց նախասկզբում:



Վարդանը Ավոյի եւ մարտական մյուս ընկերների հետ...



ԼՂՀ անկախության օրը՝ տղաների հուշարձանի մոտ:



Ձիմվորների մոտ՝ զինվորների համար:
ԼՂՀ բանակ-հասարակություն համակարգող խորհրդի
անդամները Ն.գորամասի խոհանոցում...



Հաղթանակի գինը:

Այն նույնը չէ բոլորի համար: Ու՛ր է թե իմ որդին էլ վերադառնար եւ ապրեր այսպես՝ սայլակին գամված: Գլուխ խոնարհել է պետք այս տղաների առջեւ...



Ստեփանակերտ, 2013թ. ապրիլի 9:



Հայացք:
Դիտումից հետո:



Հայրենյաց Պաշտպանի օրը:
ԱԿԱՀՄ-ի հյուրերն են ՀՄՊՎ, ԱԱՄ եւ «Լուսաբաց» կազմակերպությունների մի խումբ անդամներ. հրավիրվել են համատեղ նշելու թանկագին տոնը:



Բարեկամի ծեռքը:

«Արցախի երիտասարդական կենտրոն» կազմակերպության տնօրեն Սուսաննա Պետրոսյանը եւ ՀՕՍ Արցախի մեկուսի մասնաճյուղի ատենապետուհի Կարինե Դադայանը շնորհավորելու է եկել ԱԿԱՀՍ անդամ 15 մայրերի: 7 ապրիլի, 2013թ.:



Գործի նվիրյալներ: Տիկին «Մորոզ»:

Նրան՝ Մարգարիտա Խաչատրյանին, սիրում եւ միաժամանակ նրանից պատկառում են անգամ տղամարդիկ՝ արտակարգ գործունյա, նույնքան էլ պահանջկոտ լինելու համար:

ՎԵՐԱ ԳՐԻԳՈՐՅԱՆ

**ՔՈՂԸ ԵՏ ՔԱՇԱԾ
ԳՐԱՌՈՒՄՆԵՐ**

Խմբագիր՝
Սրբագրիչ՝
Համակարգչային շարվածքը՝
Էջադրումը՝
Կազմի ձևավորումը՝

Միքայել Բալյան
Իրենա Մարտիրոսյան
Գայանե Խաչատրյանի
Թամար Հարությունյանի
Գոհար Ավանեսյանի

Թուղթը՝ օֆսեթ, տպագրությունը՝ օֆսեթ, չափսը՝ 60x84^{1/16},
ծավալը՝ 12.5 տպ. մանուլ, տպաքանակը՝ 500:

Տպագրվել է «Դիզակ պլուս» հրատարակչության տպարանում
Յ.Հակոբյան, 25
Ստեփանակերտ-2014